

ಕೂರ್ಗ್ ಸ್ಟಾರ್ ಚಿಕ್ಕೇರ ಅಪ್ಪಯ್ಯ



ಎಲ್ ದ್ ನವು
ಚಿಕ್ಕೇರ ತ್ಯಾಗರಾಜ್



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಂಡಿಗಳಿ

BVP-1058-9/1/17

⑤ 998-34/~~8~~
87

ಕಾರ್ಗ್ ಫ್ಲಾರ್ ಚೆಕ್ಕೇರ ಅಪ್ಪಯ್ಯ

ಎಳೆದೊನವು
ಶ್ರೀ ಚೆಕ್ಕೇರ ತ್ಯಾಗರಾಜ್



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

"Coorg Star Chekkera Appaiah"

Life History of written by Shri Chekkera Tyagaraj, Konageri Village, Kodagu Published by The Karnataka Kodava Sahithya Academy, Madikeri.

ಆದ್ಯ ಮುದ್ರಣ : 2011

ಪ್ರತಿ : 500

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್.

ಪ್ರಕಟ ಪಡಾತ್‌ನವು :

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಕ್ರಯ : 50 ಉರ್‌ಪಿಯ

ಪುಸ್ತಕ ಕೊಟ್ಟುವ ಜಾಗ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚೆಕಾರ :

ಶ್ರೀ ಕೃಷ್ಣ ಕಂಪ್ಯೂಟರ್ಸ್ ಅಂಡ್ ಪ್ರಿಂಟರ್ಸ್

ಪೂಜಾ ಆರ್ಕೆಡ್,

ಜೂನಿಯರ್ ಕಾಲೇಜ್ ರೋಡ್, ಮಡಿಕೇರಿ

ಫೋನ್ : 08272 - 224919, 94481 35592

ಎಳ್ತಕಾರಂಡ ತಕ್ಕ

ಕಾಡ್ಲ್ ಪಲತರತಾರ ಮರ, ಗಿಡ, ಬಳ್ಳಿ, ಪೂ, ಕಾಯಿ, ಪ್ರಾಣಿ, ಪಕ್ಷಿಯಾದ್ ಇಪ್ಪ. ಅದೆಲ್ಲ ಕೊಡಿತುಂಡೇಂಗಿ ಕಾಡ್. ಅನ್ನನೆ ಒರ್ ಸಮಾಜಾಂದೆಣ್ಣಕ ನಲ್ಲರಿಕೆ, ನಲ್ಲರಿಮೆ, ಕಲೆ, ಸಾಹಿತ್ಯ, ಸಂಗೀತ, ನಡಪ್, ತೊಡಪ್, ಧರ್ಮ, ಸತ್ಯ ದುಂಬಿತುಂಡೇಂಗಿ ನಲ್ಲೋರ್ ಬದಕ್ ಎಲಂಗಿತ್ ನಲ್ಲೋರ್ ಸಂಸ್ಕೃತಿ ತುಂಬನ ಸಮಾಜ ಆಪ.

ಸಂಗೀತ, ದೇವಗಂದವರ್ಡಲ್ಲಿಂಜ ಬಂದೋರ್ ಕಲೆ. ಇನ್ನತಾನ ತಾಂಡ ಬದಕ್ಲ್ ಅಳವಡಿಚಿಟ್ಟುಂಡೇ ಫಲತರತಾರ ಕುತ್ತ, ಪೊಯ್ತಕ್ ಕೊಟ್ಟಿತ್ ಇಂದ್ ನಂಗಡಲ್ಲಿಂಜ ಮರೆ ಆನ ಪರಿಗಯಯಿಂಗಳ ನಂಗ ಎಕ್ಕಲೂ ನೆನತಿಯಂಡ್ ಆಯಿಂಗಡ ಬದಕ್ರ ಸಾಧನೆನ ಇಂದೇತ ಸಮಾಜ ಚೆನ್ನಂಗಾಚೇಂಗಿ ಎಡ್ತಂಡ್ ಅರಾಂಜಿ ನಡಂದಕ ಬದಕ್ ಸಾರ್ಥಕ ಆಪ. ಪುಟ್ನ ಮನುಷ್ಯ ತಿಂದುಂಡ್ ಚತ್ತಕ ಪೋರಾ. ಚತ್ತ ಪಿಂಞಲೂ ಅಯಿಂಗಡ ಸಾಧನೆ ಜೀವತಲ್ ಇಪ್ಪಂತ ವೀರ ಶೂರಂಗಡ ಸಾಧನೆಯೇ ಆಡ್, ದಾನ ಧರ್ಮ ಬೆಚ್ಚಂಡವೇ ಆಡ್, ಜನಸೇವೆ ಮಾಡನವೇ ಆಡ್, ಸಾಹಿತ್ಯ, ಸಂಗೀತ, ಕಲೆಲಿಂಜವೇ ಆಡ್, ಅಯಿಂಗಡ ಸಾಧನೆನ ಮಿಂಞಕ್ ಈ ಸಮಾಜತಲ್ ಬದಕ್ವೋ ಕುಂಞಿ ಮಕ್ಕಕ್ ಇನ್ನತಯಿಂಗಡ ಕೇಳಿ ಬಟ್ಟೆ ಬೋಳಿ ಆಪ.

ಇನ್ನತ ವಿಚಾರತನ ಅರಾಂಜಿತ್ ಏರ ಕಾಳಜಿ ಎಡ್ತಂಡ್ ನಾನ್ ಎಳ್ತನ ಈ ಪುಸ್ತಕ ಬೋಳಿ ಪಡ್ತನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷಿ ಶ್ರೀಮತಿ ರಾಣಿ ಮಾಚಯ್ಯ ಅಯಿಂಗಳೋ, ಅಯಿಂಗಡ ಬಲತ ಕೈ ಪೋಲತ ಎಲ್ಲಾ ಸದಸ್ಯಂಗಳೊ ನಾನೂ, ನಾಡ ಸಂಸಾರವೂ ಎಕ್ಕಲು ನೆನತಿಯವ.

ಅಮ್ಮೆ ಕಾವೇರಿ, ದೇವಿ ಸರಸ್ವತಿರ ದಯತಲ್ ಮಿಂಞಕೂ ನಲ್ಲ ಕಾರ್ಬಾರಲ್ ಈ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಎಲಂಗಿ ಬಾಳಡ್ಲೆಂದ್ ಬಯಂದವಿ.

ನಿಂಗಡ ನಂಬಿಗರ

ಚಿಕ್ಕೇರ ತ್ಯಾಗರಾಜ್

ಅಧ್ಯಕ್ಷರ ತಕ್ಕ

ಕುಂದ್ ಸೀಮೆ, ಮಲೆನಾಡ್ ಕೊಡಗಲ್ ಸಾಹಿತ್ಯ ಪಿಂಞ ಶಾಸ್ತ್ರೀಯ ಸಂಗೀತಕ್ ಅವಕಾಶ ಪರ್ತ್ ಕಮ್ಮಿ ಇಂಜತ್. ಜಾನಪದ ಸಾಹಿತ್ಯ ಪಿಂಞ ಕಲೆ ಮಾತ್ರ ಪಂಡಂಚೇ ಬೊಳ್ಂದ್ ಬಂದಿತಿಂಜತ್.

ಕೊಟ್ಟ ನಾಡಾರ ದಿ. ಚೆಕ್ಕೇರ ಅಪ್ಪಯ್ಯ ಕೊಡಗಲ್ ಶಾಸ್ತ್ರೀಯ ಸಂಗೀತತಾರ ಕುರು ಬಿತ್ತಿ ಬೊಳತಿ, ಪೋತಿ ಚಾಕ್ನ ಕೇಳಿಪಟ್ಟ ಸಂಗೀತ ಕಲಾವಿದ ಚೆಕ್ಕೇರ ಅಪ್ಪಯ್ಯನ ಕಂಡ್ ಅರಿಯತಯಿಂಡ ಬಾಯಿಲೂ ಪೆದ ಮಾತ್ರ ಇಂಜತ್. ದಾರೆಂಗೊಬ್ಬ ಉದ್ದ ತಲಮಿ ಬುಟ್ಟದ್ ಕಂಡಕ "ಅದಾ ಚೆಕ್ಕೇರ ಅಪ್ಪಯ್ಯ"ಂದ್ ಮಕ್ಕ ಮರಿಯಳೂ ತಮಾಸಿ ಮಾಡುವಚ್ಚಕ್ ಜನಪ್ರಿಯ ವ್ಯಕ್ತಿ ಸಂಗೀತ ವಿದ್ವಾನ್ ಚೆಕ್ಕೇರ ಅಪ್ಪಯ್ಯ.

ಅಪ್ಪನನ್ನೆಕೇ ಮಕ್ಕ, ಕರ್ ಮಕ್ಕಕೂ ಈ ಸಂಗೀತ ಕಲೆ ವಂಶ ಪಾರಂಪರ್ಯವಾಯಿತ್ ಬಂದಿತ್. ಈ ಪುಸ್ತಕತಾರ ಎಳ್ತಕಾರ ಶ್ರೀ ತ್ಯಾಗರಾಜನೂ, ಅಯಿಂಡ ಮಕ್ಕಳೂ ಇಂದ್ ಕೇಳಿರ ಸಂಗೀತಕಾರಂಗ.

ಕೊಡಗಲೂ, ನೆರೆ ರಾಜ್ಯತಲೂ ಸಂಗೀತ ಕ್ರಾಂತಿ ಎಪ್ಪಿತ್, ಕೊಡಗ್ ಎದ್ ಕ್ಷೇತ್ರತಲೂ ದಾರ್ಕೂ ಕಮ್ಮಿ ಇಲ್ಲೆಂದ್ ಸಾಬೀತ್ ಪಡತನ ದಿ. ಚೆಕ್ಕೇರ ಅಪ್ಪಯ್ಯಂಡ ಬಾಳಾರ ಸಾಧನೆನ ತೇಡಿ, ಆಂಜಿ, ನೆಜ್ಜಿ ಪುಸ್ತಕ ರೂಪತಲ್ ಬೊಳಿಪಡತನ ಶ್ರೀ ಚೆಕ್ಕೇರ ತ್ಯಾಗರಾಜಂಡ ಸಾಹಿತ್ಯ ಸೇವೆಕ್ ಕೊಡಗರ್ ಕಲಾ ಪ್ರೇಮಿಯಡ ವಂದನೆ. ಈ ಕೃತಿನ ಬೊಳಿಪಡತುವ ಅವಕಾಶ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಕ್ ಕೊಟ್ಟನದ್ ಓರ್ ಭಾಗ್ಯ. ದಿ. ಚೆಕ್ಕೇರ ಅಪ್ಪಯ್ಯಂಡ ಆತ್ಮಕ್ ಶಾಂತಿ ಕೊಟ್ಟೆಚಿಂದ್ ನಂಬುವಿ.

ಮಡಿಕೇರಿ

9-3-2011

ಐಮುಡಿಯಂಡ ರಾಣಿ ಮಾಚಯ್ಯ

ಅಧ್ಯಕ್ಷಿಣಿ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಕಾಲ 1910ಲ್ ಎಣ್ಣಕ ಒರ್ ನೂರ್ ನೂಯಿಟಂಜಿ ಕಾಲಕ್ ಬಯ್ಯ ಇಕ್ಕತ್ತರನ್ನನೆ ಕೊಡಗಲ್ ಅಪ್ಪರಿಪ್ಪರ ಪೋಪಕ್ ಬಸ್ಸ, ಕಾರ್ ಇಂಜನ್ನನೆ ಅಕ್ಕ ಇಂಜಿತಿಲ್ಲೆ. ಮನೆ ಮೊಟ್ಟ್ ದಾಟ್ಚೆಕೆತ್ತನೆ ಎತ್ತಗಾಡಿರ ಚಲಾವಣೆ ಏರ ಇಂಜತ್. ಬಯ್ಯ ಶ್ರೀಮಂಗಲ ನಾಡ್ ಕಡಂಗ್ ಹುದಿಕೇರಿಲ್ ಮೈಸೂರ್ಕ್ ಪೋಪ ಬಪ್ಪ ಒರ್, K.B. ಬಸ್ಸೆಂದಿಂಜತ್. ಪೊಲಾಕ ಏಳ್ ಗಂಟೆಕ್ ಮೈಸೂರ್ಕ್ ಪೋಯ್ತ್ ಬೈಟಾಪಕ ಆರ್ ಗಂಟೆಕ್ ಹುದಿಕೇರಿ ಕೆತ್ತಿತ್, ಮಿಡ್ಲ್ಸ್ಕೂಲ್ ಗೇಟ್ ರ ಎದಿಕೆ Shedಲ್ ನಿಪ್ಪಯಿಂಜತ್. ಅನ್ನನೆ ಒರ್ ಸುಮಾರ್ ಎಂಬದ್ ಕಾಲಕ್ ಬಯ್ಯ ಮುರ್ವಂಡ ಬೋಜಪ್ಪಂಡ ಶ್ರೀ ಜಗದೀಶ್ವರ ಬಸ್ಸ ಒಂದ್, ಇಂಞಿ ಒಂದ್ ಆದಿ ಶ್ರೀ ಕಾವೇರಿ ಬಸ್ಸು ಇಂಜತ್. ಈ ಮೂಂದ್ ಬಸ್ಸಲ್ ತಾಲೋಕ್ ಮಟ್ಟತ್ ಜನಡ ಅಪ್ಪರಿಪ್ಪರ ಪೋಪದ್, ಬಪ್ಪದ್, ಮಡಿಕೇರಿ ಮೈಸೂರ್ಕ್ ಪೋಪದ್ ಬಪ್ಪದ್ ನಡಪಯಿಂಜತ್. ಆಚೆಂಗಿ ನಾಗರಿಕತೆರ ಕೊರವ್, ಎಳ್ತರ ಕೊರವ್ ಇಂಜಾಂಗ್ ಪೇಟೆ ಕೋಟೆಕ್ ಜನಕ್ ಎತ್ತಗಾಡಿ, ಕುದರೆರ ಚಲಾವಣೆ ಏರ ನಡಪದಿಂಜತ್.

ಕುಲದೇವಿ ಕಾವೇರಿ, ಕುಂಡಿಕೆಂಜ ಉಕ್ಕುವ ತೊಲೆಯಾರ್ ಒಂದ್ ಕಯ್ಯುವ ನೇರತ್ಂಜಿ, ಬಪ್ಪ ಕೊಯಿಪಣಿಕೆತ್ತಣೆ ಕೊಡಗ್ ಕಾಡ್ನಾಡ್ ಬೇಲ್ ಬಾಣೆರ ವಾತಾವರಣ ದಿವಸಕ್ಕೊರ್ತರ, ಪಣ್ಣ್ ಪಲತ್ತರ ಪೊಲ್ಚಲ್ ಏರ, ಬೇಲ್ ಬೊಳೆಕ್ ಕೊಟ್ಟಲ್ ರಾಸಾರ ಗೊಬ್ಬರ, ಕರೆಕಾಡ್ ತೊಪ್ಪ ತೋಲ್ಡ ಗೊಬ್ಬರ, ಬೋಂಡಿಯ ಮಳೆಗಾಲ, ಎದ್ದ ನೀರಾರ ಅಳವು ಬೋರೆ. ಇನ್ನನೆ ಬೇಲ್ ಬೊಳೆ ಮಂಬೊಳಿಯ ಕರ್ ಬೊಳಿಯ, ಬಲು ಬೊಳಿಯ, ಚಿಂಗ್ರಿ, ಸಣ್ಣ ನೆಲ್ಲರ ಪೊಲ್ಚಲ್ ದಿನಕ್ಕೊರ್ತರ. ಬೇಲ್ ಬೊಳೆ ಪಾ ಬಾಂಗುವ ಮಿಂಞ ಚಂಗ್ರಾಂದಿ ಕಂಡವು,

ಪಾ ಬಾಂಗಿ ನೆಲ್ಲ ಮುರ್ವಕ ಪುತ್ತರಿ ನಮ್ಮೆನ ಕಾಂಬ. ಇನ್ನನೆ ದಿನಕ್ಕೊರ್ ತರ ಬೊಳಂದ್ ಬಾಂಗಿ ಜೂಂಗಿ ಪಣ್ಣಾಯ್ ತಣ್ಣೆರಿಯಾಯ್ತು ಕೂಡಿ ಅರಿ ಆಯ್ ಕಳ ಮದೆ ಆಯ್ತು, ಒಕ್ಕ ಆಯ್ತು ಕಡೆಕ್ ನೆಲ್ಲ ಗೂಡೆಲ್, ಪತ್ತಾಯತೂ ದುಂಬಿತಿಪ್ಪ.

ಇದೇ ಸಮಯತ್ ಮೂಡ್ಸೀಮೆಕಾರ ವ್ಯಾಪಾರಕ್ಕಾಯ್ ಕೊಡಗ್ಕ್ ಬಪ್ಪಯಿಂಜತ್. ಕ್ಕೊಟ್ಟನಾಡ್ ಪ್ಪ್ರತಿ ಊರ್ ಮನೆಮೊಟ್ಟಲೂ ಮೂಡ್ಸೀಮೆಕಾರಡ ಎತ್ತಗಾಡಿ ತಿಂಗ ಒಂದಾಕಣೆ ಇಂಜಿ, ಊರ್ ಮುಕ್ರರ ಮನೆಂಜ, ವಕ್ಕತಿಂಜ ಬೇಲ್ ಬಾಣೆ ದಾಟಿ ಬೋರೆ ವಕ್ಕ ಮನೆಕೆತ್ತನೆ ಅವು ಕೊಂಡಬಂದ ಮುದಾರೆ, ತೆಂಗ, ಬೆಲ್ಲ, ಬೇಳೆ, ಪುಳಂಜೆ ಇನ್ನನೆ ಸಾಮಾನ್ ಕೊಡ್ತಿತ್, ನೆಲ್ಲ ಸಂಪಾದನೆ ಮಾಡಿಯಂಡ್ ಕಡೆಕ್ ನೆಲ್ಲ ದುಂಬಿಚಿಟ್ಟಂಡ್ ಊರ್ ಊರ್ಂಜ ಗಾಡಿ ಸಾಲಾಯಿ ಪೊರಟ್ ಅಯಿಂಗಡ ಊರ್ಕ್ ಪೋಪಯಿಂಜತ್. ಕಾಲ ಇನ್ನನೆ ನಡಂದಂಡಿಪ್ಪಕ ಒಂದ್, ದಂಡ್ ಲಾರಿಯಡ ಓಟ್ಕಳಿಯಿಂಜತ್. ಮೂಡ್ಸೀಮೆರ ಸಾಮಾನ್ ಎಡ್ಪಕೂ, ನೆಲ್ಲಕೊಡ್ಪಕೂ ಆ ಕಾಲತ್ ಬೆಂದುವಡನ್ನನೆ ನೋಟಿಯಂಡ್, ಮನೆರ ಮೊಟ್ಟೆಲ್ 10 ಗಾಡಿರ ಎತ್ತುವಳೂ ಸಾಲಾಯಿ ಕೆಟ್ಟಿತ್, 10 ಒಲೆ , 10 ಟಿನ್ನಲ್ ಮುದಾರೆ ಬೇವ, ಮುದಾರೆ ಪಾಲ್ ಎಡ್ತಿತ್ ಜನ ಕೊಂಡಪೋಪದ್, ತಕ್ಕ- ಬಾಕ್, ತೆಳಿ-ಕಳಿ ಇದೆಲ್ಲ ಈ ಬುಕ್ಕರ ಮೊಳಿಕಾರ ಶ್ರೀ ಚೆಕ್ಕೇರ ಅಪ್ಪಯ್ಯಂಡ ಅಪ್ಪ ಚೆಕ್ಕೇರ ಕಾರ್ಯಪ್ಪಜ್ಜಂಗ್ ಎರ ಕುಸಿ. ಈ ಅಪ್ಪಯ್ಯಂಡ ಅಪ್ಪ ಕಾರ್ಯಪ್ಪಜ್ಜ ತಡಿಲೂ, ಕೊಂಬ ಮೀಸೆಲೂ ಬಾರಿ ಪೆದ ಪೋನ ಆಳ್. ಮೀಸೆ ಕಾರ್ಯಪ್ಪಂದ್ ಅಡ್ಡ ಪೆದ. ಅಜ್ಜಂಗ್ ಅಕ್ಕ ಸ್ವಂತ ನಾಲ್ ಗಾಡಿಯಿಂಜತ್. ಅಜ್ಜನು ನೆಲ್ಲರ ವ್ಯಾಪಾರ ಮಾಡ್ಯಂಡಿಂಜತ್. ಇಕ್ಕ ಮೂಡ್ಸೀಮೆಕಾರ ಕೊಡಗಲ್ ತೋಟ ಬೇಲ್ ಪಣಿಕ್ ಬಪ್ಪ. ಆ ಕಾಲತ್ ಮೂಡ್ಸೀಮೆಂಜ

ಜನ ತಾಂಡಲ್ಲಿ ಬೊಳಂದಾನ ವ್ಯಾಪಾರಕ್ಕಾಯ್ ಕೊಡಗ್ ಕೊಂಡ ಬಪ್ಪಯಿಂಜತ್. ಇಕ್ಕತ ಎಡೆ ವಯಸ್ಸ ಜನಕ್ ಇದೆಲ್ಲ ಗೊತ್ತಲೆ. ಇಕ್ಕತಾರ ಸ್ಥಿತಿರನ್ನನೆ ಅಕ್ಕ ಕಾಪಿರ ಕೊಡಗಲ್ಲ. ಪಚ್ಚೆ ಬೊಳೆ ತುಂಬ್ನ ಪಚ್ಚೆನಾಡ್, ನೆಲ್ಲ್ ಎಲ್ಲಾಂಗೂ ಆಧಾರ.

ಕಾರ್ಯಪ್ಪಜ್ಜಂಡ ಅನುಕೂಲ, ಮಣ್ಣ್ ಮನಸ್ಸನ ಅಳಾಕ್ತಕ್ಕ ಪೊಣ್ಣ್, ಕಳ್ಳಿಚಂಡ ವಕ್ಕತಿಂಜ ಚೀತವ್ವ ಎಣ್ಣವ ಕನ್ನಿ ಚೆಕ್ಕೇರ ಕಾರ್ಯಪ್ಪಂಡ ಕೈ ಪುಡಿಚತ್. ಈ ದಂಪತಿಯಕ್ ಏಳ್ ಮಕ್ಕ. ಅದಲ್ ನಾಲ್ ಆಮಕ್ಕ, ಮೂಂದ್ ಪೊಮ್ಮಕ್ಕ, ಪೊಮ್ಮಕ್ಕಡಾತ್ ಪೆರಿಯವಳ ಬಿಟ್ಟಂಗಾಲ ಕುಪ್ಪಂಡಲ್ಲಿಕ್ಕೊಂದ್ ಬೇಟೋಳಿ ಪಟ್ಟಡಲ್ಲಿಕ್ಕೊಂದ್, ತಾವಳಗೆರಿ ಮಚ್ಚಮಾಡಲ್ಲಿಕ್ಕೊಂದ್, ಆಮಕ್ಕತ್ ಪೆರಿಯಂವ, ಅಪ್ಪಯ್ಯ ಪಿಂಞ ನಾಚಪ್ಪ, ಸೋಮವಯ್ಯ ಸುಬ್ಬಯ್ಯ, ನಾಚಪ್ಪ ಸುಬ್ಬಯ್ಯ ಬದ್ಕಿತ್ತುಂಡ್. ಎಳೆಯಂವ ಸುಬ್ಬಯ್ಯ ಡಿವೈವಸ್ಪಿ. ಪೆನ್‌ಷನ್ ಆಯ್ತುಂಡ್, ಕೊಂಬಮೀಸೆ ಅಪ್ಪ ಕಾರ್ಯಪ್ಪಂಡನ್ನನೆ. ಎಳೆಯ ಮೋಂವನೂ ಮೀಸೆಲೂ, ವಯಸ್ 80 ಲೂ ಎಲಂಗಿಯಂಡುಂಡ್.

ಕಾರ್ಯಪ್ಪಜ್ಜಂಗ್ ಕೊಟ್ಟಾದುಂಬ ಅತ್ತಳ ಚಾಕುವದಲ್ಲತೆ, ಬೋಟೆರ ಪುಚ್ಚಿ ಏರ ಇಂಜತ್. ಅನ್ನನೆ ಮನೆಲ್ ನಾಲ್ ತೋಕ್ ಒಬ್ಬಂಗೇ ಇಂಜ ಕಾಲ. ಆಳಾಕಾಳ್, ಮಕ್ಕಮರಿ, ಗೂಡೆಲ್ ನೆಲ್ಲ್, ಅತ್ತ ಕಡ್ಚಿ ಪೆರ್ತ್ ಚಂದೋಳತ ಪಗ ಯಿರ್ಲ್ ಉರ್ಂಡಿಯಂಡಿಂಜತ್. ಬೆಂದು ಚಾಚೆ, ಪುಟ್ಟ್ ಪೋಳಿಯಕ್ ಬರಯಿಲ್ಲೆ. ಕಾರ್ಯಪ್ಪಜ್ಜಂಡ ಅಪ್ಪ ಅಪ್ಪಣ್ಣಜ್ಜಂಡ ದರ್ಬಾರಲ್ ಬೋಟೆ, ಕಾಡೆರ್ಚಿ, ನಮ್ಮೆ ನಾಳ್, ಉಯ್ಯೋ ನೆಮ್ಮದಿರ ಆನಾಳ್ಲ್. ಅಂಜಿಗೇರಿ ನಾಡ್ ಕೋಣಗೇರಿ ಗ್ರಾಮತ್ ಶ್ರೀ ಕಾರ್ಯಪ್ಪ ಚೀತವ್ವ ದಂಪತಿಯಕ್ ಆದ್ಯ (ಒಂದನೇ)

ಕುಂಞಿಯಾಯ್ತ್ ಜೂನ್ ತಿಂಗ 24 ಇಸವಿ 1911ಲ್ ಚೆಕ್‌ಕೇರ ಅಪ್ಪಯ್ಯ ಪುಟ್ಚಿ. ಕೊಟ್ಚದುಂಬ್‌ನ ಅತ್ತಕಡ್‌ಚಿಯ, ಮನೆಲ್ ಪಾಲ್, ಮೋರ್ ತುಂಬಿ ತೂಚ್‌ವಲ್ಲಿ, ಬಲ್ಯ ಮನೆರ ಬಾಡೆಲ್ ದಿನಕಯಿಂಜಿ ಕಳಿಲ್ ತೆಳಿಲ್ ಪರಂದಂಡ್ ಎದ್ ಬುದ್ದಂಡ್ ಮೊಕ್ಕನ ನೆಲತ್‌ಲ್ ಆಟ್‌ನ ಉಚ್ಚೆನ ಮೊಕ್ಕಿ ತಟ್ಟಿ ಪಾರಿಚಿಟ್ಚ್, ಬೊಳ್‌ತ ಮೂಡ್‌ಕ್ ಮೇಲ್‌ಕ್ ಮಸಿ ಮಾಡಿಯಂಡ್ ಓಡಿ ಕಳಿಪ ಕುಂಞಿನ ಕಾಂಬಕ ಬಲ್ಯ ಆಳ್ ಕೊಂಬ ಮೀಸೆ ಅಜ್ಜಂಗ್ ಕುಸಿಯೋ ಕುಸಿ. ಮನೆದುಂಬ ಆಳ್‌ಕಾಳ್. ಆಳ್ (ಪಣಿಯ ಎರವ) ವಡ ಕೂಟ್‌ಲ್ ಮುತ್ತ ಎಣ್ಣೆವಂವ ಬಲ್ಯ ಮುಕ್ರಿ. ಕಾರ್ಯಪಜ್ಜಂಡ ಕೂಡೆ ಬಲತ್ ಕೈ ಪೋಲೆ ಇಂಜಂವ. ಕಾಡ್‌ಲ್ ಬೋಟೆಕ್, ಬೊಡಿಕೂ, ನೆಂಬಿತ್ ನಡಪಕೂ ಎಲ್ಲತ್‌ಲೂ ಮುಂದಿಂಜ ಮುತ್ತ, ಅಜ್ಜಂಡ ಕೂಟ್‌ಕಾರ, ಗಾಡಿ ಆಟಿಯಂಡ್ ಗೋಣಿಕೊಪ್ಪ ಚತ್ತೆಕ್ ಪೋಪದಲ್ಲತೆ, ಮುಂಬಲ್ ಕುಂಞಿ ಅಪ್ಪಯ್ಯನ ಹುದಿಕೇರಿ ಮಿಡ್‌ಸ್ಕೂಲ್‌ಕ್ 8ನೇ ಕ್ಲಾಸ್‌ಕೆತ್ತನೆಯೂ ನಿಪ್ಪಾಲಳ್‌ಪಿಚಿಟ್ಟಂಡ್ ಕೂಟಿಯ ಪೋನದಲ್ಲತೆ, 7,8ನೇ ಕ್ಲಾಸ್ ಓದುವಂವನ ಬಲ್ಯ ಆಡ್ (ಟಗರ್-ಎತ್ತರ ಕೂಟ್‌ಲ್ ಗೂಳಿ ಇಂಜನ್ನನೆ) ರ ಬೆನ್ನಲ್ ಅಳತಂಡ್ ಅಪ್ಪಯ್ಯ ಸ್ಕೂಲ್‌ಕ್ ಪೋಪಯಿಂಜಾನ, ಇಂದಿಕ್ಕ ಅಪ್ಪಯ್ಯಂಡ ಪೆರಿಯ ಮೋಂವನಾನ (ತ್ಯಾಗರಾಜಂಗ್) ನಾಕ್ ಎಚ್ಚೆಕೊ ಕುರಿ ತಮಾಸಿರ ವಿಷಯತ್ ಎಣ್ಣೆವಯಿಂಜದ್ ಚಾಯೋಡೆ ನಾಕ್ ಗೇನ ಉಂಡ್. ಪಣಿಯ ಮುತ್ತ ಮಾತ್ರ ಆ ಟಗರ್‌ನ (ಆಡ್) ಬಗ್ಗಿಚಿಡ್‌ವಯಿಂಜಿಯಲೊ. ಅಪ್ಪಯ್ಯಂಡ ಅಪ್ಪ ಗಟಾನುಗಟಿ ಕಾರ್ಯಪಜ್ಜಂಗೂ ಪಕ್ಕ ಪೋಪ ಧೈರ್ಯ ಇಂಜಿಲೆಲೊ, ಆಂಡ ಕಣ್ಣ್, ಕೊಂಬ್ ನೋಟ್‌ವಕ್ ಪೋಡಿ ಆಪಯಿಂಜತ್ತಲೊ, 8ನೇ ಕ್ಲಾಸ್‌ಲ್ ಓದಿಯಂಡಿಪ್ಪಕ ಅಪ್ಪಯ್ಯಂಡ ಕಾಲ್ ಟಗರ್‌ರ ಬೆನ್ನಂಜ ನೆಲಕ್ ಮುಟ್ಚವಯಿಂಜಾಂಗ್ ಬಯ್ಯ ಅಪ್ಪಯ್ಯನೇ ನಡಂದ್ ಪೋಪಕ್ ಸುರು

ಮಾಡ್‌ಚಿಲೋ. ಅಪ್ಪಯ್ಯಂಡ ಅಪ್ಪ ಕಾರ್ಯಪ್ಪಜ್ಜಿಂಗ್ ಅಪ್ಪಯ್ಯನಲ್ಲತೆ ಮೂಂದ್ ಕ್ಕಣ್ಣಿಂಗಲು ಮೂಂದ್ ಮೂಡಿ ಮಕ್ಕಳು, ಚೀತವ್ವಂಡ ಪಾಲ್ ಕುಡಿಚಿತ್ ಬೊಳಂದವು. ಪೆರಿಯಂವ ಅಪ್ಪಯ್ಯಂಗ್ 12 ವಯಸ್ಸು, 6ನೇ ಕ್ಲಾಸ್‌ಲೇ ಅಪ್ಪಯ್ಯಂಗೊತ್ತ ಒರ್ ಸಿನೇತಕಾರ, ಮುಹದೇವಡ ದೇವಸ್ಥಾನತರ ಪಕ್ಕ ಆಸ್ತಿ ಮನೆಯಾಯಿ ಇಂಜ ಮುಕ್ಕಾಟಿ, (ದೇವಕ್ ಬೊಳಚ ಪುಡಿಪವು) ರಾಮಕೃಷ್ಣಯ್ಯ, ಇವು ದಂಡಾಳ್ ಅಕ್ಕಲೇ ರಾಮಾಯಣ ಮಹಾಭಾರತ ಕತೆರ ರಾಮಂಡ, ಲಕ್ಷ್ಮಣಂಡ ಅಭಿನಯ ಮಾಡ್‌ವಾತೂ ಪಾಡ್‌ವಾತೂ ನಿಸ್ಸೀಮಂಗ. ಪಂಡ್‌ಕಾಲತ್ ಸಿನೇಮ ಇಂಜಿತಿಲ್ಲ. ಉಂಡೇಂಗ್ಲೂ ಬಲ್ಯ ಪಟ್ಟಣತ್ ಮಾತ್ರ. ಹಳ್ಳಿಲ್ ಸಾಧ್ಯವೇ ಇಲ್ಲ. ಅಕ್ಕ ಕಂಪನಿ ನಾಟಕಕಾರಡ ಕಾಲ. ನಾಟಕ ಇರ್ಪು ಜಾತ್ರೇಲ್ ವಿಶೇಷ ಜನ ಸಮೂಹತ್ ಆಪಯಿಂಜತ್. ಇದ್‌ನ ಅರಿಂಜಂಡ ಅಪ್ಪಯ್ಯನು ರಾಮಕೃಷ್ಣಯ್ಯನು ಇರ್ಪುಕ್ ಜಾತ್ರೇಕ್ ಪೋಂಡುವೇಂಗಿ ಬೇಲ್‌ಕ್ 24 ಕುಕ್ಕೆ ಚಾಣ ಇಡ್‌ವಂಜಿ, (ಕಾರ್ಯಪ್ಪಜ್ಜಿಂಡ ಒಪ್ಪಿಗೇರನ್ನನೆ) ನಾಟಕಕ್ಕಾಯ್ತು 22 ಮೈಲ್ ನಡಂದ್ ಪೋನವು. ಇರ್ಪು ಜಾತ್ರೇಕ್ ಪೋಪಕ್ ಮೋಂವ ಅಪ್ಪಯ್ಯ ಬೇಲ್ ಚಾಣ 24 ಬಟ್ಟಿ ಇಟ್ಟಾಂಗ್ ಕಾರ್ಯಪ್ಪಜ್ಜಿ ಕುಕ್ಕೆಕ್ ಒರ್ ಕಾಸ್ (ತೂತ್‌ಯಿಂಜದ್) ಪ್ರಕಾರ 24 ತೂತ್‌ಕಾಸ್ ಎಣ್ಣಿಕ್ ಒರ್ ಆಣ್‌ಕ್ ನಾಲ್‌ಕಾಸ್‌ರನ್ನನೆ ಆರ್ ಆಣ ಜೋಬ್‌ಲಾಟ್ಟಿಂಡ್ ನಾಟಕತರ ಆಶೇಲ್ ಪೋನವು. ಅಪ್ಪಯ್ಯ ಜಾತ್ರೇಲ್ ದುಡ್ಡ್ ಕಳಿ ಕಾಂಬಂಜಿ ರಾಮಕೃಷ್ಣಯ್ಯಂಗ್ (ಸಿನೇತ್‌ಕಾರ) ಎಣ್ಣಿಚಿಲೋ. ಕಳ್ಳಿಕ್ ಗುರಿಯಿಟ್ಟ್ ಚೆಂಡ್ ಕನಿಚಕ ಚೆಂಡ್ ಒಮ್ಮ ಬುದ್ಧಕ 2 ಕಾಸ್, ಬೂವತೆ ಪೋನಕವೂ ಕಾಸ್ ಕೆಟ್ಟಿಂಡು ಎಣ್ಣಿತ್ 12 ವಯಸ್ಸರ ಬಾಲ 12 ಕನಿ ಚೆಂಡ್‌ನ ಕನ್‌ಚಿ ಕಳ್ಳಿಕ್ ಬೂವತೆ, ಇಂಜ ಆರ್ ಆಣತ್ ಮೂಂದಾಣ ಕಳಂದಂಡ್ ಆ ತಿಂಡಿ ಈ ತಿಂಡಿ, ಆ ಪಾನಕ, ಶರಬತ್ತೇಂದ್

ಕಂಡಿತೂ ಕಾಣತನ್ನನೇ ಇಂಜಂಡ್ ಬಾಯಿನೀರ್ ಕುಡಿಚಂಡ್ ದೇವಸ್ಥಾನತರ ಮಜ್ಜಣ ಪಾಯಸ ಉಂಡಂಡ್ ನಾಟಕತರ ಆಸೆಲ್ ಬೈಟಾಕಣೆ ಇಪ್ಪಂಜಿ, ದಂಡಾಳೂ ಇಂಜ ಮೂಂದಾಣತ್ ನಾಟಕ ನೋಟಿಯಲೊ. ನಾಟಕತ್ ಲೆಗ್ ಹಾರ್ಮೋನಿಯಂರ ಸದ್‌ಕ್ ಶರಬತ್ತ ಕೈಬು, ಜಾತ್ರರ ಪುಟ್ಟೆಲ್ಲ ಮರಪ್ಪಂಜಿ, ದೇವಲೋಕತ್ ಅಪ್ಪಯ್ಯ ತೇಲಿ ಪೋಚಿಲೊ. ಹಾರ್ಮೋನಿಯಂ ಕೊಟ್ಟಿತುಂಡೇಂಗಿ ಕೂಳ್ ನೀರ್ ಬೋಂಡಿಂಜಿಲೇಂದ್ ಅಪ್ಪಯ್ಯಂಗ್ ಮನಕ್ ತೋಂದ್ ಬಪ್ಪಯಿಂಜಾನ ಎಣ್ಣುವಂಜತ್. ಪುಟ್ಟಾವಕ್ಕಲೇ ಸಂಗೀತತರ ಸಂಸ್ಕಾರ (ಅದೊಂಡ ಕುರು ಮೊಳತ್ ಪೋಯಿಂಜಿಂಜತ್) ಅಪ್ಪಯ್ಯಂಡಲ್ಲಿ ಇಂಜತ್. ಅದೇ ಮಾದರಿ ಒಕ್ಕ ಪಣಿ ಕಯಿಂಜಿತ್ ಬೇನಿರ ಕಾಲತ್ ಹುದಿಕೇರಿ ಹೈಸ್ಕೂಲ್ ಪರಂಬ್‌ಲೂ ಕಂಪನಿ ನಾಟಕ ಟೆಂಟ್ ಕೆಟ್ಟುವಯಿಂಜತ್. (ಇಕ್ಕಲೂ ಕಾಲ ದಂಡಾಂಗ್ ನಾಲಂಗ್ ಬಪ್ಪದುಂಡ್) ಅಲ್ಲಿಯೂ ಮನೆಲ್ ಕೆಲಸ ಮಾಡಿತ್ ಅಪ್ಪಯ್ಯಂಡ ಅಪ್ಪ ಕಾರ್ಯಪ್ಪಜ್ಜಂಡ ಕೈಲ್ ದಂಡಾಣ ಮೂಂದಾಣಾಂದ್ ಕೇಟಂಡ್ ನಾಟಕ ನೋಟ್‌ವಯಿಂಜತ್. ಕಾರ್ಯಪ್ಪಜ್ಜ ಬಾರಿ ಕಡಪ ಆನಾಂಗ್ ಮೋಂವ ಅಪ್ಪಯ್ಯನ ಆಳವಡ ಕೂಡ ಪಣಿಕೂ ಕೂಡ್ ಎಣ್ಣು ಇಂಜತ್. ಸ್ಕೂಲ್ ಮಾಸ್ಟರ್ ಪಿಂಞ ಹೆಡ್ ಮಾಸ್ಟರ್. ಗೋವಿಂದಯ್ಯಂಗ್ ಅಪ್ಪಯ್ಯನೊ ರಾಮಕೃಷ್ಣನೋ ಬಾರಿ ಇಷ್ಟ. ಸ್ಕೂಲ್‌ರ ಏದೇ ಕಾರ್ಯಕ್ರಮತಲೂ ಇವು ದಂಡಾಳೊರ ಪಾಟ್ ಅಭಿನಯ ಇಲ್ಲತಿಲ್ಲೆ. ನಟನೆಲೂ ಪಾಟ್‌ಲೂ ಅಪ್ಪಯ್ಯನೆ ಒರ್ ಮೊಟ್ಟ್ ಮಿಂಞ, ಇದೊಂಡ ಮದ್ಯ ಅಪ್ಪಯ್ಯ 6ನೇ ಕ್ಲಾಸ್ ಓದಿಯಂಡಿಪ್ಪಕ ಅಪ್ಪ ಕಾರ್ಯಪ್ಪಜ್ಜಂಡ ಕೈಕ್ ಒರ್ ಹಾರ್ಮೋನಿಯಂ ಬಾತ್. ಅಕ್ಕ 10 ಉರ್‌ಪಿಯ ಕ್ರಯ, ನಡಿಕೇರಿ ಕೋಳೆರ ಅಚ್ಚಯ್ಯ ಅಜ್ಜಂಡ ಅಪ್ಪ ಎಡ್‌ತದ್. ಮೋಂವ ಅಚ್ಚಯ್ಯ ಕಾರ್ಯಪ್ಪಜ್ಜಂಗ್ ಕೊಡ್‌ತದ್. ಅದಂಗ್ ಒರ್ ಪೊಟ್ಟಿ ಮಾಡಿತ್ ಬೀಗ

ಇಟ್ಟಿತ್ ಅಪ್ಪಯ್ಯಂಡ ಅಪ್ಪ ಬದ್ರತ್‌ಲೆ ಬೆಚ್ಚತ್. ಕಾರ್ಯಪ್ಪಜ್ಜಂಗ್ ಒರ್ ಅಕ್ಷರವೂ ಗೊತ್ತಲೆ. ಆಚೆಂಗೂ ಬೈಟಾಪಕ ಬೋಂಡಿಯ ಬೊಳ್ಳೆಕಳ್ಳಾರ ದಾವು ನೀಕಿತ್ ಅಜ್ಜ (ಬಲ್ಯ ಬಾಡೆಲ್ ಅಳಾತಂಡ್ ಮಕ್ಕಡ ಬಾಯಿಪಾಠ, ನೆಲ್ಲಕ್ಕಿಲ್ ಸ್ತೋತ್ರ ಎಲ್ಲ ಆನ ಪಿಂಞ) ಪೊಟ್ಟಿಂಜ ಹಾರ್ಮೋನಿಯಂ ಎಡ್‌ತಿತ್ ನುಡಿಸುವ. ಒರ್ ಪಾಟೂ ಸಂಗೀತವೂ ಇಲ್ಲೆ. ಬರಿ ಎಂತೆಂತೂ ಸದ್ದ್. ಅಜ್ಜಂಡ ನಿತ್ಯತಾರ ಒರ್ ಕೆಲಸ. ಆ ಸದ್ದಲ್ ಕಾರ್ಯಪ್ಪಜ್ಜ ಕುಸಿ ಪಟ್ಟವ. ಏದೂ ಮಕ್ಕಳೊ ಮುಟ್ವಾವಕ್ ಬುಡತೆ ಬೀಗ ಇಟ್ಟಿತ್ ಹಾರ್ಮೋನಿಯಂನ ಬೆಪ್ಪ. ಇದೆಲ್ಲ ನಾದ, ನಾಟಕ, ಅಭಿನಯ, ಇದೇ ಗುಂಗಲ್ ಅಪ್ಪಯ್ಯ ಬೊಳಂದಂಡಿಪ್ಪಕ, ನೆಲ್ಲ ವ್ಯಾಪಾರಿ ಚೆಕ್ಕೇರ ಮಾಚಯ್ಯಂಗ್ ದಂಡ್ ಲಾರಿ ಇಂಜತ್. ಮಾಚಯ್ಯ ಅಯಿಂಗಡ ಮನೆ ತಿತಿಮತಿ. ಅಯಿಂಡ ಅಣ್ಣಂಡ ಮನೆ ಕೋಣಗೇರಿ ಹುದಿಕೇರಿ. ಈ ದಂಡ್ ಸೋದರಂಗಳು ಅಕ್ಕ ನೆಲ್ಲ ವ್ಯಾಪಾರಿಯ, ಇವು ದಂಡಾಳ್ ಲಾರಿಲ್ ಪೋಯ್ತ ಮೈಸೂರ್‌ಲ್ ಒರ್ ನೆಲ್ಲ ವ್ಯಾಪಾರ ಸಾವುಕಾರಂಗ್ ಕೊಡ್‌ಪೊ, ಪಣ ಕೇಟವೊ ಇದ್ ಪೆರ್ತ್ ನಂಬಿಕೆಲ್ ಪೆರ್ತ್ ಕಾಲತಿಂಜ ನಡಂದಂಡಿಂಜತ್. ಅಕ್ಕ ಮೈಸೂರ್‌ರ ಸಾವುಕಾರ ಈ ದಂಡ್ ಸೋದರಂಗ ಅಣ್ಣಯ್ಯನೊ ಮಾಚಯ್ಯನೊ ಕೊದಿಚಿತ್ ಅದೇ ಲಾರಿಲ್ ಕೋಣಗೇರಿ ಹುದಿಕೇರಿಕ್ ಬಂದಿತ್ ಚೆಕ್ಕೇರ ವಕ್ಕತ ಮುಖ್ಯಪಟ್ಟ ಜನಡ ಕೂಡ ಸ್ನೇಹಚಾರ ಇಂಜತ್. ಅದಲ್ ಏರ ಸ್ನೇಹ ಅಪ್ಪಯ್ಯಂಡ ಅಪ್ಪ ಕಾರ್ಯಪ್ಪಂಡ ಕೂಡೆ. ಇನ್ನನೆ ಬಂದಂಡಿಪ್ಪಕ 10,12 ಬಯತಾರ ಅಪ್ಪಯ್ಯನ ಚಾಯೋಡೆ ಕಂಡಿತ್ ಗೊತ್ತಿಂಜತ್.

ಕೆರೆ ದುಂಬಿ ಒಕ್ಕಂಡುವೇಂಗಿ ಏರ ಮಳೆಗಾಲ ಬೋಂಡು. ಇಲ್ಲೆ, ಭೂಮಿರಡಿಂಜೆ ಜಲ ಕಣ್ಣ್ ಬೋಂಡು. ಅಕ್ಕ ಕೆರೆ ದುಂಬಿ ಒಕ್ಕುವ. ಚೆರ್‌ಪೆರ್ತ್‌ಲ್ ಏದೋ ಬಲ್ಯ ಆಸೆ ಅಪ್ಪಯ್ಯಂಡ ಮನತ್ ಕೆರೆಲ್ ನಿಂದ

ನೀರ್ ಬೇನಿಲ್ ಇಂಗುವನ್ನನೆ ಇಂಗುವ ಕೂಡ್ಚಿ. ಇರ್ಲ್ ಪೊವ್ಲ್ ನಾಟಕ ಸಂಗೀತ, ಆ ನಾದತ್‌ರ ಪುಚ್ಚಿ 13 ಬಯತ್‌ಲ್ ಎದೆಲ್ ಗೇನ ಬಂದ್ ಏರ ಸಂಗೀತತ್‌ರ ದಾವು ಕೇರಿ ಬಪ್ಪ ಕೂಡ್ಚಿ. ತಣಿವ ಬಟ್ಟೆ ಕೊಟ್ಟೆ ಅದಿ ಆನ ಕೊರಗಲ್ ಒನ್ನಂದ್ ಉತ್ತಂಡಿಂಜ ಪೋರಿ ಸರಿಕ್ ನಡಕತ್ತಾಂಗ್ ಕೈವಚ್ಚಕ್ ಪೊಜ್ಜತ್ ಅಪ್ಪಯ್ಯ. ಪಣಿಯ ಮುತ್ತನು ಕೂಟಾಳುವಳೂ ಮಿಂಞ ಬಯ್ಯಲೂ ಇಂಜಿತೂ ಬಂದ ಚೆಡಿಲೂ ಮನತ್ ಕೊದಿಪ ಇಂಞೋರ್ ಆಸೆ ಸಂಗೀತ ಪಡಿಪದ್, ಪೊಗೆ ತಿತ್ತ್ ಆಯಿ ಮನಸ್ಸಲ್ ಎದ್ ಪೋರಿರ ಬೆನ್ನಕ್ ಚೆಡಿಲೂ ಮೊರೆಲೂ ಕೂತ್‌ಟ್ಟಂಡ್ ಕಡಿಚಿತ್, ಮನೆಂಜ ಅಪ್ಪ ಕಾರ್ಯಪ್ಪ ಬಪ್ಪಾಂಡ ಒಳ್‌ಲ್ ಬೇಲ್‌ಂಜ ಪಕ್ಕ ಬೇಗೂರ್ ಕೊಲ್ಲಿ (ಹುದಿಕೇರಿ ನಡಿಕೇರಿರ ಮಧ್ಯ ಬಲ್ಯ ಬೇಕೋವ್) ರಸ್ತೆಕ್ ಇಟ್ಟ ಬಟ್ಟೆಲೇ ಮನೆ ಮಟ ತಿರಿತ್ ನೋಟತೆ ಬಂಡ್ ಒಣಂಗ್‌ನ ಕಾಲಕ್ಕೇಲೇ ಪೊನ್ನಂಪೇಟೆಕೆತ್ತನೆ ಆ ಕಾಲತ್ ಎಣ್ಣಕ 1923ನೇ ಇಸವಿಲ್, ಅಂದಾಜ್ 11 ಗಂಟೆರ ನೇರಕೆತ್ತನ ಬಾಲ ಅಪ್ಪಯ್ಯಂಡ ಮೂಡಲ್ ಬೇಜಾರತ್ತರ ಅಲೆ ಎದ್ ಕೂಟ್ಟಿಯಿಂಜತ್. ಒಂದ್, ಗಟಾನ್‌ಗಟಿ ಅಪ್ಪ ಕಾರ್ಯಪ್ಪಂಡ ಪೋಡಿ, ದಂಡ್ ಇಟ್ಟಬಟ್ಟೆ ಬಂಡ್ ಒಣಗಿ ತುಳ್ಳದ್, ಮೂಂದ್ ಕೈಲ್ ಪಣಯಿಲ್ಲೆ. ನಾಲ್ ಊರ್‌ಕೇರಿ, ಪೇಟೆ ಒರ್ ವಿಚಾರವೂ ಗೊತ್ತಿಲ್ಲತ 12 ಪರಂದ ಬಾಲ. ಇಕ್ಕತ್ತರನ್ನನೆ ಮೊಟ್ಟ್‌ಕ್ಕೋರ್ ಅಂಗಡಿ, ವಲಸೆ ಬಂದ ಜನ, ಸದ್, ಜಿಡ್, ಕಾಟ ಕಚಡ, ಪೆರ್ತ್ ಊರ್ ವಾತಾವರಣ 1923ಲ್ ಖಂಡಿತ ಇಲ್ಲೆ. ಎಲೆಕ್ಟ್ರಿಕ್ ಲೈಟೆಯಿಲ್ಲೆ. ರಸ್ತೆಲ್ ಕಂಬ ಇಲ್ಲೆ. ರೋಡ್ ಪಕ್ಕತ್ ಕೊಡವ ಸಮಾಜ ಇಲ್ಲೆ, ಚಾಯಿ ಚಾಯಿ ಅಂಗಡಿ ಇಲ್ಲೆ, ಗೋಲ್ಡನ್ ಗೇಟ್ ಹೊಟೆಲ್‌ರನ್ನತ ಹೊಟೆಲ್ ಇಲ್ಲೆ. ಬರೀ ಅಲ್ಲಿ ಇಲ್ಲಿ ಟೌನ್‌ವಾಸಿಯ ನಾಲಂಜಿ ಜನ, ಪೊಲಾಕ ಪೋನ ಒಂದ್ ದಂಡ್ ಬಸ್ಸ್ ಅಲ್ಲತೆ, ಕಾರ್ ಜೀಪ್, ಆಟೋತ್‌ರ ಕಾಲ ಅಂದಲ್ಲ. ಬರಿ

ಇರ್‌ಟ್ ಗೂಡ್‌ರ ನಾಡ್, ವರತಿತುಳ್ಳ ಕಾಡ್, ಆ ಬರಿ ಈ ಬರಿಲ್ ಅತ್ತ
 ಮೇಪ ಪರಂಬ್‌ಂಜ ದೂರದೂರತ್‌ಂಜ ಅತ್ತಡ ಬೋಳೆಲ್ ಕೊಡಕೆ
 ಸದ್ ಒಂದೇ, ಇಲ್ಲೇಂಗಿ ನಾಡ್‌ಂಜ ಪೇಟೆ ಚತ್ತೆ ಗೋಣಿಕೊಪ್ಪಕ್ ಪೊರಟ
 ಎದೆಂಗೊರ್ ಕಾಡ್ ಒಳ ಬಟ್ಟೆಲ್ ಗಾಡಿರ ಕಡಾಣಿ ಸದ್ ಗೆಜ್ಜೆರ ಕಾಲ.
 ಕಾಡ್ ನಾಡ್‌ರ ಮಧ್ಯೆ, ಬೇಲ್ ಪಡ್‌ರ ಬರಿ ಬರಿಯ ಪೊಲಾಕತ್‌ರ ಮೀರ
 ಬೊಳ್ಳೆ ಕಳ್ಳ ಕುಡ್‌ಚಿ ಬಂಬಂಗಳೂ ಮೋಲಿಯಳೂ ಕೂಡ್ ಮಾಳತ್
 ಪೊಗೆ ಬುಟ್ಟುಂಡ್ ಕೊಡಿಯಲೆ ಪೇತಪು ಎರಕಿಯಂಡ್ ತುಪ್ಪಿಯಂಡ್
 ಕೆಮ್ಮಿಯಂಡ್, ಗುರು ಗುರು ತಕ್ಕೊರ ಸದ್ ಎಲ್ಲಿಯೇಂಗಿ ತಪ್ಪಿ ತವುರಿ
 ಕೇಪ ಅಚ್ಚಿಕೆ. ಆ ಬ್ರಿಟೀಷ್‌ರ ಕಾಲತ್ ತಾರ್‌ಟ್ಟಿ 9 ಅಡಿರ ಗಾಡಿ ಬಟ್ಟೆರನ್ನತ
 ರೋಡ್, ಕುಡ್‌ಕಾನ ಇರ್‌ಂಬ್‌ರ ಸೇತುವೆ ಇದೆಲ್ಲ ದಾಟಂಡಿಯ ಅಂದೇತ
 ಆ ಕಾಲ ಇಕ್ಕತನ್ನನೆ 15, 20 ಅಡಿರ ರೋಡಲ್ಲ. ಕಾಡ್‌ಮಾಳ ಆಯ್ತ,
 ಇಕ್ಕತ ಬೊಳಿ ಅಲ್ಲ. ಮಾರ್‌ಕ್ಕೋರ್ ಪುಂಡ! ಪಗ ನೇರತ್‌ಲೇ ಗಾಳಿಕ್
 ನೆರಿ ಪಿರಿಂಜಿ ಪುಂಡ ಪೊಡ ನೆಳಿವಕ ಮಜ್ಜಣ ನೇರತ್ ಪೋಡಿ ಆಪ ಕಾಲ
 ಅದ್. ಮಜ್ಜಣ ಕೈಯಿಂಜಿ ನಾಲ್ ಗಂಟೆಕ್ ಕಾಡ್ ಏರ
 ಪೊಲ್‌ಚಲ್‌ಲಿಂಜಾಂಗ್ 5 ಗಂಟೆರೊಳ್‌ಲ್ ಇರ್‌ಟ್‌ರ ಸನ್ನೆಯ, ಗೂಮ
 ಕೂತ್ ಆ ಕರೆಂಜ ಈ ಕರೆಕ್ ಆರಾಮ್‌ಲ್ ಕೇಪ ಆ ಕಾಲ. ಮಜ್ಜಣ
 ನೇರತ್‌ಲ್ ದಾವಾನಕ ರೋಡ್ ಬರಿ ದಂಡ್ ಬರಿ ನೀರ್ ಕೇಟ್ ಕುಡಿಪಕ್
 ಇಕ್ಕತರನ್ನನೆ ಮನೆ ಮಾಡ್ ಇಲ್ಲತ ಆ ಪೊನ್ನಂಪೇಟೆಂಜ ಗೋಣಿಕೊಪ್ಪ
 ರೋಡ್‌ನ ಪಟ್ಟಣಿಲೂ ಪೋಡಿಲೂ ಜಾಪಿ ಜಾಪಿ ನಡಂದತ್. ವಿಚಿತ್ರವಾನ
 ಸಂಗೀತತ್‌ರ ಆಸೆ. ಅವ ಆಣಾಯ್ತ ಗುರುರಲ್ಲಿಂಜ ಸಂಪಾದನೆ ಮಾಡ್‌ನ
 ಅದ್ಭುತ ಸಂಗೀತ ಅಂದ್. 12 ವಯಸ್ಸಲ್ ಅವ ಕೇಟಿತೂ ಇಂಜಿಲೆ,
 ನೋಟಿತೂ ಇಂಜಿಲೆ. ಆಚೇಂಗ್ಯೂ ಸಂಗೀತ ಸ್ವರತ್‌ರ ಗುಂಗ್ ಆ ಮಜ್ಜಣ
 ನೇರತ್‌ಲ್ ಕೈಲ್ ಜೋಬ್‌ಲ್ ಪಣತ್‌ರ ಬಲ ಇಲ್ಲತೆ, ಮನತ್‌ಲ್

ದಾಡೋ ಪರಿಚಯ ಇಲ್ಲತೆ, ಗುಣತ್ತ್ಲ್ ಶಾರದೆನ ತುದಿಚಂಡ್ ಕೊಡಗ್ ಕೀರ್ತಿ ಕೊಂಡಬಪ್ಪ ಆ ಕೀರ್ತಿ ದೇವತೆಯ 12 ಪರಂದ ಬಾಲನ ಆ ಕಾಲತ್ಲ್ ಒಂಟಿಯಾಯ್ತ್ ಗೋಣಿಕೊಪ್ಪಕೆತ್ತಿಚಿಟ್ಟತ್ ಎಣ್ಣಕ ಎಂದೂ ತಪ್ಪಾಗ.

ಗೋಣಿಕೊಪ್ಪಕ್ ಎತ್ತವಕ ದಾವು ಬಂದಿತಿಂಜ ಅಪ್ಪಯ್ಯ ಒರ್ ಹೊಟೇಲ್ಲ್ ಒರ್ ಗ್ಲಾಸ್ ನೀರ್ ಕುಡಿಚಿತ್ ಪೊರಮೆ ಬಂದ್ ಮೈಸೂರ್ಕ್ ಪೋಪ ರೋಡ್ ಕೇಟರಿಂಜಿ ನಿಂದ್ ಗೇನ ಮಾಡ್ಚಿಲೊ. ಎನ್ನ ಮಾಡ್ಡ್? ಪಡ್ಡೆ ಅಪ್ಪಯ್ಯಂಡ ಮೇಲ್ಲ್ ಬಟ್ಟೆ ಬರಿ ಚಾಯಿಲ್ಲೆಂಗೂ, ನಡಂದ ದಣಿಲೂ ಮನತ್ಲ್ ಅಪ್ಪಂಡ ಪೋಡಿಲೂ, ಉಳ್ಳ ಪರಿಸ್ಥಿತಿಲೂ ಒಂದಾಯ್ತ್ ಚಿಂತೆಕೇರಿತ್ ಮೂಡ್ ಬಾಡಿತುಂಡೆಂಗ್ಯೂ, ಚೆಕ್ಕೇರ ವಂಶತ್ರ್ ಒರ್ ಗನವಾನ, ನೇವಾನ ಕೊಂಬ ಮೀಸೆ ಕಾರ್ಯಪ್ಪಂಡ ಮೂತ ಮೋಂವ, ಅಪ್ಪಯ್ಯಂಡ ಮೂಡ್ಲ್, ಕಳ್ಳಿಚಂಡ ವಕ್ಕತ್ರ್ ಚುಳಿ ಆನ ಚೀತೆರ ಪಾಲೂ ಕುಡಿಚಿ ಲಕ್ಷಣವೂ ಗತ್ತ್ ಒತ್ತ್, ಆ ಬಾಡ್ನ ಮೂಡ್ ನಡುಲ್ ಎದ್ದ್ ಒರೋರಮ ಕಾಂಬಯಿಂಜತ್. ಆಡ್ಪಾಲ್, ಪಯ್ಯು ಪಾಲ್ ಕುಡ್ಚಿ, ಮೋರ್ ನೆಯ್ಯಿ ಬೋಟೆಕಾರ ಅಪ್ಪಂಡ ಕಾಡ್ಗಿರಚಿ ಕಲಂದ್ ಉಂಡಂಡಿಂಜ ತಡಿಕ್ ಒಮ್ಮೆ ತಾನಾಯ್ತೇ ಪೆರ್ತ್ ಕಷ್ಟತ್ರ್ ಪರಿಸ್ಥಿತಿ ಮುಂಬಲಾಚಿ. ಆ ಚೆರಿಯ ಮನಕ್ ಭಗವಂತಂಡ ದೃಷ್ಟಿಲ್ ಕುಟ್ಟ್ ಪೊಯ್ತ್ ಸುರು ಆಚಿ. ಜೀಂವ, ಜನ್ಮತ್ಂಜ ಪೋಪಂದ್, ಎಲ್ಲ ತರತ ಸ್ಥಿತಿ ಗತಿನ ಎದುರಿಚಿಟ್ಟಿತ್ ವೈರಾಗ್ಯ ಮನಕ್ ಕೊಟ್ಟಿತ್, ಪ್ರಪಂಚತ್ರ್ ಸ್ಥಿರಯಿಲ್ಲತ ಸುಖಿತಿಂಜಿ ಪೊರಮೆ ಬಂದ್ ಮೋಕ್ಷಕ್ ಪೋಡ್ ಎಣ್ಣವ ಒರ್ ಎಳೆ ಅಪ್ಪಯ್ಯಂಡ ಬದ್ಕಲ್ ಅಂದೇ ನೆಯ್ಯುವಕ್ ಚೂದ್ ಕೆಟ್ಟ್ ಇಟ್ಟಿತ್. ಅದೇ ಮಾದರಿ ಅಂದ್ ಗೇನ ಮಾಡಿ ಅಳತಲ್ಲಿ ಅಪ್ಪ ಕೆಟ್ಟನ ಅರೆನೂಲ್ ಕೊಯ್ತ ನಾಲ್ ಕಣ್ಣ ಕಾಸಾರ ಗೇನ ಬಂದದೇ ಅಲ್ಲಿಯೇ

ರೋಡ್‌ರ ಪಕ್ಕ ಇಳಿಂಜಿ ಇಂಜ ಬಂಡ್ ಚಡ್ಡಿನ ಉತ್ತಿತ್ ಪಯಿಚ ಆತುರತ್ ಅರೆ ನೂಲ್‌ಂಜ ಕಷ್ಟ್‌ಲೇ ಉತ್ತಿತ್ ದಂಡ್ ಕಣ್ಣ ಕಾಸಾನ್ ಎಡ್‌ತಂಡ್ ದಂಡಾನ ಬೆಚ್ಚಿ ಅರೆನೂಲ್ ಭದ್ರ ಮಾಡಿ, ಪಣಿಯ ಮುತ್ತಂಡ ಕೂಡೆ ಎಕ್ಕೊ ಒಮ್ಮೆ ಗಾಡಿಲ್ ಚತ್ತಕ್ ಬಂದ ಗೇನತ್ ಗೋಣಿಕೊಪ್ಪತ್ ಇಕ್ಕ ಉಳ್ಳ ಬಸ್‌ಸ್ವಾಂಡ್‌ರ ಬಲತ ಬರಿಲೆ ಗಾಡಿಮಾಳ, ಕುದಾರೆ ಮಾಳ ಉಳ್ಳಲ್ಲಿಕ್ (1923ನೇ ಇಸವಿಲ್) ಪೋಯ್ತ್ ಜೋಬ್ ದುಂಬ ಕಡಲೆ ದುಂಬಿಚಿಟ್ತ್, (ಅಕ್ಕ ಒರ್‌ಕಾಸಾಕ್ ಒರ್ ಸೇರ್ ಅಕ್ಕಿ ಇಂಜ ಕಾಲ) ತಿಂದಂಡ್ ಪಾನಕರಂತ ಕರ್ತ ಕಾಫಿ ಅಲ್ಲಿಯೇ ಕುಡ್‌ಚಿತ್, ಜೀಂವ ಪುಡ್‌ಚಿ ಗೇನ ಮಾಡ್‌ಚಿ. ಸುಮಾರ್ ಮಜ್ಜಣ ನೇರ 3 ಗಂಟೆನ ಕಯಿಚ ಅಪ್ಪಯ್ಯ ಆ ಕಾಲತ್ ಮೂಡ್ ಉಳ್ಳ ಚಿರಿಯ ಲಾರಿಲ್ (3 ton ರ ಇಕ್ಕತದ್ 8, 12 ಟನ್‌ರ) ಮೈಸೂರ್‌ಕ್ ಎಲ್ಲಿಯೊ ವಾರಕೊಮ್ಮೆ ಇಮ್ಮೆ ಸೀಗೆ ಲೋಡ್ ಪೋಪಯಿಂಜತ್. ಅಂದ್ ಇನ್ನನೆ ಒರ್ ಲಾರಿ ಕಂಡಿತ್ ಆ ಡ್ರೈವರ್ ಕ್ಲೀನರ್ ಅಯಿಂಡ ಕಾಲ್‌ಕ್ ಬುದ್ಧ್ ಮೊರಟಿತ್ ಎನ್ನನೆಯೋ ಲೋಡ್‌ಗಾಡಿರ ಚೀಲ ಮದ್ಯ ಬಾಲ ಅಪ್ಪಯ್ಯಂಗ್ ಎಡೆ ಮಾಡಿತ್ ಲಾರಿ ಗೋಣಿಕೊಪ್ಪ ಬುಟ್ಟಿತ್. ಲೋಡ್ ಲಾರಿಕ್ ಇಕ್ಕತ್‌ರನ್ನನೆ ಮಾಮೂಲಿರ Rok call ಇಲ್ಲೆ. ಕಳ್ಳಮಾಲ್ ಇಲ್ಲೆ. ಪೊಲೀಸ್ ಕಾಟ ಇಲ್ಲೆ. ಆರಾಮ್‌ಲ್ ಆನೆ ಚೌಕೂರ್‌ಕೆತ್ತುವಕ ಯಿರ್‌ಟ್ ಪಾರ್ಸ್ವ್ ಪುಂಡ ಮುತ್ತಿಗೆ ಇಡ್‌ವನ್ನನೆ ಕಾಂಬ ಕೂಡಿಚಿಲೊ. ಸುಮಾರ್ ಬೈಟ್ 8.30 ಗಂಟೆ ನೇರಕ್ ಅಪ್ಪಯ್ಯ ಮೈಸೂರ್‌ಕ್ ಎತ್ತ್‌ಚಿ. ಇಂದ್ ನಂಗ ಪೋಪನ್ನನೆ ಅಪ್ಪ ಅವ್ವಂಡ ಕೂಡೆ ಅಲ್ಲ, ಸಿನೇತಂಗಡ ಕೂಡೆ ಮೈಸೂರ್‌ಕೆತ್ತ್‌ನ ಪರಿಸ್ಥಿತಿ ಅಲ್ಲ, ಇಪ್ಪಕ್ ಹೊಟೇಲ್ ರೂಮ್‌ರ ಪರಿಸ್ಥಿತಿ ಅಲ್ಲ. ಐಸ್‌ಕ್ರೀಂ, ಪಾಪ್‌ಕಾರ್ನ್‌ರನ್ನತ ಸ್ಟಾಲ್‌ಲ್ ಅಳ್‌ಪ ಪರಿಸ್ಥಿತಿ ಅಲ್ಲ. ಕುಡಿಪಕ್ ನಳ್ಳಿ ನೀರ್ ಪರಿಯುವ ಜಾಗ ಗೊತ್ತಿಲ್ಲತ ಒರ್ ಜನ್ಮ. ತುಂಬ ಬಲ್ಯ ಮನೆಲ್ ಕಳಿ ತೆಳಿಲ್

ಬೊಳಂದ ಜನ್ಮ ಪ್ರಾಣ ಸಿನೇತಂಡ ಕೂಡೆ ಕಯಿಚ ಜನ್ಮ, ಅಪ್ಪ ಕೋಲೆಡ್‌ಪಕ ಚೀತವ್ವಂಡ ಬೆಂಬರಿಲ್ ಅವ್ವಾ, ಅವ್ವಾಂದ್ ಒಳಿಪ ಇಂಜ ಜನ್ಮಕ್ ಟಗರ್‌ಲ್ ಅಳತ್ ಪಣಿಯ ಮುತ್ತಂಡ ಕೈಲ್ ಕೂಪದಿಕೂಳ್ ಪೊರ್‌ತ್ ಸ್ಕೂಲ್ ಕಂಡ ಜನ್ಮಕ್ ಬೈಟ್ 8.30 ಗಂಟೆಕ್ ಲಾರಿಕಾರ ಒರ್ ಚತ್ರತ್‌ರ ಬರಿಲ್ ಬುಟ್ಟಿತ್ ಪೋಚಿ. ಬಾಂಗಾಡ್, ಬನಕಾಡ್ ಊರ್ ತಿರ್‌ಕೆ, ಮಂದ್, ಮಾನಿ, ಮೆರೆವ ಪಚ್ಚೆಕಾಡ್ ಸಂಪತ್ ಕೊಡಗ್‌ರ ವಾತಾವರಣತ್‌ಂಜಿ ಒಮ್ಮೆ ಅಪ್ಪಯ್ಯ ಅಕ್ಕ ರಾಜಂಡ ದರ್ಬಾರ್‌ರ ಕಾಲ, ಕುದರೆ ಸಾರೋಟ್, ರಾಜಂಡ ಕುದ್ದ ಜರ್ಮನಿಂಜ ಬಂದ ಕಾರ್ ಓಡ್‌ನ ಆ ಮೈಸೂರ್, ದೇವಸ್ಥಾನತ್‌ರನ್ನನೆ ಮೊಟ್ವೊಕ್ಕೋರ್ ಮನೆ, ಪರಂಬ್‌ರನ್ನನೆ ಅಗಲ ಆನ ಪಾರ್ಕ್ ಇಂತ ಮೇಲ್ ನೆಟ್ವಾವ ಪರಿಸ್ಥಿತಿ, ಕಣ್ಣ್‌ಕ್ ಕಾಂಬಕ ಏರ ಕುಸಿ ಆಚೆಂಗಿಯೂ ಎಡಬಲ ದಾರೂ ಇಲ್ಲತೆ ತಬ್ಬಲಿ ಅಪ್ಪಯ್ಯಂಗ್ ರಾಜಂಡ ದರ್ಬಾರ್‌ರ ಮೈಸೂರ್, ಸುಖ ಆ ನೇರತ್ ಕೊಡತ್‌ಲೆ. ಬಯ್ಯಂಜಿ, ಎದ್ದ್ ಬುದ್ದ್, ಒರ್ ಚತ್ರತ್ ಒರ್ ಪುಡಿ ಕೂಳ್‌ಕ್ ದಾಸನಾಯ್ ಪೋಡಿಲೇ ಒಳ್ ನುಗ್ಗಿಚಿ. ಬೊಳಿ ಕೂಟುವ ಮೈಸೂರ್‌ಕ್ ಬೆನ್ನಟ್ವ್ ಅಲ್ಲಿ ನೆಲತ್‌ಲ್ ಒಂದೂ ಇಲ್ಲತ ಚೋತ ಮೇಲ್, ಬೇಲ್ ಬಂಡ್‌ರ ತಂಪುಲಿಂಜ ಕೊಡಿಕ್ ಮೊಟ್ವೊಟ್ಟ ಕಾಲೂ ಚೋತಿತ್ ಬಂಡ ಧೈರ್ಯತೇ ಪೊಲವ ಗೇನತ್‌ಲೇ ಒತ್ತ್ ಕುಂಞಿ ನೊಂಬಲತ್‌ಲೇ ಒರಕ್ ತರಂಜಂಡತ್.

ಇಲ್ಲಿ ಮನೆಲ್ ಪೋನ ಮೋಂವ ಅಲ್ಲಿ ಇಕ್ಕು ಇಲ್ಲಿ ಇಕ್ಕು ಕಳತ್ ಒಳಿಚಿಕ್ಕು ಬಾಣೆ ಕೊಟ್ವೊಲಿಕ್ಕೂಂದ್ ಆಳ್, ಕಾಳ್ ಅವ್ವ-ಅಪ್ಪ ಎಲ್ಲಾ ನೋಟಿ ಕಳಿಚಕೊ ಅಪ್ಪಯ್ಯನ ಕಂಡ್‌ಲೆ. ಕಾರ್ಯಪ್ಪಜ್ಜ ಕೊದಿಲ್ 'ಅಪ್ಪಿ'ಂದ್ ಕಾಕ್ವಂಜಿತ್. ಅನ್ನನೆ ಕೊಂಬ ಮೀಸೆನ ಬಾಡಿಚಿಟ್ಟಂಡ್ ಅಜ್ಜ ಅಪಿಲೆಂದ್ ಕೂತ್ ಇಟ್ಟಿತ್. ಇರ್‌ಟಾಚಿ, ನೆಲಚಿ ಪುಟ್ಟಿತ್ ಬೊಳಿ ಬಾತ್

ಕುಂಞಿ ಬಂದಾಲೆ. ಇದ್ ತಮಾಷಿ ಅಲ್ಲ ಎಂತೊ ಕಾರ್ಯ ನಡಂದ್ ಪೋಚೀಂದ್ ಚೀತವ್ವಂಗ್ ಗೊತ್ತಾಚಿ. ಬೇಜಾರತ್ ಕೋಂಬರೆ ಕಂಡ ಪೆತ್ತವ್ವ ನಡುಬಾಡೆ ನೆಲ್ಲಕ್ಕಿಲ್ ಕುಂಞಿರ ಜೀಂವ ಕಾಪಾಡ್ ಮಾಗುರುವೇಂದ್ ಪರಕೆ ಕೆಟ್ಪಾಚಿ. ಅಂದ್ ಮುಂಬಲ್ಲ್ ಕುಂಞಿ ಅಪ್ಪಿರ ಸದ್ ಸರ ಬಾಡೆಲ್ ಇಲ್ಲತಾಚಿ. ಅವ್ವನೂ ಚೆರ್ ಮಕ್ಕಳ ಕೂಳ್ ಪಾಲ್ ಕೊಡತ್ ವರುವಕ್ ಎಡೆ ಮಾಡಿಚೆಂಗ್ಲೂ ತಮ್ಮ ಕುಂಞಿ ನೇರೆ ತಂಗೆಕುಂಞಿಯ ನಾಚು, ಚೋಮಣಿ, ಬೋಜಿ, ಗಂಗೆ ಎಲ್ಲ ಅಣ್ಣಯ್ಯ ಎಲ್ಲಿಯವ್ವಾ (ಅವ್ವಾ)ಂದ್ ಅವ್ವನ ಬಗ್ಗಿಚಿಟ್ಟಿತೂ, ಬೋಳೆನ ಬಲ್ಚಿ ಕೆಮಿರ ಪಕ್ಕ ಮೂಡ್, ಬಾಯಿನ ಬೆಚ್ಚಿತೂ ಅವ್ವಂಡ ಪೊಡೆಯ ಸೆರಗ್ ನ ಪುಡಿಚಂಡ್ ಅವ್ವಂಡ ಕೂಡೆ ಈಂದ್ ಬುದ್ದಂಡ್ ಕೋಂಬರೆ ಸೇರಿತ್ ಆ ಕಟ್ಪಾಲ್ ಈ ಮೆತ್ತಲ್ ಚಿಮ್ಮಿಯ ಪಚ್ಚಿ ಕಳಿಚಂಡ್ ಕೇಟಂಡೇ ಒರಿಯಂಡತ್. ಕೋಳಿ ಕೂವ ನೇರಕ್ ಕಣ್ಣಮುಚ್ಚಿ ಪೋನ ಅವ್ವಂಗ್ ಕೂಂದ ಕೋಳಿರ ಕೂತ್ ಪೆರಿಯ ಮೋಂವ 'ಅಪ್ಪಿ' ಅಪ್ಪಂಡ ಪೋಡಿಕ್ ಬೆಂಬರ ಕಿಡಿಕೆಕಾಲೆ ಬಂದ್, ಅವ್ವ, ಅವ್ವಂದ್ ಕಾಕ್ ನನ್ನನೆ ಆ ನೇರತ್ ಕೇಟ್, ವ್ರಯಿ ಮೋನೇಂದ್ ನೆಟ್ಟಿತ್ ಪೊರಮೆ ಬಾತ್. ಗುರು ಕಾರೋಣನೊ, ಕುಲದೇವಿನ, ಮಹಾದೇವಳೋ ಗೇನ ಮಾಡಿಯಂಡ್ ಅಡಿಗೇಮನೆ ಪಡಿ ತೊರಂದ್ ನೋಟ್ಚಿ.

ಕೊಂಬಮೀಸೆ ಕಾರ್ಯಪ್ಪಜ್ಜಂಗ್ ಒರ್ ತಮ್ಮಣ ಪೆಮ್ಮಯ್ಯ, ಅಣ್ಣ ಬೋಟೆ, ಮೀಸೆ, ಗಾಡಿ, ಗೋಣಿಕೊಪ್ಪ ಚತ್ತೆ, ಬೊಳ್ಳೆಕಳ್ಳ ತೆಳಿ ಕಳಿಲ್ ನೋಟಾನಂವ ಆಚೆಂಗಿ ತಮ್ಮಣ, ಪೆಮ್ಮಯ್ಯ ಮಹ ಸಾದು. ಮೀಸೆ ಇಲ್ಲತಂವ, ಹರಿದಾಸಂಡ ಪೋಲೆ ಸಾತ್ವಿಕ ತನ. ಕುಂಞಿ ಅಪ್ಪಿನ ಏರ, ಏರ ಕೊದಿ ಪಿಂಜವು. ಅಪ್ಪಿ 10 ವಯಸ್ಸಂಜ 12 ವಯಸ್ಸೆತ್ತನೆ ಅವ್ವಂಡ ಕೈಲ್ ತಿಂದ ಪೊಯ್ತಕ್ ಕಣಕ್ ಕಾರ್ಯವೇ ಇಲ್ಲೆ. ಅಪ್ಪಿ ಮಹಾ ದುಡ್ಡ್,

ಪ್ರಿಯ, ಅಪ್ಪ ಕಾರ್ಯಪ್ಪಂಡ ಪೋಡಿಕ್ ಕೋಟ್ ಜೋಬ್‌ಕ್ ಕೈ ಇಡ್ವೀಂಜ್‌ಲೆ. ಆಚೆಂಗಿ ಒರಾಂಡೆಕ್ಕೂರ್ ಮಕ್ಕ ವಾರೆ ವಾರೆ ಆನಂಗ್ ಎಲ್ಲ ಪಡ್ಡೆಯ ಕೊಟ್ಟನ ಅಕ್ಕತಾರ ತೂತ್ ಕಾಸಾನ, ಆಣತನ ಅಯಿಂಗ ನಂಬಿಗೆ ಉಳ್ಳ ಜಾಗತ್ತಲ್ ಬೆಚ್ಚವ. ಅಯಿಂಗಕ್ ಗೇನ ಬಂದ್ ಕೈ ಇಟ್ವೆನೋಟ್ಟಕ ಅಲ್ಲಿ ಕಾಂಬದಿಲ್ಲೆ. ಇದ್ ಅಣ್ಣಯ್ಯಂಡ ಪಣಿ ಅಲ್ಲತೆ ದಾಡದೂ ಅಲ್ಲಾಂದ್ ಅಪ್ಪ ಕಾರ್ಯಪ್ಪಂಗ್ ಎಕ್ಕಾಲ್ಲೂ ದೂರ್, ಕೇಟ್ ಕೇಟ್ ಚೋತ್ ಅಪ್ಪ ಬೊಳ್ಳೆಕ್ಕಳ್ಳಾರ ಪುಳಿ ಚೋದಾರ ಅಮುಲ್‌ಲ್ ಅಪ್ಪೀಂದ್ ಕಾಕಿ ಬೆಪ್ಪಯಿಂಜತ್ ಪೊಯ್. ಅವ್ವ ಚೀತೆಕೂ ಕೊಂಬ ಮೀಸೆರ ಪಕ್ಕ ಪೋಯವ ಧೈರ್ಯ ಇಲ್ಲೆ. ತಮ್ಮಣ ಪೆಮ್ಮಯ್ಯ, ಅಣ್ಣಾ ನೀನ್ ಮಕ್ಕ ಮರಿ ಇಲ್ಲತ ಪರದೇಸಿ ಆಯಿತುಂಡೆಂಗಿ ನಲ್ಲದಿಂಜತ್. ಇನ್ನನೆ 10 ವಯಸ್ಸಾರ ಕುಂಞಿನ ಪೊಯ್ಯುವಂದ್ ಕಷ್ಟತ್‌ಲ್ 'ಅಪ್ಪಿ'ನ ನರಿರ ಪುಡ್‌ತತಿಂಜ ಕ್ಯಾಮನ ಬುಡ್‌ತನನ್ನನೆ, ಬುಡ್‌ತಿ ತಬ್ಬಿಯಂಡ್ ತಾಂಡ ಕೋಂಬರೆಕ್ ಕೂಟಿಯಪೋಯ್ ಕೂಳ್‌ನೀರ್ ಉಂಬ್‌ಚಿಟ್ ಬುದ್ಧವಿಂಜತ್‌ಲೋ. 'ಅಪ್ಪಿ'ಯೊ ಕಷ್ಟತ್‌ಲ್ ಮಹಾ ನಿಸ್ಸೀಮ. ಕುಪ್ಪಂಡಲ್ಲಿಕ್ ಕೊಡ್‌ತ ಬೋಜಿ ಅಕ್ಕಿ ಕೊಮ್ಮೆಲ್ ಅಕ್ಕಿನ ಮಾಂದಿತ್ ದುಡ್ಡ್ ಡಬ್ಬಿ ಬೆಪ್ಪಾನ ಕಪ್ಪಯಿಂಜತ್‌ಲೊ. ತಂಗೆ ಗಂಗೆ ಪಟ್ಟಡಲ್ಲಿಕ್ ಕೊಡ್‌ತವ ಕಟ್ಟಾರ ಮೆತ್ತೆರಡಿಲ್ ಮಂಡೆ ಬರಿಲ್ ಬೆಚ್ಚವ ತುಣಿ ಕೆಟ್ಟನ ಪಣತ್‌ನೊ ಎಡ್‌ತವಿಂಜತ್‌ಲೊ. ಅಪ್ಪಂಗ್ ನೇರೆ ತಮ್ಮಣ ಕೋಂಬರೆಲ್ ಮುಚ್ಚಿಟ್ಟ ಕೊಕ್ಕೋಲ್ ಬಳೆರ ವೇಲೆ ಒಳಿಪಿಚಿಟ್ಟ ಕಾಸಾನೋ ಎಡ್‌ತರ್‌ವಿಂಜತ್‌ಲೊ. ಅಪ್ಪಿ ಇನ್ನನೆ ಅಪ್ಪಂಡ ಪೊಯ್, ತಿಂದ್ ಮಿಂಞಾಲೆ ಬೊತ್ತಿ ಪೋನಂವೊ ಬೈಟ್ ಇಡೀ ಕೊಟ್ಟಲ್ ಇಂಜಿತಿಕ್ಕೂ, ಅಪ್ಪಂಡ ಪೋಡಿಲ್, ಆ ಪಾಳಾನ ಉಪ್ಪು ಪೋರಿಯಳೂ ಚೊಕ್ಕಿತ್ ಸರಿಕ್ ಬಲ್ಲಂಗಕೇ ನಡಪುಲೆ. ಪಾಪ ಈ ಕುಂಞಿ ಕುಟ್ಟಿಯಡ ಊಳಟಕ್ಕೆಲ್ಲ

ಬಗ್ಗುವುದುಂಡ? ಪೋರಿರ ಬೆನ್ನೊನ ಕಡಿಕಂಡುವೇಂಗಿ ಕುಂಞಿಕ್ ಎಚ್ಚಕ್ ಪೋರಿ ಮೊಟ್ಟೊಡತೆ ಕಪ್ಪು ಕೊಡ್ತಿಕ್ಕುಂದ್ ವರ್ಕ್ ಕಣ್ಣಲ್ ಅವೊ ತೊರಂದ ಪಡಿನ ಪುಡ್ಚಂಡ್ ಮುಂಗಾರ್ ಮಳೆರ ತಂಪು ಕಾತ್, ಮಣ್ಣರ ವಾಸನೆಲ್... ಮೋನೆ ಅಪ್ಪೀಂದ್ ಪದ್ಂಗಿ ಕಾಕ್ಚಿ. ಅದ್ಂಡ ಬದಲ್ ಮಲ್ಲಕೋಳಿ ಇಂಞೊಮ್ಮ ಕೊಕ್ಕರೆ.... ಕೋ.... ಂದ್ ಕೂಂದತ್.

ಪೊಲವ ನೇರತ್ ದಿಕ್ಕಿ ದೆಸೆಯಿಲ್ಲತೆ, ಜನಡ ತುಮ್ಕಲ್, ಸದ್ಗೊದ್ದಾರ ಮದ್ಯ ಎಚ್ಚಕೊ ನೇರ ಚತ್ರತ್ ನೆಲತ್ ಮನಸನೆಲ್ಲ ಅವ್ವಂಡ ಮಡಲ್ ಬೆಚ್ಚಂಡ್ ಎದೆರ ಡಬ್, ಡಬ್, ಸದ್ಗೊನ ತಾಂಡ ನೆಂಞಿಲ್ ಬೆಚ್ಚಂಡ ಮೈಸೂರ್ ಚತ್ರತ್ ಚೋತ್ ಕಣ್ಣ ಮುಚ್ಚಿ ಪೋನ ಅಪ್ಪಿಕ್ ಪಡಿ ತೊರಂದ್ 'ಅಪ್ಪೀಂದ್' ಕಾಕ್ನದ್ ನೇರೆ ಪಟ್ಟಿತೆನ್ನೊ 'ಅಪ್ಪಾಂದ್' ನೆಲತಿಂಜಿ ಅಜ್ಜಿ ಪಾರಿ ಅಳತ್ ನೋಟ್ಚಿ. ಇರ್ಲ್ ಪೊವಲ್ ಪಡಿತೊರಂದ ಚತ್ರ, ಬೇಲ್ ಬಂಡ್ ಒಣಂಗ್ನ ಮೇಲ್, ಬಟ್ಟೆ ಬರಿ ನೆಲತ್ ಒರಕ್ ಒದ್ದಾಡ್ನೊಂಡ್ ಮಣ್ಣ್ ಪೊಡಿ ಉದಾರಿ ಪೋಯಿತಿಂಜತ್. ಆ ನೇರಕ್ ಅರಮನೆಲ್ ರಾಜ ಎಚ್ಚರಾಯ್ ಧ್ಯಾನ ಸ್ಮೋತ್ರತ್ ಸಮಯ. ಭಕ್ತಿಲ್ ಸಂಗೀತಗಾರ, ವಾದ್ಯಮೇಳ, ಜನಡ ಸದ್ಗೊ ಸರತ್ ಮಧ್ಯೆ ಎದ್ದೆದ್ ದೂರ ಸ್ವಪ್ನತ್ ಕೇಪನ್ನೆ 'ಅಪ್ಪಿರ' ಕೆಮಿಕ್ ಪುನ ಗಾಳಿಲ್ ತೇಲಿ ಬಂದ ಎಳೆ ಕೆಮಿಕ್ ಬುದ್ಧ ಮನಕ್ ತೀರ್ಥ ಕುಡಿಚೆನ್ನೆ ಒಯತ್ 12 ಡಾಂಡ ಬಾಲ, ಸಂಗೀತ ಪಡಿಪ ಆಸೆಲ್ ಮನೆ ಮಟ ಒರ್ ಗಳಿಗೆ ಮರಂದ್ ಬೆರಿಯ ಮೂಡ್ ಕತ್ತಿಯಂಡ್ ಕೆಲ ದುಂಬ ನೀರ್ಕುಡ್ಚಿ ಚಾಯೋಡೆ ಪೊಲಂದ್ ಬೊಳಿ ಬಂದದೂ ಪೊರ ಬುದ್ಧತ್, ಸರಿಕ್ ನಿರ್ಣಯ ಎಡ್ತವ ವಯಸ್ಸಲ್ಲ. ಕಳಿಪ ತೆಳಿಪದಲ್ಲತೆ, ಅವ್ವಂಡ ನಳತ್ ಪದಂಗುವ ಆ ವಯಸ್ಸರ ತಡಿ ಒಮ್ಮೆ ಕೊಡಗ್ ವೀರಾಜಪೇಟೆಯು ಕಾಂಗತ ಜೀಂವ, ಪೊಲಾಕ ಆ ನೇರತ್ ಮೈಸೂರ್ ಅರಮನೆರ ಮಿಂಞತ

(ಇಕ್ಕತ Town Hallರ ಜಾಗ ಪಿಂಞ ಇಕ್ಕತ City Bus Standರ ಜಾಗ) ಅಪ್ಪರಿಪ್ಪರ ತಿರಿತ್ ಮರತಾರಡಿಲ್ ಅಳತತ್. ಕೂಳ್ ನೀರ್ ಸರಿಕ್ ಇಲ್ಲತೆ ದಕ್ಕುತ್ತಿ ಪೋನ ಕುಂಞಿ ತಡಿಕ್ ಅಲ್ಲಿಯೂ ಮಂಕ್ ಕವಿಂಜವನ್ನನೆ ಆಪ ಇಂಜತ್. ಕುಂದ್ ದೇವಿ ಚಾಮುಂಡೇಶ್ವರಿಕ್ ಪೂಜೆರ ನೇರತ್ ಜಾಗಟೆ ಮದ್ದಳೆ ಸದ್ದಾರ ಜೂಕ ಕುಂಞಿ ಅಪ್ಪಯ್ಯಂಗ್ ಊಕತ್ಲ್ ಮನಕ್ ತಟ್ಟುವಕ ತಡಿಲ್ ತಾಕತ್ತೂ ಏರ ಕುಸಿರ ಅನುಭವ ಪಡಂದವಿಂಜತ್. ಚಾಮುಂಡೇಶ್ವರಿರ ದೃಷ್ಟಿಕ್ ಅನುಗ್ರಹಕ್ 'ಅಪ್ಪಿ ಕುಂಞಿ' ಸೇರಿ ಪೋಚಿ. ಅಕ್ಕನ್ನೆ ಕುಲದೇವಿ ಕಾವೇರಿ ಮಾತೆಕ್ ಮೈಸೂರ್ ಕುಂದ್ ದೇವಿ ಭಾಷೆ ಕೊಡತತ್. 12 ಕಾಲ ನಾಡ ನಳತ್ ಪೋತಿತ್ ನೋಡ ಮಣ್ಣ್ ಕೊತ್ತಪ್ಪಿ. ನೀನ್ ಮಿಂಞಕ್ ಪೋತಿಯ. ನಾಡ ನಳತ್ ಪಡಿಚ ಸಂಗೀತ ವಿದ್ಯೆ, ಹಾರ್ಮೋನಿಯಂ ವೀಣೆ ವಾದ್ಯನಾದ ನೀನ್ ನೋಡ ಪುಟ್ಟಾನ ಜಾಗ, ತಲ ಕಾವೇರಿಲ್ ನೆರವೇರಿಚಿಟ್ಟಾಂದ್ ದೇವಿ ಚಾಮುಂಡೇಶ್ವರಿ ಎಣ್ಣೆ ಚೆನ್ನೊ. ಅನ್ನನೆ ಆಯಿಪೋಚಿ. ಇದೆಲ್ಲ ಕಲ್ಪನೆ ಅಲ್ಲ, ನಡಂದ ವಿಚಾರ. ಅರಮನೆರ ಪೂಜೆ ಪುನಸ್ಕಾರ ಚಂಗ್ ಮದ್ದಳೆರ ಸದ್ದ ಬಂದ ದಿಕ್ಕ ಕುಂದ್ಲ್ ಚಾಮುಂಡೇಶ್ವರಿಂದ್ ಅಪ್ಪಿಕ್ ಗೊತ್ತಿಲೆ. ಆಚೆಂಗ್ಯೂ ಅದೇ ದಿಕ್ಕಕ್ ನೇರೆ ಮೂಡ್ ಇಟ್ಟಂಡ್ ಸಂಗಟತಾರ ಪೊದೆಪುಲ್ ಒರ್ ಮರಕ್ ತಾಂಗಿ ಕಣ್ಣ್ ಮುಚ್ಚಿಯಂಡತ್. ಎಚ್ಚಕೊ ನೇರತಾರ ಮೇಲೆ ಅಲ್ಲಿಯೆ ಪಾರ್ಕ್ ಉಪ್ಪ ಪರಿಕಾರಂಡ ಸದ್ದಕ್ ಕಣ್ಣ್ ತೊರಂದ್, ಪಯಿಚ ಕೆಲಕ್ ಕೈಲಿಂಜ ದಂಡ್ ಕಾಸ್ಲ್ ಅರೆಕಾಸ್ಕ್ ಪೆರಿ ಎಡತಂಡ್ ತಿಂದಂಡ್ ರಸ್ತೆ ಬರಿ ಬರಿ ತಿರ್ಗಿಯಂಡಿಂಜ ಆ ನೇರ! ಚಾಮುಂಡೇಶ್ವರಿರ ಅನುಗ್ರಹತಾರ ದೃಷ್ಟಿರ ಪಾಚಲ್ ಬುದ್ದತ್. ನೆಲ್ಲಾ ವ್ಯಾಪಾರಕ್ ಚೆಕ್ಕೇರ ದಂಡ್ ಅಣ್ಣ ತಮ್ಮಣಂಗ ನೆಲ್ಲಾ ಕೊಡತಂಡ್ ಎಡತಂಡ್ ಬಪ್ಪಯಿಂಜದೂ, ಆ ಮೈಸೂರ್ ಸಾವುಕಾರ ಹುದಿಕೇರಿಕ್ ಬಂದಲ್ಲಿ ಮೀಸೆ ಕಾರ್ಯಪ್ಪಂಡ ಕೂಡೆ 'ಅಪ್ಪಿ'ರ

ಪರಿಚಯ ಚಾಯೋಡೆ ಇಂಜದೂ ಅದೇ ಸಾಹುಕಾರ ಟಾಂಗ ಗಾಡಿಲ್ ದಾಟಿಯಂಡಿಪ್ಪಕ ಎಲ್ಲಿಯೋ ಕಣ್ಣಾಕ್ ಕಂಡ ಒರ್ ಬಾಡ್‌ನ ಮೂಡ್, ಅಕ್ಕ ಅಕ್ಕ ಜೋಬಾಕ್ ಕೈಯಿಟ್ಟ್ ಪೆರಿನ ಮಾತ್‌ಕ್ ಮಾತ್‌ಕ್ ತಿಂದಂಡ್, ತಡಿನ ಮರಂದ್ ಏದೋ ಗುಂಗಲ್ ಮೊಟ್ಟ್‌ಟ್ಟಿಂಡುಳ್ಳ ಕುಂಞಿ ಬಾಲನ ಕಂಡದೇ ಸಾವುಕಾರ ಬಾಯಿಂಜ ಒಮ್ಮೆ ಅಪ್ಪಿಂಂದ್ ಟಾಂಗ ನಿಪ್ಪಿಚಿಟ್ಟತ್.

ನೀನೊಲಿಂಜಕ ಒಣಕಾಜಿನಿ ಚಿಗುರ್‌ವಾ, ನೀ ಮುನಿಂಜಕ ಪಣ ಕಜನೆ ಕರ್‌ವ ಎಣ್ಣನ್ನನೆ! ಭಗವಂತಂಡ ಅನುಗ್ರಹಕ್ ನಲ್ಲ ಕರ್ಮಕ್ ಒಳಗಾನ ಜನ್ಮತ್‌ನ ಅಂದೂ ಇಂದೂ, ಮುಂದೂ ಪ್ರೇತುವಾಂಗ್ ಅಪ್ಪಿ ಅಂದ್ ಪೊಲಾಕ ಮೊಳಿ ಆಚಿ.

ಅಪ್ಪಿ ಪೆರಿ ಅವುಂಜಂಡೇ ಸಾವುಕಾರೇಂದ್ ಓಡಿ ತಬ್ಬಿಯಂಡತ್. ಬತ್ತವಕ್ಕಾಯಿತಿಂಜ ಕಣ್ಣಾನ ತೊರಂದ್ ಅಪ್ಪಿ ಸಾವುಕ್ಕಾರಂಡ ಮಡಲ್ ಶರಣಾಚಿ. ಕೂಡೆ ಕೂಟಿಯಂಡ್ ಸಾವುಕ್ಕಾರ ಅಪ್ಪಿನ ನೇರಾನ ಒರ್ ಬಾಲನಾಯ್ ಕಾಂಬಕ್ ಆದ್ಯ ಬಟ್ಟೆ ಅಂಗಡಿಕ ಪೋಯ್ ಮೇಲ್ ಬಟ್ಟೆ ಬದಲ್ ಮಾಡ್‌ಚಿ. ಮನೆಕ್ ಕೂಟಿಯ ಪೋಯ್ ಎಲ್ಲ ಕೇಟರಿಂಜಿ, ಅಪ್ಪ ಕಾರ್ಯಪ್ಪಂಡ ಚೆಡಿರ ಪೋಕ್‌ನರಿಂಜಿ ಏಳ್ ನಿನ್ನ ಹುದಿಕೇರಿಕ್ ಬುಡುವೀಂದೆಣ್ಣ ಕಲೂ ಅಪ್ಪಿ ಕೇಟ್‌ಲೆ. ಸಂಗೀತ ಪಡಿಕಂಡೂಂದ್ ಒರೇ ಹರ ಪುಡ್‌ಚೆಂಡತ್.

ಅಂದ್ ಕಾಲತ ಮಹಾರಾಜಂಡ ಮೈಸೂರ್‌ಲ್ ಸಂಗೀತ ಪೊಳೆರನ್ನನೆ ಒಕ್ಕುವ ಉಕ್ಕುವಿಂಜತ್. ಬಲ್ಯ ಬಲ್ಯ ವಿದ್ವಾಂಸಂಗಳ ಮೈಸೂರ್ ಮಾರಾಜ ತಾಂಡ ದರ್ಬಾರ್‌ಲ್ ಚಾಕಿ ಬೆಚ್ಚಂಡಿಂಜಾತ್ ಒರ್ ಮಹಾನುಭಾವ ಆಸ್ತಾನ್ ವಿದ್ವಾನ್ ಬಿ. ದೇವೇಂದ್ರಪ್ಪಂಡ ಸಿನೆಯ ಈ ಸಾವುಕ್ಕಾರಂಗ್ ನಂದಾಯ್ ಇಂಜತ್. ಪಿತ್ಯಾಂದ್ ಪೊಲಾಕ ಕುಳಿಪಿಚಿಟ್ಟದಲ್ಲತೆ, ಪೂಜೆ

ಪುನಸ್ಕಾರ ಆಯ್ತು ಆಶೀರ್ವಾದ ಮಾಡಿತ್ ದೇವೇಂದ್ರಪ್ಪಂಡಲ್ಲಿಕ್ ಕೂಟಿಯಂಡ್ ಪೋಯ್ತು ಅಪ್ಪಿನ ಗುರು ಸೇವೆ ಮಾಡಿಯಂಡ್ ವಿದ್ಯೆ ಪಡಿಪಕ್ ಕೂಟಾಚಿ. ಗುರು ದೇವೇಂದ್ರಪ್ಪ ಈ ಬಾಲ ಎಲ್ಲಿಯತರಂವಂದ್ ಕೇಟತ್. ಕೊಡಗ್ ಕುಂಞೋಂದ್ ಸಾವುಕಾರ ಎಣ್ಣದ್ ಕೇಟ ಗುರು ಒಮ್ಮೆಕೇ ಮಂಡೆಕ್ ಕೈ ಬೆಚ್ಚದಲ್ಲತೆ, ಕೊಡವಂಗುಂಡ ಸಂಗೀತ ಸಂಸ್ಕಾರಂದ್ ಕೇಟತ್. ಗುರು ಕೇಪಕ್ ಕಾರಣ ಉಂಡ್.

ಒಮ್ಮೆ ಪೊನ್ನಂಪೇಟೆ ರಾಮಕೃಷ್ಣ ಆಶ್ರಮಕ್ ಗುರುರ ಸಂಗೀತ ಕೆಚೇರಿಲ್ ಪಾಡಿಯಂಡಿಪ್ಪಕ ಕೇಟಂಡಿಂಜ ಕೊಡವ ಚೆನ್ನ ಜನ ಕುಡ್ಚೆ ಅಮುಲ್ಲ್ "ಇವಂಡವ್ವನ..... ಎಂತೆ ಏಂಗುವ ಇನ್ನನೇ"ಂದ್ (ರಾಗ ಆಲಾಪನೆ-ರಾಗ ಪರಿಚಯ) ಬಜ್ಜಂಡ್ ಪೋನ ಪ್ರಸಂಗ ಸಾವುಕ್ಕಾರಂಗ್ ಗುರು ಎಣ್ಣೆಚಿಲೊ. ಸಾವುಕ್ಕಾರ ಕಾಲ್ಕ್ ಬುದ್ಧ್ ಕುಂಞಿ ಅಪ್ಪಿನ ಒಪ್ಪಿಚಿಟ್ ಓಡನೆ ನೆಲ್ಲ್ ಕ್ ಬಂದವು ಅಪ್ಪಿರ ಮನೆಕ್ ಅರಿವಿಕೆ ಕೊಡತಿತ್ ಅಪ್ಪಿರ ಜವಾಬ್ದಾರಿ ನಾಕ್ ಇರಡ್ಲೆಂದ್ ಒಪ್ಪಿಚಿಟ್ ಬಂದ ಪಿಂಞ ಮನೆಲ್ ಸಮಾಧಾನತರ ತಂಪುಗಾಳಿಕ್ ಎಡೆಯಾಚಿ.

ಅಕ್ಕ ಗುರುರ ಮನೆಲ್ ಪತ್ತಿರುವದ್ ಮಕ್ಕ ಸಂಗೀತ ಅಭ್ಯಾಸ ಮಾಡುವಯಿಂಜತ್. ಪೆದ ಪೋನ ಪಂಡರಿಬಾಯಿಯು ಒಬ್ಬ. ಕಾರ್ಯಪ್ಪಜ್ಜಂಡ ಪಾಕೆಟ್ ವಾಚ್ ಅಪ್ಪಿಕ್ ಬಾರಿ ಕುಸಿ. ಉಪ್ಪ ಬೇಲ್ಂಜ ಓಡವ ತಡಿಲ್ ಕಾರ್ಯಪ್ಪಂಡ ಪಾಕೆಟ್‌ವಾಚೊ ಕೂಡೇ ಪೋಚಿ. ಚೆನ್ನದಿನತ್ ಪಂಡರಿಬಾಯಿ ಕೇಟಂಡ್ ಕೊಡತಿತ್‌ಲೆಲೊ. ಅಪ್ಪಿ ಬಲ್ಯಂವನಾಯ್ತು ಮೋವ ನಾನೂ (ತ್ಯಾಗರಾಜ) ಅಪ್ಪನು ಸತ್ಯ ಹರೀಶ್ಚಂದ್ರ ಸಿನೆಮಾ ನೋಟ್ಯಂಡಿಪ್ಪಕ ಪಂಡರಿ ಬಾಯಿನ ಪರದೆಲ್ ಕಾಂಬದೆ ತಡ, ಮೋನೆ ನಾಡ ವಾಚ್ ಬಲ್ಚಂಡವ. ಮೋಸ ಮಾಡ್‌ನವನಾಕ್‌ಂದ್

ರಾಗ ಬಲ್ಚತ್.

ಮೈಸೂರ್‌ಲ್ ಗುರುದೇವೇಂದ್ರಪ್ಪಂಡ ಮಟತ್ತಲ್ ಇಂಜ ಮಕ್ಕಡ ಕೂಟ್‌ಲ್ ಕೊಡಗ್‌ರ ಪರಿಸರತ್‌ರ ಚೋರೆ ಎದ್ದ್ ಕಾಂಬ ಕೂಡ್‌ಚಿ. ಚೆನ್ನಂಗೇ ದಿನತ್ತಲ್ ಕರ್ತ ಬಾವು ಕಯಿಂಜಿ ಬೊಳತಬಾವುಕ್ ಚಣ್ಣೂರ ಬೊಳ ಬೊಳಂದ್ ಬೊಳತ ಬಾವುರ ಪಾನೆಲಚಿ ಬೊಳಿ ಪೋಲೆ ಅಪ್ಪಿ ಪಡಿಪುಲು, ಎಣ್ಣಾನ ಪಣಿಪಾಲೊಲೂ ದಿನ ಕಯಿಂಜನ್ನನೇ ಗುರು ಮನತೊಳ್‌ಲ್ ಅಪ್ಪಿ ಬಾಲಂಡ ಬೊಳಿಕ್ ಜಾಗ ಕ್‌ಟ್ವಚಿ. ಬಲು ಕಠಿಣವಾನ ವಿದ್ಯಾಭ್ಯಾಸ ಅಲ್ಲತೆ ಗುರು ಸಾರೋಟ್‌ಲ್ ಪೋಪಕ ಕೂಡೇ ಪೋಪ. ಅರಮನೆಕ್ ಬುಟ್ಟಿತ್ ನಡಂದ್ ಬಪ್ಪಕ ಮನೆಕುಳ್ಳ ಸಾಮಾನ್ ಎಲ್ಲ ಎಡತ ಬಂದಿತ್ ಗುರು ಪತ್ತಿಕ್ ಕೊಡ್‌ಪ. ಬಾಕಿ ಮಕ್ಕ ಅಲ್ಲಿಯತ್‌ರವು ಆನಗೊಂಡ್ ಪಾಟಿ ಆನದು ಅಯಿಂಗಡ ಮನೆಕ್ ಪೋಯಿರುವಿಂಜತ್. ಅಪ್ಪಿ, ಅಪ್ಪಯ್ಯ ಗುರುಮಾತೆಕ್ ತೊಣೆಯಾಯಿ ಇಪ್ಪ ಇಂಜತ್.

ಅಪ್ಪಯ್ಯಂಗ್ ಇಕ್ಕ ಅಪ್ಪ, ಅವ್ವಂಗ್‌ಂಜ ಮೇಲಾಯ್ತ್ ಗುರು, ಗುರುಮಾತೆ, ಸೇವೆಲ್ ಆ ಚೆರಿಯ ಬಯತ್‌ಲೇ ಮನ ಇಟ್ವ ಕೂಡಿಯಂಡತ್. ತಮಾಷೆ ಕಳಿ ಅಲ್ಲವೇ ಅಲ್ಲ. ಮನೆ ಬುಟ್ಟಿ 12 ಕಾಲ ಗುರು ಆಶ್ರಯತ್‌ಲೇ ಅಪ್ಪ, ಅವ್ವ ತಾಂಡ ಒಡ ಪುಟ್ಟ್ವನಯಿಂಗಳ ಮರಂದ್ ಇರಂಡೂವೇಂಗಿ ಅಪ್ಪಯ್ಯಂಡ ಸಂಗೀತ ವಿದ್ಯೆರ ಆಶೆ ಎಚ್ಚಕ್ ಮೇಲಾನದೊಂದ್ ಗೇನಮಾಡಿ ಅರಿಂಜವಂಡಚ್ಚಿಕೆ. ನೇರೆ ಓದಿಯಂಡ್ ಪೋನಲ್ಲಿ ಎಂದೂ ಪುಡ್‌ತಕ್ ಕ್‌ಟ್ಟತಂತೋರ್ ವಿಚಾರ. ಆನಗೊಂಡೆ ಗುರು ದೇವೇಂದ್ರಪ್ಪ ಸ್ವರ ರಾಗ, ತಾನಂ, ಪಲ್ಲವಿಕೆತ್ತನೆ 12 ಕಾಲ ಅವಧಿಲ್ ಧಾರೆ ಬೂಕ್‌ಚಿ. ಮಧ್ಯ ಮಧ್ಯ ಗುರು ಪತ್ತಿರ ಕೂಡ ಅಪ್ಪಯ್ಯನ ಗುರು

ಮೇಲಾಯ್ ಪರವದೂ ಇಂಜತ್. 12 ಕಾಲ ಒರ್ ಕಾಸ್ ಇಲ್ಲತೆ ಮನೆಲ್ ಬಟ್ಟೆ ಬರಿ ಕೂಳ್ ಕೊಡ್ತಿತ್, ಕೊಡಗ್ಕ್ ಅಯಿಪಕ್ ಪಲ ಕೊಡ್ಪ ಒರ್ ಮರ ಆಯ್ತೆ ಮಾಡಂಡುವೇಂಗಿ ಗುರು ಶಿಷ್ಯಂಡ ಆ ಒಪ್ಪರ ಎನ್ನನೇಂದ್ ಸಾಧಾರಣ ಕಲ್ಪನೆಕ್ ಕೊಟ್ಟುಲೆ. ಕಾಡೆರ್ಚಿ, ಪಂದಿ ಕೋಳಿ ತಿಂಬ ಸಂಸ್ಕಾರ ಬುಟ್ಟ್ ಅಪ್ಪಟ ಸಸ್ಯಹಾರಿ ಆಯ್ತೆ ಜನಿವಾರ ಇಟ್ಟಿಯಿಂಗಡ ಆಚ್ಚಾರ ವಿಚಾರಕ್ ಅಡಂಗಿತ್ ಪನ್ನೆರಂಡ್ ಕಾಲತ್ ಸಾಧನೆ ಚೆರಿಯದಾ? ಪಾಂಡವಡ ಆಜ್ಞಾತವಾಸತ್‌ರನ್ನನೆ, ಗುರುಸಂಸಾರತ್‌ರ ಇಟ್ಟಿ ಬಟ್ಟೆ ಬರಿನ ಕೆಟ್ಟ್ ಮಾಡಿತ್, ಕುಕ್ಕುಲೂರ್ ಕೆರೆಕ್ ಪೊಲಂಜತೆಕ್ ಬಂದ್, ಎಲ್ಲ ಮಡಿ ಮಾಡಿತ್, ಪೋಯ್ತೆ ಒಣಕಿಟ್ಟಿತು ಆನದ್ ಕರ್ಪ ಎಮ್ಮೆ ಪಯ್ಯುವಳ ಪರಂಬಲ್ ಕೆಟ್ಟಿತ್ ಕತ್ತಿತ್, ಚಾಣ ಎಡ್ತಿತ್ ಕೆಟ್ಟಿವ ಜಾಗ ಶುದ್ಧ ಮಾಡಿತ್, ಪಾತ್ರ ಪನಲ್ ಕತ್ತಿತ್ ಗುರುಮಾತೆಕ್ ತಾನ್ ಕೊಡ್ತ್ ಗುರು ಆರ ಮನೆಂಜ (ಪೊಲಕತ ಪೂಜೆಂಜಿ) ಬಕ್ಕಣೆಕ್ ತಾನೂ ಮಡಿ ಆಯ್ತೆ ಕಯಿಂಜ ಪಾಟಿತ್ತನ ಎಳೆದಿತೂ ಓದಿತೂ, ಪಡಿಚಿತೂ, ಪಾಡಿತ್ ಒಪ್ಪಿಚಿಡುವ ಬಲ್ಯ ಸಾಧನೆಕ್ ಅಪ್ಪಯ್ಯ ಒನ್ನಾಂದೂ ನೆವನ ಎಡ್ತಂವ ಅಲ್ಲವೇ ಅಲ್ಲ. ಮಹದಾನ ವಿದ್ಯೆತಾಯಿ ಅಪ್ಪಯ್ಯಂಡ ಮನತ್‌ಲ್ ವಾಸಯಿಂಜಿತ್ ಎಣ್ಣೆಕ ಎಂದೂ ತಪ್ಪಾಗ, ಸಂಗೀತತ್‌ಲ್ ಅದೊಲೂ ಕರ್ನಾಟಕ ಸಂಗೀತತ್‌ಲ್ ತಾಳ ಲಯಕ್ ಏರ ಸ್ಥಾನ ಮಾನ, ಶಾಸ್ತ್ರ ಪದ್ಧತಿ ಪಂಡಿಂಜೇ ಬಂದದ್. ತಾಳಲಯ ಲೆಕ್ಕಚಾರ ಅಪ್ಪಯ್ಯಂಡ ಕೈಲೂ ಕೈಬೆರತ್‌ಲೂ ಅಲ್ಲತೆ, ಮೇಲ್‌ಡ ರೋಮ ರೋಮತ್‌ಲ್ ಅಳತಿತಿಂಜತ್.

ಆಸ್ಥಾನ್ ವಿದ್ವಾನ್ ದೇವೇಂದ್ರಪ್ಪನು ನೋಟ್‌ವಕೊತ್ತ ಆಳ್, ರಾಜಂಡ ದರ್ಬಾರ್‌ಲ್ ಪಾಡ್‌ವಂವಂಗ್ ಸಾಮಾನ್ಯ ವಿದ್ಯೆ ಮಂಡೆ ಪೋರ. ಸಂಗೀತ ಕ್ಷೇತ್ರತ್‌ಲ್ ರಾಜಂಡ ಆಸ್ಥಾನತ್‌ಲ್ ಸಂಗೀತಕಾರನಾಯ್ತೆ ಮೈಸೂರ್‌ಲ್ ಬಾರಿ ಬಾರಿ ಪೆದ ಎಡತಿತ್ ಸ್ವರ್ಗವಾಸ ಆನಯಿಂಗಡ

ಕೂಟ್‌ಲ್ ವಿದ್ವಾನ್ ದೇವೇಂದ್ರಪ್ಪ, ವಾಸುದೇವಾಚಾರ್, ಬಿಡಾರಕೃಷ್ಣಪ್ಪ, ವೀಣೆ ಶೇಷಣ್ಣ ಇನ್ನನೆ ಮಹಾ ಪಂಡಿತಗಳ ವಿದ್ಯಾವಂತಗಳ ಇಂದೂ ಗೇನ ಮಾಡುವವು, ತಕ್ಕ ಪರೆಯುವವು, ಪೂಜೆ ಮಾಡುವವು ಉಂಡ್. ಆಸ್ಥಾನತ್ ವಿದ್ವಾನ್ ಬಿ. ದೇವೇಂದ್ರಪ್ಪಂಡ ಗುಡಿಕೆಟ್ಟಿತ್, ಇಂದೆಕೂ ಪ್ರತಿಕಾಲ ಜಯಂತಿ ಆಚರಣೆಲ್ ಉಂಡ್. ಅಪ್ಪಯ್ಯಂಗ್ ಪಾಟ್ ಶಾಸ್ತ್ರ ಅಲ್ಲತ, ವೀಣೆಲೂ, ಹಾರ್ಮೋನಿಯಂಲೂ ಮಹದಾನ ವಿದ್ಯೆ ಕೊಡೆತತ್. ಪಂಡೇತ ಜನ್ಮತರ ಸಂಗೀತ ಋಣ ಏರ ಇಂಜಾಂಡ ನೆವನತ್ ಪರಜಾಗತ್‌ಲ್ ಚೆರಿಯ ಬಯತ್‌ರ ಅಪ್ಪಯ್ಯ ಬೊಳಂದ ಬೋಜಕಾರ ಬಾಲೆಕಾರನಾಕಣೆಕೂ ಗುರುಸೇವೆ ಮಾಡ್‌ಚಿ. ಅದಂಡೊಳ್‌ಲ್ ಮುಂಬಲ್ ಮೋಂವ ಪೊರಮೆ ಆನಗೊಂಡ್ ದಂಡನೆ ಮೋಂವ ನಾಚಪ್ಪಂಗ್ ಕಾರ್ಯಪ್ಪ ಮಂಗಲ ಮಾಡಿತ್ ಮನೆರ ಕಾರ್ ಬಾರ್ ಒಪ್ಪಿಚಿಟ್ಟಿತ್. ದಂಡನೆ ಮೋಂವಂಡ ಮೂರ್ತ ಕಯಿಂಜ ಬೈಟಾಪಕಲೆ ಕಾರ್ಯಪ್ಪಜ್ಜಂಗ್ ಕೈಯ್ಯತಾಯ್, ಆ ದಿನ ಮಾಜ್‌ನ ಇಂಞೋರ್ ದಿನ ಚೆತ್ತ್ ಸ್ವರ್ಗ ಸೇರ್‌ಚಿ.

ಇಲ್ಲಿ ಮೈಸೂರ್‌ಲ್ ಅಪ್ಪಯ್ಯಂಡ ಪೂರ್ತಿ ವಿದ್ಯಾಭ್ಯಾಸ ತೀರಣೆಕ್ 12 ಕಾಲ ಪಾಂಜತ್. 1936ನೇ ಇಸವಿ ತಾಂಡ ಮನೆಕ್ ಎಲಂಗಿ ಬಾತ್. ಇಂದೇತ ಕಾಲತ್ ಪೊರಮೆ ಇಂಜಿತ್ ಬಪ್ಪದೂ ಒರ್ ಸಂಗತಿ ಆಯ್ತ ಜನ ಕಾಂಬಲ್ಲಿ ಆ ಪಳೆಯ ಕಾಲತ್‌ಲ್ ಚೆರ್‌ಪತ್ತಂಜೆ ಪೊರಮೆ ಬೊಳಂದ್ ಕೊಡಗ್‌ಕ್ ಬಂದ ಅಪ್ಪಯ್ಯಂಡ ತಕ್ಕ, ತೆಳಿ ಕಳಿ ಬಾಲ್ಯತ್ತನ ಜನ ಪರಂದದ್ ನೋಟ್‌ನದ್ ಅದಿ ಆನ ತಪ್ಪಲ್ಲ. ಜನ ಕೊದಿಪನ್ನನೆ ಗುರು ದೇವೇಂದ್ರಪ್ಪ ಬೊಳೆತಿತಿಂಜತ್. ದುಂಬ್‌ನ ಮೂಡ್ ವಿದ್ಯೆತರ ಕಳೆ, ಬೊಳೆತ ಕಂಬಿ ಪಂಚೆ, ಬೊಳೆತ ಕುಡೆತ (ಜಿಬ್ಬ) ಜರಿ ಶಾಲ್ ಬೋಳೆಲ್, ಆ ಕಾಲತ್ ಜರ್ಮನಿಲ್ ಮಾಡ್‌ನ ಗೋಲ್ಡ್ ಪ್ರೇಮ್‌ರ

ಕಣ್ಣ್ ಕನ್ನಡಿ, ಬೋಳೆ ಮುಚ್ಚಿತ್ ಮಂಡೆಲ್ ಉದ್ದ ಬುಟ್ಟಿ ಕೋಳಿಕೆ ತಲ್ಮಿ, ನೆತ್ತಿಲ್ ಕರ್ತ ತಿಲಕ, ಈ ಬೋಜ ಇಂದೂ ತೇಡ್ನಕ ದಾರೂ ಕಾಂಬುಲೆ. ಅಂದ್ ಜನಸಂಖ್ಯೆ ಕಮ್ಮಿರ ನೇರತ್ ಏದ್ ಬೋಜತ್ ಅಪ್ಪಯ್ಯ ಎಲಂಗಿಯಂಡಿಂಜತ್ ಎಣ್ಣಾವಕ್ ಅಪ್ಪಯ್ಯನೇ ಸಾಕ್ಷಿ. ಮನೆಕ್ ವಿದ್ಯಾವಂತನಾಯ್ ಬಂದ ಪಿಂಞ ಅಪ್ಪಯ್ಯಂಡ ರಿನೇ ಕ್ಲಾಸ್ ಸಿನೇತಕಾರ ರಾಮಕೃಷ್ಣಯ್ಯ ತಮ್ಮಣ ನಾರಾಯಣ ಸ್ವಾಮಿ, ಬಳೆಗಾರ ಜನಾಂಗತ್ ಪೊಲ್ಲ ಪಣಿಕಾರ ರಾಮಣ್ಣ ಅಜ್ಜಿ ಕುಟ್ಟಿರ ನಂಜಪ್ಪ ಇಯಂಗಡ ಸಿನೇಚಾರ ಅದಿಯಾಯ್ ಕೂಡ್ಚಿ. ಕೊಡವಡಾತ್ ಅಪ್ಪಯ್ಯಂಡನ್ನೆ ಜುಲ್ಪ್ ಬುಟ್ಟಂಡ ಮಲ್ಚಿರ ಪೂವಯ್ಯಣ್ಣ, ಅಮ್ಮ ಕೊಡವಡಾತ್ ಆಸ್ತಿವಂತ. ಅಕ್ಕತ ಕಾಲತ್ ಬಿ.ಎ. ಓದ್ನ ಕಾನೂರ್ ಕೃಷ್ಣಯ್ಯ ಇಯಂಗಳು ಅಪ್ಪಯ್ಯನ ಕಂಡಲ್ಲಿಂಜ ಮಂಡೆಲ್ ಬೋಳೆ ಮುಟ್ಟ್ನ ಉದ್ದ ತಲ್ಮಿ ಅಲ್ಲತೆ ವೇಸ್ಪ್ ಕೋಟ್ ಪಂಚೆ ಉಡ್ಪವು ಆಚಿ. ಪೊನ್ನಂಪೇಟೆಲ್, ಮಲಿಚಿರ ಪೂವಯ್ಯ, ಕಾನೂರ್ ಕೃಷ್ಣಯ್ಯ, ಚೆಕ್ಕೇರ ಅಪ್ಪಯ್ಯ ಇಯಂಗಡ ಜೋಡಿನ ಅಕ್ಕತ ಬ್ರಿಟಿಷ್ ದರ್ಬಾರ್ಕ್ ಅಡ್ಂಗ್ನ ಜನ ಏರ ನೋಟಿ ಕೊದಿಚವಿಂಜತ್.

ಮನೆಕ್ ಬಂದ ಅಪ್ಪಯ್ಯಂಗ್ ಅಪ್ಪನಿಲ್ಲತ ಕೊರಗ್, ಅವ್ವಂಗ್ ವಯಸ್, ಇದೆಲ್ಲ ಕಂಡ್ ಚೆನ್ನ ಅನಂಗಿಚಿ. ಮನೆಕ್ ಆಳಾಕಾಳಾವಡ ಕೂಡೆ ಅಪ್ಪ ಕಾರ್ಯಪ್ಪ ಎಚ್ಚಿರ ಬೆಚ್ಚವಿಂಜತ್. ಮನೆರ ಆದಾಯ ಚಾಯೋಡೆ ಇಂಜತ್. ತಮ್ಮಣಂಗಡ ವ್ಯವಹಾರತ್ ಅಲ್ವವಸ್ಲೆಕ್ ಎಡೆ ಆಚಿ. ಅಕ್ಕ ಇಂಜ ತೋಟ, ಬೇಲ್, ಪಾಲ್ ಆಚಿ. ಬೋಳೆತ ಪಂಚೆ, ಶಾಲ್ ಶರ್ತ್, ಕನ್ನಡಿ, ನೆತ್ತಿಲ್ ಕುರಿ, ಮಂಡೆಲ್ ಜುಲ್ಪಿರ ಚೆಕ್ಕೇರ ಅಪ್ಪಯ್ಯ ಬಂಡ್ ಬೇಲ್ಕಿಳಿವ ಸಂಸ್ಕಾರತ್ ಪುಟ್ಟನಂವ ಅಲ್ಲವೇ ಅಲ್ಲ ಎಣ್ಣಾವಕ್ 12 ಕಾಲತ್ ಪಡಿಪು ಕೈಲ್ ಮಂಡೆಲ್ ಬೆಚ್ಚಂಡ್ ಎಲಂಗುವಿಂಜದೇ ಸಾಕ್ಷಿ. ಕುರುಂಚಿ ಮೊಳಕೆ ಪುಟ್ಟನದ್ ಬೋಳಿಕಂಡ

ಪಿಂಞ ಸುತ್ತ ಬಳ್ಳಿ ಪಬ್ಬಿ ನಿಂದಕ ಪಲ ಬುಡ್‌ವ. ಇಲ್ಲೇಂಗಿ ಚಿಗ್‌ರ್ ನಾಶ ಆಪ. ಚಿಗ್‌ರ್‌ನ ಬಳ್ಳಿಕ್ ಪಬ್ಬುವಕ್ ಎಡೆ ಮಾಡಿಕೊಡ್‌ಕಂಡು. ಆಚೆಂಗಿ ಕನ್ನಡ ಜಾತಿಕಾರ, ಪೂಜೆ ಪುನಸ್ಕಾರ, ಸಸ್ಯಹಾರಿಯ ಇಂತ ಜನಾಂಗತ್‌ರ ಮಧ್ಯ ಚೆಕ್ಕೇರ ಅಪ್ಪಯ್ಯ ಪುಟ್ಟಿತಿಂಜಕ ಇಂಡಿಯ ಸ್ವಾರ್ ಎಣ್ಣೆವಾತ್ ಒರ್ ಸಂಶಯವೂ ಬೋಂಡ. ಕೊಡವನಾನಾಂಗ್ ಪಿಂಞ ಇಡೀ ಜನಾಂಗತ್‌ಲ್ ಇಂಞೂ ದಾರೂ ಈ ತರತ್‌ರ ಕಷ್ಟ ಪಟ್ಟಿತ್ ವಿದ್ಯೆ ಸಂಪಾದನೆ ಮಾಡ್‌ನವು ಇಲ್ಲತೆಯೂ ಏರ ಸಂಗೀತ ಕೇಪವು, ಅರ್ಥ ಮಾಡ್‌ವವು ಜನಾಂಗತ್‌ರೊಳ್‌ಲಲ್ಲತೆ (ಇಂದೂ 2006 ಇಲ್ಲೇಂದ್ ಎಳ್ತಕಾರ ಮೋಂವ ನಾನೂ ಎಣ್ಣುವಿ) ಅಪ್ಪಯ್ಯಂಡ ಚೆರಿಯ ವಯಸ್ ಬಲ್ಯ ಮನಸ್ಸರ ಪಡಿಪುರ ಮನ್‌ಸಂಗ್ ಕೊಡಗ್‌ಕ್ ಬಂದಲ್ಲಿಂಜೆ ಕಿರಿ ಕಿರಿ ಸುರುವಾಚಿ. ಭೂಮಿ ನಡಪನ್ನನೆ ಇಲ್ಲೆ. ತಮ್ಮಣಂಗ ವಾರ ನೆಲ್ಲೇಂದ್ ತಂದದ್ ಮಾತ್ರ. ಬಾಕಿ ಉಪ್ಪು, ಮಳು, ಸಂಬಾರಕ್ ನೆಲ್ಲೆ ಕೊಡ್‌ತಿತ್ ಎಡ್‌ತವಚ್ಚಕ್ ನೆಲ್ಲೆ ಕಿಟ್ವವ ಇಂಜಿಲೆ.

ಚೆಕ್ಕೇರ ಅಪ್ಪಯ್ಯಂಡ "ಅರಮನೆಕೊತ್ತ ಸಂಗೀತ ವಿದ್ಯೆ ಕೊಡಗ್‌ರ ಪೊರಮನೆ" ಪಟ್ಟಿಲ್ ಕೇಪವು ಇಂಜಿತಿಲ್ಲೆ. ತೋಕ್ ಬೋಟೆ, ಕಳ್ಳ ಕುಡಿ, ಪೊಯ್ತ ಪಡೆ, ನಮ್ಮೆ ನಾಳ್‌ಲ್, ಮಂಗಲ ಜಗಳ ಮಂಡೆ ವಡತವಂದ್ ಇದೇ ಏರ ಅಲ್ಲತೆ ದೇವ ವಿದ್ಯೆಕ್ ಒತ್ತ ವಿಚಾರ ಅರಿಂಜವ ತುದಿಚವಕ್ ಕೊಡವ ಎಂದು ಬಪ್ಪುಲೆ. ಇದಂಗ್ ಅಪ್ಪಯ್ಯನೇ ಸಾಕ್ಷಿ. ಈ ವಿದ್ಯೆಕ್ ಎಂದೂ ನಂಗಡ ಜನಾಂಗತ್ ಒತ್ತಾಸೆ ಇಲ್ಲೆ. ಇಕ್ಕಿಕ್ಕ ಸಂಘ ಸಂಸ್ಥೆ ಅಲ್ಲಿ ಇಲ್ಲೇಂದ್ ಜನ ಏರ ಇಂಜಿಲೆಂಗ್ಯೂ 100ಲ್ 4ರ ಪ್ರಕಾರ ಜನ ಕೊದಿಪವು ಕಂಡಂಡುಂಡ್. ಚೆಕ್ಕೇರ ಅಪ್ಪಯ್ಯಂಗ್ " ಕೂರ್ಗ್ ಸ್ವಾರ್" ಬಿರ್‌ದ್ ಎನ್ನನೆ ಕೊಡತತ್ ಕೇಟೋಳಿರ ಚಂಗಪ್ಪ ಕೊಡಗ್‌ರ ಕಮಿಷನರ್ ಕೊಡಗ್ C ಪ್ರಾಂತ್ಯ ಆಯಿತಿಪ್ಪಕಂದ್ ಓದುವಯಿಂಗಕ್ ಪ್ರಶ್ನೆ ಬೋಂಡ. ಅಕ್ಕ

ಇಂಜ ಪರಜನ ಭಾಗಮಂಡ್ಲ ತಲಕಾವೇರಿ ಪಟ್ಟಮ, ಕೊಡವ ವಿದ್ಯಾವಂತಂಗ ಕೊಡಗ್‌ಲುಳ್ಳವು ಪೊರಮೆ Estateಲ್ ಪದವಿಲಿಂಜವು, ಮಿಲ್ವಿಲ್ ಆಫೀಸರ್ ಆನಯಿಂಗ ಅಪ್ಪಯ್ಯಂಗ್ ಒತ್ತಾಸೆ, ಕೈಕ್ ಪಣ ಕೊಡ್‌ತಿತ್, ಇಲ್ಲೆಂದ್ ಇಲ್ಲೆ. ಆಚಿಂಗ್ಲೊ ಒರ್ ಸಮಾಜ ಎಣ್ಣ ಪಿಂಞ ಕಲೆ, ಸಂಗೀತ ಸಾಹಿತ್ಯತ್ ಉಳ್ಳವನ 10 ಆಳ್‌ರ ಸಮಾಜ ಒಬ್ಬನ ಬೊಳೆತಿಯವಂಡೊಂದ್ ಎಣ್ಣಾವದೊ ಇದಂಡ ಅವಶ್ಯಕತೆಯು ಬದ್‌ಕ್‌ಲ್ ಬೊಂಡು ಎಣ್ಣಾವದ್ ಕೊಡವಡಲ್ಲಿ ಇಲ್ಲೆ. ಈ ತರತರ ಜನಾಂಗ ಆನಾಂಗ್ ಚೆಕ್‌ಕೇರ ಅಪ್ಪಯ್ಯಂಗ್ ಸಂಗೀತ ಮಾಡಿತ್, ಮಾಡಿ ಮನೆ ಕೆಟ್ವಕ್ಕಾಯಿತ್ತಿಲ್ಲೆ. ಆಸ್ತಿ ಎಡ್‌ತವ ಕೈಂಜಿಲೆ. ಉಳ್ಳಾನೊ ರೂಪಿಚಿಟ್ಟವಕ್ಕಾಯಿಲೆ. ಒರ್ ಆಳ್ ತೂಕ ಲೆಗ್ ಹಾರ್ಮೋನಿಯಂ (Leg Hormonium) ಎಡ್‌ತಂಡ್ ಗಂಟೆ ನೇರ ಪಾರ ಕಾತ್ ಬಸ್ ಪತ್ತಾವದ್ ಜನಕ್ ಮಾತ್ರ ಗೊತ್ತಿಂಜಿಯೆ.... ಅವಂಡ ಒಳ್‌ಲ್ ವಾಸ ಉಳ್ಳ ಶಾರದನೆ ಏರ ಕೊಂಡಾಡಿತ್ ಮಿಂಞತ ಪೀಳಿಗೆಕ್ ಸಂಗೀತ, ಇಲ್ಲೆ ಸಾಹಿತ್ಯತ್ ಮಿಂಞಕ್ ಬಪ್ಪಕುಳ್ಳ ಬಟ್ಟೆ ಮಾಡ್‌ಲೆ. ಅಪ್ಪಯ್ಯಂಡ ಬಿಸಿ ಚೋರೆರ ಸಮಯ, ಮಂಡೆದುಂಬಿತುಳ್ಳ ಜ್ಞಾನ, ವಿದ್ಯೆ, ಗುರುರ ಆಶ್ರಯತಾರ ಬೀರ್ಯ ಇಂಜಾಂಗ್ ಕುಗ್ಗಲೆ. ಮನೆಕ್ ಬಂದ ಅಪ್ಪಯ್ಯ ಆದ್ಯ ಸಿನೇತಕಾರ ರಾಮಕೃಷ್ಣಯ್ಯ, ನಾರಾಯಣ ಇಂಗಡ ಚರ್ಚೆಲ್ ಟಿಪಾಲ್ ಅಯಿಚಿತ್ 1936-37ಲ್ ಬೊಂಬಾಯಿಂಜ ನಲ್ಲ ಒರ್ ಹಾರ್ಮೋನಿಯಂ ಎಡ್‌ತ ಬಪ್ಪಿಚಿಡ್‌ವಕ್ ತಿಂಗ ಆರ್ ಕಯಿಂಜಿಪೋಚಿ. ಆಂಡ ಕಂಪನಿರ ಪೆದ ಕಲ್ಯಾಣ್‌ಜೀ -ಆನಂದಜೀ -ವರ - ಈ "ಮಹತಾಯಿ" ಅಪ್ಪಯ್ಯಂಡ ಆರ್ ಮಕ್ಕಳ ಪೊಣ್ಣ್ ಅಪ್ಪನೆರವಂಡ ಅಕ್ಕಿನೊ ಸುಮಾರ್ 27 ಕಾಲ ಚಾಕ್‌ಚಿ. ಕೊಡಗ್‌ಲ್ ನಂಗಡವು ಎನ್ನನೆ ಸಂಗೀತ ವಿದ್ಯೆಕ್ ಹೊಂದುವವು ಅಲ್ಲವೊ ಅನ್ನನೆ ವಾದ್ಯತಾರ ಕೊಡ ವಾತಾವರಣವೂ ಹೊಂದಾಣಿಕೆ ಇಲ್ಲೆ.

ಎನ್ನಂಗೇಣ್ಣವ ಎಣ್ಣಕ ಪ್ರತಿ ಮಳೆಗಾಲತ್ ತಬಲ, ಹಾರ್ಮೋನಿಯಂ, ವೀಣೆರ ಮಿರಡೆ (ಮಂಡೆ) ಅಂಟಚಿಟ್ಟದ್ ಕೋಟಕ್ ಬುಟ್ತ್ ಪೋಪ. ಅನ್ನನೆ ಆನ ಪಿಂಞ ಕೈಮುರಿಂಜನ್ನನೆ ಒಂದೂ ಮಾಡಿಯವ ಕೈಯ್ಯುಲೆ. ಮನ್‌ಸಂಗ್ ಹಾರ್ಟ್ ಅಟ್ಯಾಕ್ ಆಯ್ತ್ ಬುದ್ದನ್ನನೆ ಸಂಗೀತಕಾರಂಡ, ಕಲೆಗಾರಂಡ ಪರಿಸ್ಥಿತಿ. ಇಂಞಿ ಬೇನಿಲ್ ಕಷ್ಟತ್ ಬಸ್ಸಕ್ಕಾರಳ ಒಪ್ಪಿಚಿಟ್ಟ್ ಕೊಡಿಕ ತಟ್ಟತೆ ಮುಟ್ಟತೆ ಬಸ್ಸಲ್ ಇಡ್‌ವದೇ ಒರ್ ಬಲ್ಯ ಮಂಡೆನೊಂಬಲ. ವಾದ್ಯ ಗಾಯ ಮುರಿ ಆನಕ ವೇದಿಕೆಲ್ ಪಾಳಾತರತ ಕಾಂಗತನ್ನನೆ ಕಾಪಾಡುವದ್ ಪೆರ್ತ್ ಮುಖ್ಯ. ಇನ್ನನಾಯ್ತ್ ಬಸ್‌ಂಜ ಉಳ್‌ಪವೂ ಕೊಡಿಕಡ್‌ವಕ್ ಆಳಾಕಾಳ ತೇಡ್‌ವೊ. ಇದ್‌ನೆಲ್ಲ ಸಹಿಸಿತ್ ಸಂಗೀತ ದಿನಲೂ ಅಭ್ಯಾಸ ಮಾಡಿಯಂಡ್, ಪಾಟ್ ಕೇಳೀಂದ್ ತಾನಾಯ್ತ್ ತಿರೊಂಡಲ್ಲತೆ, ಒರ್ ಸಂಗೀತ ಕಚೇರಿ ತಾರೀಂದ್ ಕಾಲಕ್ ದಂಡ್ ನಾಡ್ ಊರ್ ಕಾಕಿತ್ ಮಾಡ್‌ಲೆ. ಪಿಂಞ ಅವಶ್ಯಕತೆ ಇಲ್ಲ. ಎರ್ಚಿ ಕಳ್ಳ ಬೋಟೆ ಇದ್‌ಂಗೇ ಜಾಸ್ತಿ ಎಡೆ ಆನ ಜನಾಂಗತ್ತ್‌ಲ್ "ಕಷ್ಟತಾರ" ಬಳ್ಳಿ ಪಬ್ಬುವಕ್ ಆದ್ಯ ಕೊಡವ ಜನಾಂಗತ್ತ್‌ಲ್ ಕಲಾವಿದನಾನ (ಪಂಡಿತ ಅಪ್ಪಯ್ಯನ) ವನ ಚಪ್ಪರವೇ ಮಾಡಿಯಂಡತ್. ವೀಣೆರ ತಂತಿ ತುಂಡ್‌ನ ಪಿಂಞ ಇಂಞೊಂದ್ ಇಡ್‌ವಕ್ ಮೈಸೂರ್‌ಂಜ ಕೊಂಡ ಬಂದಿತಾಂಡು. ಒರ್‌ದಿನಕ್ ದಂಡ್ ಬಸ್ಸ ಪೊಲಾಕ ಪೋಪ ಇಂಜ ಕಾಲ. ದಯಬೆಚ್ಚಿತ್ ಓದುವವು ಆ ಪಂಡೇತ ಕಾಲ ನೇರ ವಾತಾವರಣತ್‌ನ ಮನತ್ ಬೆಚ್ಚಂಡ್ ಓದ್‌ನಕ ಮಾತ್ರ ಅದೇ ನೇರ ಆಪೊ. ಕೊಡವಕ್ ಎಳ್ಳೆವಂವ ನಾಕೂ ಇಂದ್ ಮೈಸೂರ್ ಅಡಿಗೆ ಮನೆ ಬಾಡೆ ಆಯ್ತುಂಡ್, ಆಚೆಂಗಿ ಅಂದೇತ ಆ ಕಷ್ಟ ಆ ನೈಪು ಪಟ್ಟಂಡ್ Coorg Starಂದ್ ಸರಕಾರತ್ತ್‌ಂಜ ಬಿರ್‌ದ್ ಪಡುವೇಂಗಿ ಎಂತ ಬಲ್ಯ ಸಾಧನೆ ಅದ್! ಅರ್ಥ ಆಪದಿಲ್ಲೆ.

ಇನ್ನನೆ ಬೊಂಬಾಯಿಂಜ ಹಾರ್ಮೋನಿಯಂ ಪಣಕೆಟ್ಟಿತ್ ಆರ್ ತಿಂಗ

ಕಯಿಂಜದು ಬಾತ್. ನೇರೆ ಅಪ್ಪಯ್ಯನು ಹಾರ್ಮೋನಿಯಂ ಆದ್ಯ ತಲಕಾವೇರಿಕ್ ಪೋಚಿ. ಭಾಗಮಂಡಲತ್ತಿಂಜೆ ಮೆರವಣಿಗೆ ರನ್ನನೆ ಜನಕೂಡಿಯಂಡ್ ಹಾರ್ಮೋನಿಯಂನ ಆಳಣ್ಣ ಮಂಡೆಲ್ ಬೆಚ್ಚಿ ಕಾವೇರಿ ಕುಂಡಿಕೆರ ಬರಿಲ್ ಬೆಚ್ಚಿತ್ ಮಹಾ ಬಲ್ಯ ಪೂಜೆ ನಡಂದಿತ್ ತಲಕಾವೇರಿಲ್ ಆದ್ಯ ಸಂಗೀತ ಕಾರ್ಯಕ್ರಮ, ಅಮ್ಮೆ ಕಾವೇರಿಕ್ ಬಪ್ಪಿಚಿಟ್ಟತ್. ಮೋಂವನಾನ ನಾನ್ (ತ್ಯಾಗರಾಜ) ಅಪ್ಪಂಗ್ 1979ಲ್ ಕಾವೇರಿಲ್ ಪಿಂಡ ಬೆಪ್ಪಕ್ ಪೋನಲ್ಲಿ ನಾಡ ಪೆದ ಅಪ್ಪಂಡ ಪೆದ ಕೇಟ, ಕೇಳಿಪಟ್ಟ ಅರ್ಚಕ ಶ್ರೀ ಗೋಪಾಲಚಾರ್, ಎಲ್ಲ ನಾಡ ಕೂಡೆ ಪರಂದ್ ತೇತತ್. ಅಪ್ಪಯ್ಯನ ಗೇನ ಮಾಡ್ಚಿ. ಇನ್ನನೆ ಎಣ್ಣೆಚಿ. "ಅಂತ ಜನ ಆ ಬೋಜ, ಆ ಗತ್ತರ ನಡೆ, ತಕ್ಕ್ ಬಾಕ್ರ ಪುದತ್ತರ ಮನ್ಸಂಗ ಸದ್ಯಕ್ ದಾರೂ ಇಂಚಿ ಈ ಮಣ್ಣೆಕಿಲ್ಲೆ, ಆ ದೇವಿರ ಪಾದಕ್ ಸೇರಾನ ಅಯಿಂಗಕ್ ಶಾಂತಿ ಎಂದೂ ಇರಡ್"ಂದ್ ದೇವಿರ ಕುಂಡಿಕೆಕ್ ಕೈತೊತ್ತಂಡತ್. ಚೆಕ್ಕೇರ ಅಪ್ಪಯ್ಯನ ಆ ನೇರತ್ ಚತ್ತ ಪೋನಲ್ಲಿಯೂ ಆ ಪುಣ್ಯ ನೆಲತ್ ಇನ್ನನೆ ಎಣ್ಣೆವಾನ ಕೇಪಕ ತೀರ್ಥತ್ತರ ಮಳೆ ಬುದ್ಧನ್ನನೆ ನಾಕ್ ಆಚಿ. ಅಪ್ಪಾ! ನಂಗಕ್ ಆಸ್ತಿ ಪಾಸ್ತಿ ಏರ ಇಂಜಿಲೆಂಗ್ಲೂ ನೀಡ ಮಕ್ಕ ನಂಗಕ್, ನೀಡ ಪೆದವೇ ಆಸ್ತೀಂದ್ ಮನ ಬೆಚ್ಚಿ ದೇವಿ ಕಾವೇರಿನ ತೊತ್ತಂಡ. ಅಪ್ಪ ಸ್ವರ್ಗವಾಸ ಆಯ್ತ್ 28 ಕಾಲ ಆನಕಲು, ನಾನ್ ಮೋಂವ ವೇದಿಕೆಲ್ ಆಕಾಶವಾಣಿಲ್ ಕಾರ್ಯ ಕ್ರಮ ಕೊಡ್ತಾನ ಕೇಟವು ನನ್ನ ಕಂಡಿತ್ ನಾಡ ಅಪ್ಪಂಡ ವಿಚಾರ ಇನ್ನನೆ ಎಣ್ಣೆವ. ದುಂಬಾ ವಿದ್ಯಾವಂತಂಗ ಕೊಡವತಿಯಳೂ, ಪೊರಮೆ ಬಲ್ಯ ಚಾಕರಿಲ್ ಇಂಜಯಿಂಗಳೂ "ಮೋನೆ ನಂಗ ಚೆಕ್ಕೇರ ಅಪ್ಪಯ್ಯಂಡ ಕೈಲ್ ಸಂಗೀತ ಪಾಠ ಚೆರ್ಪತ್ತಲ್ ಎಣ್ಣೆಚಿಟ್ಟವ ಇಂಜತ್. ನಂಗಡ ಕಾನ್ವೆಂಟ್ಕ್ ಬಪ್ಪಿಂಜತ್. ಮಂಡೆಲ್ ಜುಲ್ಪರ ಆ ಸ್ಕೆಲ್ ನಂಗ ಇಂದೆಕೆತ್ತನೆ ಆ ಬೋಜ, ನೆತ್ತಿಲ್ ತಿಲಕ, ಆ ಕಣ್ಣ್ ಕನ್ನಡಿ, ಎದೆಲ್

ಮೂಂದ್ ಪೊನ್ನಾರ ಮೆಡಲ್ ಎಲ್ಲಿಯೂ ಕಂಡ್ಲೆ. He is one of the great mucisions in Kodagu & Kodava Jananga. His guru B. Devandrappa highly noted from Mysore maharaja and kept in "Darbar Sangeetha Koota1" at Aramane, Mysore" ಇನ್ನನೆ ಎಣ್ಣಾವದ್ ಇಕ್ಕಲೂ ಉಂಡ್. ಅನ್ನನೆ ಶ್ರೀ ಬಿ. ದೇವೇಂದ್ರಪ್ಪಂಡ ಗುಡಿಕ್ ಪೂಜೆಯೂ ಕಾಲಕ್ಕೊಮ್ಮೆ ಅಯಿಂಗಡ ಬಲ್ಯ ಆರಾಧನೆ ಇಂದೂ ಆಯಂಡುಂಡ್.

1935ಲ್ ಗುರುರ ಆಶೀರ್ವಾದ ಸಂಪೂರ್ಣ ಎಡ್ತಂಡ್ ಬಂದ ಅಪ್ಪಯ್ಯ ಸಿನೇತಕಾರ ರಾಮಕೃಷ್ಣಯ್ಯಂಡ ಕೂಡ ವಿಚಾರ ಮಾಡಿತ್ ಮನೆಂಜ ಪಿಂಞ ಗೊತ್ತುಳ್ಳ ಚಾಕರಿಕಾರಡ ಕೈಂಜ, ಸಿನೇತಕಾರಡ ಕೈಂಜ ಇನ್ನನೆ ಪಣ ಜೊತೆ ಮಾಡಿತ್ 375-00 (1936)ಲ್ ಉರ್‌ಪಿಯತ್‌ರ ಹಾರ್ಮೋನಿಯಂ ಆರ್‌ತಿಂಗ ಕಯಿಂಜಿತ್ ಮನೆಕ್ ಬಂದ ಪಿಂಞ ನೇರೆ ತಲಕಾವೇರಿಕ್ ಪೋಚಿ. ಚೆರಿಯ ಒರ್ ಮೆರವಣಿಗರನ್ನನೆ ಭಾಗಮಂಡಲತ್ತಿಂಜ ತಲಕಾವೇರಿಕೆತ್ತನೆ ಜನ ಪೋಯ್ತ, ಕಾವೇರಿ ಕುಂಡಿಕೆರ ಮಿಂಞ ಬೆಚ್ಚಿತ್ ಪೂಜೆ ಆನದು, ಆ ನೆಲತ್‌ಲೇ ಪೆರ್ತ್ ನಲ್ಲ ಕಾರ್ಯಕ್ರಮ ಒಪ್ಪಿಚಿಟ್ಟಿ ಅಪ್ಪಯ್ಯಂಡ ಪೆದ, ಅಂದ್‌ಂಚೇ ದಿಕ್ಕೊಪ್ಪಡ್‌ಚಿ, ಬೊಳಿ ಪಾಯ್ಡ್ ಸುರು ಆಚಿ. ಇನ್ನನೆ ದಿನಕಯ್ಯಣೆ ದೇಶಕ್ ಸ್ವತಂತ್ರ ಇಲ್ಲತೆ ಒದ್ದಾಡಿಯಂಡಿಂಜ ಆ ಕಾಲ, 2ನೇ ಮಹಾಯುದ್ಧ ಪುನಾಲು ಸುರು ಆನ ಆ ಸಮಯ! ವಿಚಿತ್ರವಾನ ವಾತಾವರಣ ಭಾರತತಿಂಜಕಲೂ ಮಹಾತ್ಮ ಗಾಂಧೀಜಿರ ಪ್ರಭಾವ ಕೊಡಗ್‌ರ ಬಾಂಗಾಡ್ ಮೂಲೆಕೂ ಎತ್ತಿತ್ ಇಲ್ಲಿಯತ ಬಿಸಿ ಕೊಡವಕ್ ಅಲ್ಲತೆ ಇತರ ಜನಾಂಗತ್‌ರಯಿನೊ ನೀಂಬಿತ್ ಎಪ್ಪಚಿ. ದೇಶತ್‌ರ ಪುಡ್‌ತತನ ಬ್ರಿಟಿಷಡ ಕೈಯಿಂಜ ಬುಡ್‌ತ್‌ವಕ್ ಬಾಲೆಕಾರಡೊ, ಎಡೆಬಯತ್‌ಕಾರಡೊ, ಕೂಟ್ ನಾಡ್‌ಲೂ ತಾಲೋಕ್‌ಲೂ ಏರ್ಪಾಡ್ ಆಯ್ತ ತಾಂಡ ರಕ್ಷಣೆಲೂ

ಗುಟ್ವಾಲೂ ಕೆಲಸ ಸುರು ಆಯಿತಿಂಜತ್. ಪೊನ್ನಂಪೇಟೆಲ್ ಮಹಾತ್ಮ ಗಾಂಧಿರ ಭಾಷಣ ಕೇಟತ್. ಕೊಡಗ್‌ರ ತಾಲೋಕು ತಾಲೋಕಾರ ಜನ ದೇಶಕ್ಕಾಯ್ ತಡಿ ಮನ ಪ್ರಾಣ ಅರ್ಪಣೆ ಮಾಡಿತಿಂಜತ್. ಅದಲ್ ಚೆಕ್ಕೇರ ಅಪ್ಪಯ್ಯನು ಒಬ್ಬ. ಸಂಗೀತ ವಿದ್ಯೆರ ಇಂಪು ತಡಿಲುಳ್ಳಾಂಗ್ ಪಿಕೆಟ್ಟಿಂಗ್‌ಲ್ ಮೆರವಣಿಗೇಲ್ ಮೆಗಾಪೋನ್ ಕೊಡ್‌ತಿತ್ ಕ್ರಾಂತಿರ ಬಿಸಿ ದುಂಬ್‌ಚಿಡುವ ಪಾಟ್‌ಕ್ ಅಪ್ಪಯ್ಯನ ಎಕ್ಕಾಲು ಮಿಂಞ ಆಕುವ ಇಂಜತ್.

ಇನ್ನನೆ ಪೊಲಾಕ ನೇರತೆ ವೀರಾಜಪೇಟೆರ ಮೀನ್‌ಪೇಟೆ ರೋಡ್‌ಂಜ ಕೊಡಿಕ್ (ಟ್ರಾನ್ ಮದ್ಯಕ್) ಪಾಡಿಯಂಡ್ ಮೆರವಣಿಗೇಲ್ ಕೂಡಿ ನಡ್‌ಂದಂಡಿಂಜತ್. ಅದೇ ಸಮಯಕ್ ಚೆನ್ನ ತಿಂಗ ಬಯ್ಯ ಈ ದೇಶತರ ಸರ್ವ ಜನಾಂಗವೂ ಇಂದು ಗೇನ ಮಾಡಿಯಂಡುಳ್ಳ ಇರ್‌ಂಬ್ ಬಾಲೆಕಾರ 'ಭಗತ್‌ಸಿಂಗ್‌ನ' ಪಾಸಿಕ್ ಕೊಡ್‌ತ ಬ್ರಿಟೀಷ್‌ಕಾರ ದೇಶಯಿಡೀ ಬಾರಿ ರಗಳೆ ಆಯಂಡಿಂಜತ್. ಅನ್ನತ ನೇರತ್‌ಲೇ ಚೆಕ್ಕೇರ ಅಪ್ಪಯ್ಯ ಭಗತ್‌ಸಿಂಗ್‌ರ ಪೆದತ್ತರ ಪಾಟ್‌ನ ಪಾಡಿಯಂಡ್ ನಡ್‌ಂದಂಡಿಪ್ಪಕ ಅಲ್ಲಿಯೇ ಕೈಕೋಳಯಿಟ್ಟಿತ್ ಕಣ್ಣಾನೂರ್ ಜೈಲ್‌ಕ್‌ಟ್ಟತ್. ಅಪ್ಪಯ್ಯಂಗ್ ಸಂಗೀತ ಸಾಧನೆ ಮಾಡುವ ಒರೇ ಗೇನತ್ ಜೈಲ್ ಆನ, ಚಿಂತೆಲ್ ಚಾಮುಂಡೇಶ್ವರಿರ ಅನುಗ್ರಹ ಎನ್ನೊ ಒನ್ನಾಂದ್ ಜೈಲ್‌ಂಜ ತಪ್ಪಿಚಿಟ್ಟಂಡ್ ಕಣ್ಣಾನೂರ್‌ಂಜ ಕೊಡಗ್ ಸೇರಿತ್, ಲಾಯರ್‌ನೊಂಡ್ ಸಂಗೀತ ವಿದ್ಯೆಕ್ ಪೊಯ್ಯಾಕತೆ ಮುಕ್ತನಾಚಿ.

ಹುದಿಕೇರಿಲ್ ಅಪ್ಪಯ್ಯಂಡ ಸ್ವಂತ ಸೈಕಲ್ ಶಾಪ್ ಇಂಜತ್. ಬಾಳ್ ನೀಸುವ ಸಮಯತ್‌ಲ್ ಕಣ್ಣಾನೂರ್ ಜೈಲ್‌ಲ್ ಆಯ್ ಸೈಕಲ್ ಎಲ್ಲಾ ಪಾಳಾಯ್ ಒಂದೂ ಇಲ್ಲತಾಚಿ. ಸಂಗೀತತರ ಸಾಧನೆ ಮನೆಲ್ ಮಾಡಿಯಂಡ್, ಸಂಗೀತ ಸಂಗತ್‌ಲೇ ಇಪ್ಪಕ್ ತಾಂಡ ಮನಸ್ಸಲ್ ಗೇನ

ಮಾಡಿಯಂಡೇ ಕೊಡಗಲ್ ಸಂಗೀತ ಕಚೇರಿ ಮಾಡಿಯಂಡಿಂಜ ಅಪ್ಪಯ್ಯನ, ಆ ಕಾಲತ್ 8ನೇ ಕ್ಲಾಸ್ ಪಡಿಚವ, ಬೇತುಗ್ರಾಮಕ್ಕಾರತಿ ಮಕ್ಕಿ ಸಾರ್ಥಾವುರ ಅನುಗ್ರಹಕ್ ಅಡಂಗ್‌ನವ, ಅಪ್ಪನೆರವಂಡ ಶ್ರೀ ಮೇದಪ್ಪಂಡ ಸೀತಮ್ಮಂಡ ಮೋವ ಹರದಾಸ ಅಪ್ಪಚ್ಚ ಕವಿರ ಕರ್ ಮೋವಳಾನ ಅಕ್ಕಿ ಅಕ್ಕಮಂಡ ದೃಷ್ಟಿಕ್ ಬುದ್ಧಿತ್ ಅಪ್ಪಯ್ಯನ ಕೊದ್‌ಚಿ 1944ಲ್ ಹಠ ಪುಡಿಚಿ ಮಂಗಲಾಚಿ. ಅಕ್ಕ ಮೇಂದಲೆಂಜ ಕಿಗ್ಗಟ್ಪಕ್ ಏರ ಪೊಣ್ಣ್ ಮಣ್ಣ್‌ರ ಸಂಬಂಧ ಇಂಜಿಲೆ. ಇಕ್ಕತ್‌ರನ್ನನೆ ಕಾರ್ ಜೀಪ್‌ರ ಕಾಲ ಅಲ್ಲತಾನಗೊಂಡೂ, ಏರ ದೂರ ಆನಾಂಗೂ ಅಪ್ಪ ಅಪ್ಪ ತಡೆ ಮಾಡಿತ್ ಹಠ ಮಾಡಿತ್ ಮಂಗಲ ಆಚಿ. ಚಾಯಿಕಾರ ಅಪ್ಪಯ್ಯಂಗ್ ಚಾಯಿಕಾರತಿ ವೇಂದಲೆ ಜೋಡಿರ ಒಪ್ಪಲ್ ಸುಕತ್‌ರ ಕಡತ್‌ಲ್ ಮೀಂದಿಯಂಡಿಂಜತ್. ಭಗವಂತಂಡ ದಯತ್‌ಲ್ ಇಸವಿ 1945 ತಿಂಗ 8 ನಾಳ್ 21ಲ್ ಎಳ್ತಕಾರ ನಾನ್ ಆದ್ಯ ಕುಂಞಿಯಾನ. ಇನ್ನನೆ ನಾಕ್ 3 ವಯಸ್ಸರ ಸಮಯತ್ ಅಪ್ಪಯ್ಯನ ಜೈಮಿನಿ ಸ್ಪುಡಿಯೋ ಮೆಡ್ರಾಸ್‌ಕಾರ ಗುರತ್ ಮಾಡಿತ್, ಅಕ್ಕ ಸಿನೇಮಾ ಸಂಗೀತಕ್, ಹಿನ್ನೆಲೆ ಹಾರ್ಮೋನಿಯಂ, ವೀಣೆರ, ಸ್ವರ ಮೇಳಕ್ ಕಾಕಿತ್ ಪೋಯಿಂಜತ್. ಇಕ್ಕತ ಪೋಲೆ ಟೇಪು Sound System, Computer, DVD MP3, Digitelರ ಕಾಲ ಅಲ್ಲ. ಪ್ರತ್ಯಕ್ಷ ಹೀರೋ ಹೀರೋಯಿನ್‌ರ ಬರಿ ಬರಿಲ್ ಸಂಗೀತ ಸ್ವರ ನುಡಿಸಂಡು. ಇನ್ನನೆ ಕೆಲಸ ಆಯಂಡಿಪ್ಪಕ ಸಿನೇಮತ್‌ರ Director, Producer ಬಂದಂವ ಅಪ್ಪಂಡ ಎಲಂಗುವ ಕೊಡವ ಕುಂಞಿರ ಗತ್ ಒತ್ತರ ಮೂಡ್ ಅಪ್ಪಟ ಸಂಗೀತಕಾರ ರಾಜ ದರ್ಬಾರ್‌ಲ್‌ಪ್ಪಯಿಂಡಾಂಗಿಂಜ ಮುಂದ್‌ನ ಉಡ್‌ಪ್ ತೊಡ್‌ಪ್‌ಲ್, ಬೋಳೆ ಕೆಮಿಮುಚ್ಚನ ಚಾಯಿ ಜುಲ್ಪರ 37 ಬಯತ್‌ರ ಬಾಲೆಕ್ಕಾರನ ಕಂಡ್ ಹೊಟ್ಟೆಕಿಚ್ಚಿಲ್ ಮಂಡಲ್ ತಲಮಿ ಊಕುವಂಜಿ ಕೆಮರತಳೇಂದ್

ಆರ್ಡರ್ ಮಾಡಿಚಿ. ಅಪ್ಪ ಅಕ್ಕಲೇ "ಏಯ್! ಎನ್ನುಯಿರ್ ಪೋನಾಲು ಪೋಗಟ್ಟುಂ. ಎಮ್ಮಡಿ ಇದ್ ರಾಗಂ ತಾನಂ ಪಲ್ಲವಿ ಕೊಯ್ತ ದೇವಿ ಶಾರದೆ ಮುಡಿಲ್ ಇರ್ಪಾಂಗೊ" ಎಣ್ಣೆತ್ ಅಂದೇ ಆ ಜಾಗ ಬುಟ್ಟತ್. ಏರ ಪಿಂಞ ನೇರಾನ ಸತ್ಯತ್ ಅಭಿಮಾನಗೊಂಡ್ ಸಂಪಾದನೆಕೂ ಪೊಯ್ತಾಚಿ. ಚೆನ್ನ ಸಮಯ ಮೆಡ್ರಾಸ್‌ಲ್ ಇಂಜತ್. 1946 ಂಗ್ ಮಿಂಞ ಪುನಃ ಮನೆಕ್ ಬಂದತ್. ಪರಿಸ್ಥಿತಿ ಎಲ್ಲಿಕೆತ್ತಾಚಿ ಎಣ್ಣಕ ಅಪ್ಪರ ರೈತ ಜೀವನಕ್ ಮೊಟ್ಟೊಡ್‌ವನ್ನೆಕೆಯೂ ಅಲ್ಲ. ಸಂಗೀತ ಬುಡವನ್ನೆಕಲ್ಲ. ಸಂಗೀತತಾರ ಏರ ಪಲವೂ ಇಲ್ಲತಾಚಿ. ಕಾಲ ಒಂದ್ ದಂಡಾಂಗೊಂದ್ ಆರ್ ಮಕ್ಕಳೂ ಆಚಿ. ಕೊಡಗಲ್ ಅಕ್ಕ ಮೆಲ್ಲೆ ಕೈಲ್ ವೈಂಡ್ (wind) ಮಾಡಿತ್ ತಟ್ಟೆ ಬೆಚ್ಚಿತ್ ಪಾಡ್‌ಚಿಡುವ Gramo Phone ಲಗು ಶಾಸ್ತ್ರೀಯ ಸಂಗೀತ ಸಿನೇಮ ಪಾಟ್ ದೂರ ದೂರ ಕೇಪಯಿಂಜತ್. ಪೊರೆ ಬಾರತ್ತಾರ ಲೆಗ್ಗ ಹಾರ್ಮೋನಿಯಂ ಆಳ್‌ರ ಕೈಲ್ ಪೊರ್‌ತಂಡ್ ಕೊಡಗ್‌ರ ಕಾಡ್‌ರೊಳ್‌ಲಿಂಜ ಪೇಟೆ ಕೋಟೆರ ಸ್ಕೂಲ್‌ಕ್ ಸಂಸಾರ ಪೋತುವಕ್ಕಾಯಿತ್ ಪಾಡ್ವದಿಂಜತ್. ಮಳೆಗಾಲತ್ತಲ್ 3 ತಿಂಗ ಎಲ್ಲಿಕೂ ಪೋಯವ ಕೈಯ್ಯತ ವಾತಾವರಣ. ಅದ್‌ಂಗ್‌ಂಜ ಮಿಂಞ ಬೇನಿಲ್ ಅಪ್ಪ ಒಬ್ಬನೇ ಬಲ್ಯ ಬಲ್ಯ ಪುಳ್ಳಿ ಕುಟ್ಟೆ ಕಾಡ್‌ಂಜ ನಿಪ್ಪಲ್ ಪೊರ್‌ತ ಬಂದಿತ್ ಇಡ್‌ವದ್, ಒಡಪದು ನಾನ್ ಕುಂಞಿಲೇ ಕಂಡ ಗೇನ ಇಂದೂ ಉಂಡ್. ಆಡ್‌ರ ಬೆನ್ನಲ್ ಅಳತ್ ಸ್ಕೂಲ್‌ಕ್ ಪೋಯಂಡಿಂಜ ಅಪ್ಪಯ್ಯಂಗ್ ಕಾಡ್‌ಂಜ ಪುಳ್ಳಿ ಕುಟ್ಟೆ ಮಂಡಲ್ ಬೆಪ್ಪ ಸಮಯ ಬಾತ್. ನೇರಾನ ವಿದ್ವಾಂಸಂಗಡ, ಜ್ಞಾನಿಯಡ ಮುಂಬ್‌ಲಳತ್ ಇಡೀ ಸಂಗೀತ ಶಾಸ್ತ್ರತಾರ ಏದೋರ್ ಭಾಗತ್‌ನೊ ಚಾಯೋಡೆ ಬಾಯಿಲ್ ಕೈಲ್ ರಾಗ, ಲಯ, ತಾಳತ್ ಅಪ್ಪಯ್ಯ ನೀರ್‌ರನ್ನನೆ ನೀಸುವವಂಗ್ ಸಂಸಾರ ಭಾರ ಆದ್ಯವಾಯಿತ್ ತೊಂಡೆ ಮುರ್‌ಕಾಚಿ. ದೇವಿ ಶಾರದೆರ ಕೈಲ್ ಕಾಂಬ ಸರಸ್ವತಿ ವೀಣೆರ ಬದಲ್

ಕೈಲ್ ಕೊಡಲಿ ಮತ್ತ, ಕತ್ತಿ ಪುಡಿಪಕಾಚಿ. ಇಂದ್ ಟಿ.ವಿ.ಲ್ ಕ್ಯಾಸೆಟ್‌ಲ್ ಕಾಂಬ ಕೇಪ ಪರ ಜನಾಂಗತಾರ ಸಂಗೀತ ವಿದ್ಯವಾಂಸಂಗಕ್ ಬಲ್ಯ ಗಾಳಿ ಕೂಡ ತಟ್ಟುಲೆ. ಅಪ್ಪಯ್ಯ ಮಹಾ ಬಲ್ಯ ಸಂಗೀತಕಾರ ಕರ್ನಾಟಕತೇ ಇಲ್ಲತಂತ ವ್ಯಕ್ತಿತ್ವ ಇಂಜಕಲೂ ವಿಧಿರ ನಿಯಮ ಬೋರೆ ಆಯ್ ನಾಡ ಅಪ್ಪ, ಈ ನಾಡಾರ ಸ್ವಾರ್ ಅಪ್ಪಯ್ಯ ಪೆರ್ತ್ ಬಡತನಕ್ ಒಳಗಾಚಿ. ನಾಡವ್ವನು ಪುಣ್ಯತಾಯಿ ಚಾಯಿಲೂ ಆಜ ಬೋಜತ್‌ಲೂ ಹರದಾಸಂಡ ಕಿರ್ ಮೋವಳಾಯ್ ಜ್ಞಾನತಾರ ಮೂಲತ್ತಿಂಜ ಬಂದವಳಾನ ನಾಡ ಅವ್ ಶಿಸ್ತ್, ಸತ್ಯ, ಪ್ರಾಮಾಣಿಕತೆರ ಕೂಡ ಅವ ಆಯಿತಿಂಜತ್. ಮಾನಿಷ್ಟೆ ಅಕ್ಕಿ, ನಡುಮನೆಲ್ ಪೊರಮನೆಲ್ ಅಕ್ಕಿ ಕೇಟಿತ್ ಮಕ್ಕಳ ಚಾಕಂಡಿಯಾಚಿ. ಮನೆಕಾರ ಅಕ್ಕತವು ಸಹಾಯ ಮಾಡ್‌ನದೂ ಏರ ಉಂಡ್. ನಾನ್ ಒರ್ ನೆಲ್ಲ್ ವ್ಯಾಪಾರಕಾರಂಡ ಪಕ್ಕ 1957ಲ್ ಅಪ್ಪ ಅಪ್ಪಯ್ಯ ಎಣ್ಣೆತ್ 5 ಉರ್‌ಪಿಯ ಕೇಟಂಡ್ ಬಾ ಮೋನೆ ನೀಲಗಿರಿ ಎಸ್ಪೀಟಾಕ್ ಮಾನಂದವಾಡಿಕ್ಕಾಲೆ ಪೋಪಿ. ಬಸ್ ಚಾರ್ಜ್ ಕೇಟಂಡ್ ಬಾ. ಬಂದ ಪಿಂಞ ಕೊಡ್‌ತಾರನಾ ಎಣ್ಣೆತ್ ಪೊಲಾಕಂಜಿ ಬೈಟಾಕನೆ 3 ದಿನ ಅಳ್‌ತಿತ್ ಕಯಿಂಜದು ಕಷ್ಟತ್‌ಲ್ 5 ಉರ್‌ಪಿಯ ತಾತ್ ಸಾವುಕಾರ. 3 ದಿನ ನಾಕ್ ಸ್ಕೂಲ್ ಇಲ್ಲೆ. ಅದೆಲ್ಲ ಇಂದೂ ಗೇನ ಉಂಡ್. ಇನ್ನನೆ ಅದೆಚ್ಚಕೊ ಪ್ರಸಂಗ, ಬಡತನ ಚುಟ್ಟ್ ಕರಿಚತ್ ನಾಡವ್ವನ. ಸಂಗೀತ ಪಡಿಪಕ್ ಏರ ಆಸೆ ಇಂಜ ನಾನ್ ಬಡತನತಾರ ಕಾವುಲ್ ಮಿಲ್ಕಿಕ್ ದೇವಡ ದಯತ್ ಆರನೆ ಕುರಿಕ್ ಅವಕಾಶ ಕ್ಕಟ್ಟಿಚಿ. ಕೂಡ್‌ನ ತಿಂಗ 12 ಕಯಿಂಜದೂ ಫ್ಯಾಮಿಲಿ ಅಲಾಟ್‌ಮೆಂಟ್‌ಲ್ ನಾಡ ಅವ್‌ಂಗ್ ತಿಂಗಕ್ 50 ಉರ್‌ಪಿಯ ಕೊಡ್‌ತತ್. ಚೆರಿಯ ವಯಸ್ಸಲೇ ನೊಂಬಲ, ಬಡತನ ಎರಕಿ ಕುಡ್‌ಚ ಅವ್ 49 ವಯಸ್ಸಲ್ Low B.P ಗೊತ್ತಿಲ್ಲತೆ ಚತ್ತ್ ಪೋಚಿ. ಈ ಕಷ್ಟ ಅಂದ್ 1948ಲ್‌ಂಜ ಸುರು ಆನದ್ ಅವ್ ಚಾವಕ 1978ಲೂ ನೆರಿ ಬುಡತೆ ಇಂಜತ್. ಅಪ್ಪ ಸಂಗೀತಕ್ ಈ

ಮಣ್ಣ್ ಎಣ್ಣ್ನದಲ್ಲ. ಅಪ್ಪ ಮೋನೆ ನೀಡ ಹೊಟ್ಟೆ ಪಾಡ್ಕ್ ಬೋರೆ ನೋಟ್ ಎಣ್ಣೆತ್ ನಾನ್ ಮಿಲ್ಟಿಕ್ ಪೋಂಡಿಯಾಚಿ. ಕೈಲಾನತಣು ಸಂಸಾರಕ್ ನಾನೂ ಮಾಡ್ತನ. ಆ ಕಾಲತ್ ಅಪ್ಪಯ್ಯಂಡ ಬಾಲ್ಯತ್ಲ್ ವಿದ್ಯೆನ ಕಣ್ಣಾರೆ ಕಂಡಿತ್ ಮೆಚ್ಚ್ಚನ Col ಚಿಂಡಮಾಡ ಮೊಣ್ಣಪ್ಪ Coorg Rest. Commanðer ಕಾಕಿತ್ ಮೆಡ್ರಾಸ್ (ಚೆನ್ನೈ)ಲ್ ಸಂಗೀತ ಕಚೇರಿ ಮಾಡಿಚಿಟ್ಟಿತ್, Field Marshal ಕಾರ್ಯಪ್ಪಜ್ಜ ಅಪ್ಪಯ್ಯಂಡ ಪೆರ್ತ್ ಅಭಿಮಾನಿ ಆಯಿತಿಂಜತ್. ಜನರಲ್ ಆಯಿಂಜಲ್ಲಿ ಕಾರ್ಯಪ್ಪಜ್ಜ ಅಪ್ಪಯ್ಯನ ಬೆಂಗಳೂರ್ ಆಕಾಶವಾಣಿಕ್ ಕಾಕಿತ್ ಪ್ರೋಗ್ರಾಂ ಮಾಡ್ಚಿಟ್ಟಿತ್ 1948ಲ್ ಕೊಡಗ್ ಚೀಫ್ ಕಮೀಷನರ್ ಕೇಟೋಳಿರ ಚಂಗಪ್ಪ ಅಯಿಂಗ್ ಚೆಕ್ಕೇರ ಅಪ್ಪಯ್ಯಂಡ ಪಾಂಡಿತ್ಯ ಪಡಿಪ್ಪು, ಆಳ್ ಭೂಷಣ ಕಂಡಿತ್ ಕೇಟಿತ್ ಗೇನಕಾಯಿತ್ ಈ ಮಣ್ಣಾರ ಬೀರ್ಯ ಬರ್ಕತ್ಕ್ಕಾಯ್ ಅಪ್ಪಯ್ಯಂಗ್ "ಕೂರ್ಗ್ ಸ್ಪಾರ್" ಬಿರ್ದ್ ಕೊಡ್ತಿತ್ ಸನ್ಮಾನ ಮಾಡ್ಚಿ. ಆಸ್ಥಾನ್ ವಿದ್ವಾನ್ ಬಿ. ದೇವೇಂದ್ರಪ್ಪನ ಮಡಿಕೇರಿ ಪಟ್ಟಮ ಅಧಿಕಾರಿಯ ದೇವಸ್ಥಾನ ಮುಕ್ರಿಯ ಕಾಕಿತ್ ಸಂಗೀತ ಕಚೇರಿರ ಮಾಡ್ಚಿಟ್ಟ ನೇರತ್ ಶಿಷ್ಯ ಚೆಕ್ಕೇರ ಅಪ್ಪಯ್ಯ ಗುರುಕ್ ಸಂಗೀತ ಸಾತಿ ಆಯ್ ಹಾರ್ಮೋನಿಯಂ ನುಡ್ಸಿತ್. ಅಕ್ಕ ಗುರು ಅಪ್ಪಯ್ಯಂಡ ಬಯ್ಯತ್ ನಿಂದಂಡ್ ಮಂಡೆಕ್ ಕೈ ಬೆಚ್ಚಿತ್ ಆಶೀರ್ವಾದ ಮಾಡಿಯಂಡ್ ಅಕ್ಕ ಕೂಡ್ನ ಜನಡ ಎದಿಕೆ ಇನ್ನನೆ ಎಣ್ಣೆ ಚಿ. ಈ ಕುಂಞಿನ 12 ಕಾಲ ಪೋತಿತ್ ಸಂಗೀತ ಧಾರೆ ಬೂಕಿಯ. ಕಾವೇರಿರ ಮಣ್ಣಲ್ ಈ ಕುಂಞಿನ ಪೋತ್ಯವ ಜವಾಬ್ದಾರಿ ನಿಂಗಡಾಂಡ್ ಸಭೆಲ್ 1939ಲ್ ಎಣ್ಣೆತ್, ಇನ್ನನೆ ಚೆಕ್ಕೇರ ಅಪ್ಪಯ್ಯಂಡ ವಿದ್ಯೆತ್ನ ಕೊಂಡಾಡ್ನ ನೇರ ಘಳಿಗೆ ಅವಂಡ ಬದ್ಕಲ್ ಅದೆಚ್ಚೆಕೊ ಕುರಿ ಅಪ್ಪಯ್ಯಂಡ ಪ್ರಾಣ ಸ್ನೇಹಿತ ಇಡೀ ಕಾವೇರಿ ಆಶ್ರಮತ್ ಜನ ವಿರಾಜಪೇಟೆಲ್ ನವರಾತ್ರಿರ ದಸರಾ ಸಮಾರಂಭತ್ ಹರಿಕಥೆ, ಸಂಗೀತತ್ ಸಮಯತ್ ಕೊಡಗ್ ಪೊರಮೆಂಜ

ಬಂದ ಸಂಗೀತ ವಿದ್ಯೆ ಕಾರಳ ವಾದ್ಯ ಕಾರಳ ಅಂಪ ಎಂತಾ ಗಟಾಗಟಿನೊ ಅಪ್ಪಯ್ಯ ಬುಡ್‌ವದಿಲ್ಲೆ. ಪಡಿಪುರ ಕೆಣಿಮಣಿ ಪೊರಮೆತ ಪಡಿಪುಕ್ಕಾರ ಎಚ್ಚಕ್, ಎನ್ನನೆ ಬಗ್ಗೆ ಚಿಟ್ಟಿಕೊ ಚೆಕ್ಕೇರ ಅಪ್ಪಯ್ಯ ತಾಂಡ ಸಾಧನೆರ ಫಲತ್ ಬಂದವು. ಬಗ್ಗಿತ್ ಕಾರ್ಯಕ್ರಮತ್‌ರ ಮದ್ಯತ್‌ಲೇ ನಮಸ್ಕಾರ ಮಾಡಿತ್ ಜನಡ ಮಿಂಞತ್ ಎದೆ ತೊರಂದ್ ಹೊಗಳುಂಜಿತ್. ಇದ್ ಅಪ್ಪಯ್ಯ ಸ್ವರ್ಗವಾಸಿ ಆಕಣೆಯೊ ಖಾಯಂ ಆಯ್ತಂಜತ್. ಅಪ್ಪಯ್ಯಂಡ ಜನ್ಮತ್‌ಲ್ ಸಂಗೀತ ವಿದ್ಯೆಲ್ ಯಾವಂಗೂ ಏದೊ ಸಂಗೀತಕ್ಕಾರಂಗೂ ಬಗ್ಗನವನೇ ಅಲ್ಲ. ಎಕ್ಕಲೂ ಒರ್ ಮೊಳ ಮೇಲೆ. ಪೊರಮೆಂಜ ಬಪ್ಪವು "ಚೆಕ್ಕೇರ ಅಪ್ಪಯ್ಯನವರು ಇದ್ದಾರಾ"ಂದ್ ಕೇಪಂಜಿ ತಯ್ಯಾರಿ ಮಾಡಿತ್ ಕಾರ್ಯಕ್ರಮಕ್ ಬಪ್ಪದ್ ಒರ್ ರೂಢಿ ಆಯಿತಿಂಜತ್. ಸಂಗೀತ ವಿದ್ಯೆಲ್ ಮುಲಾಜಿ ಇಲ್ಲತ ಮನ್‌ಸ ಅಪ್ಪಯ್ಯ. ನಾನ್ ಪೆರಿಯ ಮೋಂವೊ ಗೋಗರಂದಂಡ್ ಬೋಡಿತೂ ನಾಕ್, ಕೊಡವಕ್ ಸಂಗೀತ ಎಣ್ಣೆದಲ್ಲ, ಭಕ್ತಿ, ಸಾತ್ವಿಕ ಎಣ್ಣೆದಲ್ಲಾಂದ್ ಪಡಿಪಿಚಿಟ್ಟಿತಿಲ್ಲೆ. ಮಿನಿಸ್ಪರ್ ಗುಂಡೂರಾವ್‌ರ ಅಪ್ಪಂಡ ಬೆಂದೂರ್ತ್ ಇಂಜಿತ್ ಅಪ್ಪಯ್ಯನ ಗುಂಡೂರಾವ್ ಮರಕತೆ ಇಂಜತ್. ಮಿನಿಸ್ಪರ್ ಆಪಾಂಗ್ ತಿಂಗ ಮಿಂಞ ಅಪ್ಪಯ್ಯ ಕಷ್ಟತ್‌ಲೇ ಬದ್‌ಕ್ ನೀಸಿತ್ ಪರಲೋಕ ಪೋಕಂಡಿಯಾಚಿ. ಒಟ್ಟಾರೆ ಸಂಗೀತ ವಿದ್ಯೆ ಕೊಡಗಲ್ ಕೊಡವಂಗ್ ಅಂದ್ ಎಣ್ಣೆದಲ್ಲ.

ಇನ್ನನೆ ಗೌಡ ಜನಾಂಗತ್‌ರ ಬಲ್ಯ ಅನುಕೂಲಸ್ಥಂಗಳಾನ ಕೆರೆಮನೆ ಸುವರ್ಣ ಸೋದರಂಗ ಅಯಿಂಗಡ ಅಪ್ಪ ಅಪ್ಪ ಮೂರ್ನಾಡ್ ನವರಾತ್ರಿ ಉತ್ಸವಕ್ ಕಾಕಿಚಿಟ್ಟೆಂಡ್ ಮನೆಲಾಕಿಯಂಡ್ 9 ದಿನ ಸಂಗೀತ ಪಾಕಡತ್ ಇಡೀ ಮೂರ್ನಾಡ್ ತೇಲಿ ಪೋಪಯಿಂಜತ್. ದಿನಕ್ಕೋರ್ ಸಂಗೀತಗೌರಡ ಸಂಗಮ ಚೆಕ್ಕೇರ ಅಪ್ಪಯ್ಯಂಡ ಕೂಡೆ, ಪಡಿಪುಲ್ ನಾ ಮುಂದ್ ತಾ ಮುಂದ್‌ಂದ್ ಅಯಿಂಡಯಿಂಡ ವಿದ್ಯೆತ್‌ರ ಆಳತ್‌ನ ಕಾಟುವ ಒರ್ ಪೈಪೋಟಿಲ್ ಎಕ್ಕಲೂ ಚೆಕ್ಕೇರ ಅಪ್ಪಯ್ಯನ ಮೀತವು ದಾರೂ ಈ ಕೊಡಗಲ್

ಕೊಟ್ಟಿತ್ತಲೆ. 100ಂಗ್ 100 ಸತ್ಯವಾಯ್ತೆ ದೇವಕ್ ಮೆಚ್ಚುವ ಈ ತಕ್ಕನ ಕೊಡಗಾರ ಜನಕ್ ಅರಿವಿಕೆ ಎಳ್ತಕಾರ ತಂದಂಡುಳ್ಳ. ಪೊರಮೆಂಜ ಬಪ್ಪವು ಚೆಕ್ಕೇರ ಅಪ್ಪಯ್ಯಂಡ ವಿದ್ಯೆತಾರ ಆಳ ಓವ್ಕ್ ಬೊತ್ತುವ ಇಂಜತ್.

ಅಲ್ಲತೆ ಅಪ್ಪಯ್ಯ ನಲ್ಲ ಬೊಡಿಕ್ಕಾರ ಆಯಿತಿಂಜತ್. ಕವಿ ಹರದಾಸ ಅಪ್ಪಚ್ಚನೊ ನಲ್ಲ ಬೊಡಿಕ್ಕಾರ. ಬಡತನತನ ಪೋತುವಂವ ಆಯ್ತ್ ಸ್ವರ್ಗವಾಸಿ ಆಚಿ. ಆಚೇಂಗಿ ಚತ್ತ ಪಿಂಞ ಇಂದ್ ಅಮರ ಕವಿ ಬದ್ಕಿತಿಪ್ಪಕ್ ಒರ್ ಕಣಕೂ ಇಲ್ಲೆ. ಅಪ್ಪಯ್ಯ ಕಲ್ಲಳ ಕಾಡಲ್ ತಂಗೆ ಪಟ್ಟಡ ಗಂಗೆ, ಮಣಿದಾರ ಬಾವಂಡಲ್ಲಿಕ್ ಪೋಯಿಂಜಲ್ಲಿ ನರಿ ಬೊಡಿ ಬೆಚ್ಚಿತ್ ಕೊಂದವು. ಬಾರಿ ನಲ್ಲ ಬೊಡಿಕ್ಕಾರ, ಸಂಗೀತ ಇಲ್ಲತೆ ಮನೆಲಿಪ್ಪಕ ತೋಕ್ ಬೋಟೆಲ್ ಏರ ಸಮಯ ಕಯಿಪಯಿಂಜತ್. ಇಚ್ಚೆ ಬಲ್ಯ ವಿದ್ಯೆ ಪಡಿಚೆಂವಂಗ್ ಸರಿಯಾನ ಬಟ್ಟೆ ಕಾಣತಿಪ್ಪಕ ಮನ್ಸ ಬುದ್ಧಿ ಬಡ್ಕಾಪದ್ ವಿಶೇಷ ಒಂದಲ್ಲ. ಒರ್ ಮನ್ಸ ನಲ್ಲದ್ ಚಾವಣೆ ಮಾಡ್ಚೆಂಗ್ಗೊ ಅಂದೇತ ಇಂದೇತ ಸಮಾಜಕ್ ಕಣ್ಣೆ ಕೇ ಕಾಂಬುಲೆ. ಎನ್ನೆಂಗೊರ್ ತಪ್ಪ್ ಕೊಟ್ಟಿಪೋಚೆಂಗಿ ಅದೇ ಬಲ್ಯ ವಿಚಾರ. ಪೊಣ್ಣ್ ಮಣ್ಣ್ ಕೆಟ್ಟಣೆಕೂ ಅದನೇ ಎಣ್ಣೆವ. ಅನ್ನನೆ ಆ ಕಾಲತ್ಲ ಶ್ರೀ ರಾಮಚಂದ್ರನೇ ಜನ ಎಣ್ಣೆತ್ ಪೊಣ್ಣ್ ಕಟ್ಟಿತ್ ಕೊಂಡ ಪೋನವಳ ಕೆಟ್ಟಿಯಂಡಂವಂದ್ ಈ ಭಾರತತ್ಲೇ ಎಣ್ಣೆತಿಪ್ಪಕ ಚೆಕ್ಕೇರಪ್ಪಯ್ಯ ಕಳ್ಳ, ದುಂಬಾ ಕುಡಿಪಯಿಂಜತ್ಲೆಂದ್ ಜನಕ್ ಒಂದ್ ಮಾತ್ರ ಗೊತ್ತ್. ನೇರ್, ಅಂವೊ ಕಳ್ಳ, ಕುಡಿಪಕ್ ಈ ಸಮಾಜವೇ ಕಾರಣ. ಕಳಿಪ ತೆಳಿಪ ವಯಸ್ಸರ ಒರ್ ಚುರ್ಕರ ಕುಂಞಿನ ಕೈಕಾಲ್ ಕೆಟ್ಟಿತ್ ಬಾಯಿ ಮುಚ್ಚಿಚಿಟ್ಟಿತ್ ಅಳ್ಪಾಚಿಟ್ಟಕ ಅದ್ ಪುಚ್ಚನೋ ಪೆದ್ದನೋ ಆಪ. ಅದೇ ಲೆಕ್ಕ ಸಂಸಾರ ಪೋತ್ವ ಬಟ್ಟೆ ಕಾಣತೆ, ಸಂಗೀತ ಪವಿತ್ರವಾನಾನ ಮಾರಿ ಮಾರಿ 5 ಉರ್ಪಿಯ, 10 ಉರ್ಪಿಯಕ್ ದಕ್ಕತಾಪಕ ಮನ್ಸ ಕಳ್ಳರ ಆಶ್ರಯಕೇ ಪೋಪ. ಅದೇ ಲೆಕ್ಕಾಚಾರ

ಅಪ್ಪಯ್ಯಂಡೋ ಆಯಿಪೋಚಿ. ವಾದ್ಯ ಹಾರ್ಮೋನಿಯಂ, ವೀಣೆ ರಿಪೇರಿ ಬಪ್ಪಯಿಂಜತ್. ಅಕ್ಕ ಅಕ್ಕಮಂಡ ಮಾಲ್ ಮಟ ಬೆಚ್ಚಿತ್ ತಾಂಡ ವಾದ್ಯಕ್ ಜೀಂವ ಕೊಡ್ಪ ಇಂಜತ್. ಓರಂಡಾಪಕ ಅದ್‌ನ ಬುಡ್‌ತಿಯವಕ್ ದುಡ್ಲ್ ಕೊಟ್ಟೆ ಬ್ಯಾಂಕ್‌ಲ್ ಹರಾಜಿ ಆಚಿ. ಇನ್ನನೆ ಎಚ್ಚಕೊ ಕಷ್ಟ್‌ತರ ಕೋಟೆಲೇ ಅಪ್ಪಯ್ಯ ಚಿಕ್ಕಿ ಪೋನಲ್ಲಿ ಕಳ್ಳ ಒಂದೇ ಬಟ್ಟೆ ಕಂಡತ್. ಅದ್‌ಂಡ ಅಮ್‌ಲ್‌ಲ್ ಈ ಪ್ರಪಂಚ ಮರಂದಂಡ್ ಸಂಗೀತತ್‌ರ ತಕ್ಕಾನ್ ತಾಂಡ ಹಾರ್ಮೋನಿಯಂಲ್ ಪರಂದವಿಂಜತ್. ಇಂದೇತೊ, ಅಂದೇತೊ ತಳ್‌ಕ್ ಬಳ್‌ಕ್ ಕೀಳರಿಮೆ, ಮೇಲರಿಮೆ ಈ ಸಮಾಜಕ್ ಅರ್ಥ ಆಪುಲೆ. ಚೆಕ್ಕೇರ ಅಪ್ಪಯ್ಯ ಇಂದೇತ ಸ್ಕೂಲ್ ಓರಂದ್ ಮಾಸ್ಪರಾವ ಕುಡಿಚಂಡ್ ಪಾಠ ಮಾಡ್‌ವೆನ್ನೆಕೆ ಸಂಗೀತ ಪಾಠ ಎಂದೂ ಮಾಡಿತಿಲ್ಲೆ. ಸಂಗೀತ, ಸಾಹಿತ್ಯ, ಕವಿ ಕಲಾವಿದಂಗಡ ಮನಸ್ ಪೆರ್ತ್ ತಳ್ಳನಿಪ್ಪ, ಸೂಕ್ಷ್ಮ ಇಪ್ಪ. ಅನ್‌ಕೊನಕ ಮುರಿಯುವನ್ನನೆ ಇಪ್ಪ. ಅಯಿಂಗಕ್ ಎದೆರಾಳತ್‌ಲ್ ಬದ್‌ಕೊರ ಬಾರ ತಾಳಿಯವಕೈಯ್ಯುಲೆ. ಇದ್ ಪ್ರಕೃತಿಗುಣ. ಅಕ್ಕ ಜೀವನ ಅಯಿಂಗಕ್ ಜಿಗುಪ್ಪೆ, ಪೋಣ್ಣ್ ಮಣ್ಣ್ ಮಕ್ಕ ಮರಿ ಆಸೆರ ಕೊರವುಲೇ ಕಳ್ಳರ ಅಮುಲ್ ಇನ್ನನೆ ತಡಿ ಮರೆ ಮಾಡಿಯಂಡಯಿಂಗಡ ಕತೆ ಏರ ಈ ಭೂಮಿಲ್ ಉಂಡ್.

ಭೈರವಿ ವೆಂಕಟಸುಬ್ಬಯ್ಯ: ಭೈರವಿ ರಾಗತ್‌ನ ಟಿಪ್ಪುಸುಲ್ತಾನ್‌ರ ಕಾಲತ್ 2000 ಪೊನ್ನಾರ ಬಿಲ್ಲೆಕ್ ಅಡ ಬೆಚ್ಚಿತ್ ಅರಮನೆ ನರ್ತಕಿರ ಸಹವಾಸತ್ ಅವ ಚತ್ತದೂ ಕಳ್ಳಾಲೇ ದಿನ ಕಂಡವು.

ಭೂಮಿಗೆ ಬಂದ ಗಂಧರ್ವ : ಭೈರವಿ ಕೆಂಪೇಗೌಡ ಇಯಂಗಕ್ ಬಲ್ಯ ಸಾಹುಕಾರ ಮನೆತನ ಕೆಂಪೇಗೌಡಂಗ್ ಸಂಗೀತ ಪಡಿಪಿಚಿಟ್ಟು ಗುರು. ಕಣ್ಣ್‌ಕ್ ಕಾಂಬುಲೆ. (ಅವಧೂತ ಎಣ್ಣೆವ) ಅವು ಕೊಡ್‌ತ ತಂಬೂರಿ ಶ್ರುತಿ ಪೊಲಾಕ ನಾಲ್ ಗಂಟೆಕ್ ಕೆಂಪೇಗೌಡನ ತಾನಾಯ್ತೇ ಮೀಟಿತ್ ಎಪ್ಪುವ. ಅಂತಹ ಮಹಾನುಭಾವ ಕುಡಿಚಿತ್ ಅಮುಲ್‌ಲ್ ದಿನ ಮರಿಚತ್. ಎಡೆಲ್

ಪೊಣ್ಣಾ ಚತ್ತ ದುಃಖ ಮನೆಂಜ ಸಂಗೀತನ್ಮೊಂಡ್ ದೂರ ಆಯ್ತ ಸಂಪಾದನೆ ಒಂದು ಕಾಣತೆ, ಆತ್ಮಕ್ ಸಂಗೀತ ಸ್ವರ ನಾದತ್‌ನ ಕೇಪ್‌ಚಿಟ್ಟಿಂಡ್ ಸ್ವರ್ಗ ಸೇರ್‌ಚಿ. ಇನ್ನನೆ ಅದೆಚ್ಚಕೊ ವಿಚಾರ ಸಂಗೀತಕಾರಡ ಉಂಡ್. ಅದಲ್ ಚೆಕ್ಕೇರ ಅಪ್ಪಯ್ಯನೂ ಒಬ್ಬ. ಕೊಡಗಲ್ ಏರ ಶಾಸ್ತ್ರೀಯ ಸಂಗೀತತಾರ ಅನುಭವ, ಪಡಿಪು, ಪುರ್‌ಡ್ ನೇರಾಯ್ತು ಇಲ್ಲತಾಂಗ್ ಇಂಞಿ ಏರ ಸಂಗೀತತಾರ ಪೋಕಾರ ತಕ್ಕನೇ ನಾನ್ ಎಣ್ಣಾವಕ್ ಇಷ್ಟ ಪಡುಲೆ. ಇಂದೆಲ್ಲ ಇಕ್ಕ ದೇವಳೇ ಇಲ್ಲೆ ಪೊಟ್ಪ್. ಕಟ್ಟಾಕತೆ ಎಣ್ಣವವು ಇಲ್ಲತಿಲ್ಲೆ. ಅನ್ನತಲ್ಲಿ ನಾನ್ ಸಂಗೀತ ಸಾಮ್ರಾಟ ತಾನ್‌ಸೇನ್ ದೀಪಕ್ ರಾಗ ಪಾಡುವಕ ಅರಮನೆ (ಅಕ್ಕರ್ ಚಕ್ರವರ್ತಿರ ನಂ. 1 ಸಂಗೀತಕಾರ)ಲ್ ಎಲ್ಲಾ ಬೊಳ್‌ಚ ಕತ್ತುವಿಂಜತ್. ಪಾಡ್‌ವವಂಡ ಮೇಲ್‌ಡೀ ಉರಿಂಜಿ ತಿತ್ತರ ಶಾಕ ಪೊರಮೆ ಬಪ್ಪ ಅನುಭವ ಆಪ. ಎಣ್ಣಾಚೇಂಗಿ ಇದೊಂಡ ಕಲ್ಪನೆ ಕೊಡವಕ್ ಎಚ್ಚಕ್ ಜನಕ್ ಆಕು? ಸಾಮ್ರಾಟ್ ತಾನ್‌ಸೇನ್ (ಸಂಗೀತ)ರ ಸ್ವರ ವಿಸ್ತಾರತಾರ ಗಮಕಕ್ ಆಗ್ರತಾರ ಪಕ್ಕ ಒರ್ ಶಿವಂಡ ಗುಡಿ (ಗೋಪುರ ಉಳ್ಳದ್) 1/2 ಅಡಿ ಬಲತ್‌ಬರಿಕ್ ಬುಡತ್ತಿಂಜಿ ಓರೆ ಜೂಂಗಿ ನಿಂದಿತ್‌ಂದ್ ಎಣ್ಣಕ ಎಚ್ಚಕಾಳ್‌ಕ್ ಅರ್ಥ ಆಪ. ಸಂಗೀತ ಕೇಟಿತ್ ಪಾಬೊಳೆ, ನಲ್ಲ ಪೊಲ್‌ಚಲ್ ಪ್ರಾಣಿ ಪಕ್ಷಿಯ ಸಂಗೀತ ಕೇಪ, ಜಡೆಕಾರ ಮೂರ್ಕನೂ ನಾಗಸ್ವರಕ್ ಕೈಕಾಲ್ ಕೆಟ್ಟಿಪೋನನ್ನೆ ಜೂಂಗಿಯಂಡಿಪ್ಪ. ಸಂಗೀತ ಸ್ವರ ತಾಳ ಲಯ, ಆನಂದ ಸಂಗೀತ ಲೋಕ ಅರಿಂಜವ ಮಾತ್ರ ಅನುಭವಿಚಿಡುವಕ್ ಸಾಧ್ಯ. ಇಲ್ಲೇಂಗಿ ಬದ್‌ಕಲ್ ಕಣ್ಣಿಲ್ಲತವಂಗೂ ಕುಂದ್, ಮಲೆ, ಕಾಡ್, ಆನೆ, ಮನೆ ಕಾಟಿ ಕೊಡ್‌ತನ್ನೆ. ಎನ್ನೇಂಗಿರಡ್ ಕುಲದೇವಿ ಅಮ್ಮೆರ ನಾಡಲ್ ಬಡವನಾಯ್ ಸಂಗೀತತ್‌ಲ್ ಮಹಾಬಲ್ಯವನಾಯ್ ನಂಗಳ ಪೋತಿತ್ ಶಾರದೆ ದೇವಿರ ಮಡ್ ನೀರ್‌ಲ್ ಆ ಮಹಾನುಭಾವ ಅಪ್ಪಯ್ಯಂಗ್ ಮೋಕ್ಷಯಿರಡ್!

ಚೆಕ್ಕೇರ ಅಪ್ಪಯ್ಯಂಡ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ಪೆರಿಯ ಮೋಂವ ತ್ಯಾಗರಾಜ ಅಪ್ಪಯ್ಯ ಪಿಂಞ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ದಂಡನೆ ಮೋಂವ ಸುರೇಶ ಅಪ್ಪಯ್ಯ ಪಿಂಞ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ಮೂಂದನೆ ಮೋಂವ ವಸಂತ ಅಪ್ಪಯ್ಯ ಪಿಂಞ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ನಾಲನೆ ಮೋಂವ ರವಿ ಅಪ್ಪಯ್ಯ ಪಿಂಞ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ಒಂದನೇ ಮೋವ ಚೊಟ್ಟಿಮಾಡ ಶಾಂತ ಉತ್ತಪ್ಪ
ಸಂಸಾರ ಪಿಂಞ ಸಂಸಾರ



ಚೆಕ್ಕೇರ ಅಪ್ಪಯ್ಯಂಡ ದಂಡನೆ
ಮೋವ ಅರಮಣಮಾಡ ಲತ ಜಯ
ಪಿಂಞ ಸಂಸಾರ



ಎಳ್ತೆ ಕಾರ ತ್ಯಾಗರಾಜಂಡ
ಮೋಂವೊ ಪಂಚಮ್ ಬೋಪಣ್ಣ
(ಅಯ್ಯಪ್ಪಂಡ ಕೊರ್ ಮೋಂವೊ)

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,



ಮಡಿಕೇರಿ

ಸಮಿತಿ ಸದಸ್ಯಂಗ

ಅಧ್ಯಕ್ಷ :

ಐಮುಡಿಯಂಡ ರಾಣಿ ಮಾಚಯ್ಯ

ರಿಜಿಸ್ಟ್ರಾರ್ :

ವಿನೋದ್ ಚಂದ್ರ

ಸದಸ್ಯಂಗ :

ಚಿಲ್ಲ ಜಮ್ಮನ ನಾಣಮ್ಮಯ್ಯ ಸೋಮೇಶ್

ಬಾಚರಣಿಯಂಡ ರಾಣು ಅಪ್ಪಣ್ಣ

ಕೊರಕುಟ್ಟಿರ ಸರ ಚಂಗಪ್ಪ

ಕಾಳಚಂಡ ಎ. ಪಳಂಗಪ್ಪ

ಪೊನ್ನೀರ ಪ್ರಭು ಕಾವೇರಪ್ಪ

ಮಂಡೇಪಂಡ ಗೀತಾ ಮಂದಣ್ಣ

ವದಪಡ ಅಯ್ಯಪ್ಪ

ಮಡೆಯಂಡ ವಿಠಲ್ ಬೆಳ್ಳಪ್ಪ

ಪಡಿಂಗಾರಂಡ ಎ. ಪ್ರಭುಕುಮಾರ್

ತೇಲಪಂಡ ಕವನ್ ಕಾರ್ಯಪ್ಪ

ಮಡೆಯಂಡ ಸಬಿತಾ ಕಾರ್ಯಪ್ಪ

ಬೀನಂಡ ಎಸ್. ಪೂಣಚ್ಚ



ಚಿಕ್ಕೇರ ತ್ಯಾಗರಾಜ್

ಕೋಣಗೇರಿ ಗ್ರಾಮಕಾರಳಾನ ಕೂರ್ಗ್ ಸ್ವಾರ್ ಚಿಕ್ಕೇರ ಅಪ್ಪಯ್ಯ (ಮೈಸೂರ್‌ರಾಜಂಡ ಆಸ್ತಾನತ್ ವಿದ್ಯಾನ್ ಆಯಿತಿಂಜ ಬಿ. ದೇವೇಂದ್ರಪ್ಪಂಡ ಶಿಷ್ಯ) ಪಿಂಞ ಅಕ್ಕಮ್ಮ (ಅಪ್ಪನರವಂಡ ಅಪ್ಪಚ್ಚಕವಿರ ಕ್ಕಾರ್‌ಮೋವ) ದಂಪತಿಯಡ ಮೋವ ನಾಯಿತ್

ತಾರೀಕ್ 21-8-1945 ತ್ ಪುಟ್ಟನ ತ್ಯಾಗರಾಜ್ ಹೈಸ್ಕೂಲ್ ವಿದ್ಯಾಭ್ಯಾಸತ್‌ನ ಹುದಿಕೇರಿ ಸರಕಾರಿ ಹೈಸ್ಕೂಲ್‌ಲ್‌ಪಡ್‌ಂದಂಡತ್.

1964 ಂಜ 1982 ಕೆತ್ತಣೆ ಮರಾಠ ಲೈಟ್ ಇನ್‌ಫೆಂಟ್ರಿಲ್ ಹವಾಲ್ದಾರ್ ಆಯಿತ್‌ಂಜ ಇಯಂಗ ದಂಡ್‌ಕುರಿ ಇಂಡಿಯಾ ಪಾಕಿಸ್ತಾನ ವಾರ್‌ಲ್ ಕೂಡಿಯಾಡ್‌ನ ಕೇಳಿ ಇಯಂಗಡದ್.

ನಿವೃತ್ತಿ ಆನ ಪಿಂಞ ಸುಮಾರ್ 10 ಕಾಲ 'ಸೃಷ್ಟಿ ಕೊಡಗು ರಂಗತ್' ಕೊಡವ ಪಾಟ್, ಕೊಡವ ನಾಟಕತ್ ಹಿನ್ನಲೆ ಗಾಯಕ ಆಯಿತ್ ನೈಚಿತುಳ್ಳ ಇಯಂಗ ಸರ್ಕಾರತ್‌ರ ಪರವಾಯಿತ್ ದಂಡ್‌ಕುರಿ ಡೆಲ್ಲಿಕ್ ಪೋಯಿತ್ ಪ್ರೋಗ್ರಾಮ್ ಕೊಡ್ತಿತ್. ನಲ್ಲ ಪಾಟ್‌ಕಾರ ಆಯಿತುಳ್ಳ ಇಯಂಗಡ 'ಅಮರ ಕವಿ ಅಪ್ಪಚ್ಚ' ಪಿಂಞ 'ತೆಳ್‌ನೀರ್' ಎಣ್ಣುವ ದಂಡ್ ಧ್ವನಿ ಸುರುಳಿ ಬುಡುಗಡೆ ಆಯಿತ್. ನಲ್ಲ ಎಳ್ಳೆಕಾರನೂ ಆಯಿತುಳ್ಳ ಇಯಂಗಡ 'ಹಿಂಕಾರ್' ಎಣ್ಣುವ ಕನ್ನಡ ಭಕ್ತಿಗೀತೆ ಪುಸ್ತಕ ಪಿಂಞ ಕೊಡವ ತಕ್ಕಲ್ 'ಎಳ್‌ಸುತ್ತ ಮಲ್ಲಿಗೆ' ಪಿಂಞ 'ತೊಲೆಯಾರ್‌ಡ ಪಚ್ಚಿ' ಎಣ್ಣುವ ಮೂಂದ್‌ಪುಸ್ತಕ ಇಕ್ಕಾಕಲೆ ಬೋಳಿ ಕಂಡಿತ್. ಆಕಾಶವಾಣಿ ಕಲಾವಿದನೂ, ಸಿನೆಮಾ ಕಲಾವಿದನೂ ಆಯಿತುಳ್ಳ ಇಯಂಗಲ ಸಂಗೀತ ಕ್ಷೇತ್ರತ್ ಮಾಡ್‌ನ ನೈಪುಣಾಯಿತ್ 2000 ನೇ ಇಸವಿಲ್ ಕೊಡವ ಸಾಹಿತ್ಯ ಅಕಾಡೆಮಿ ಪಿಂಞ 2004 ನೇ ಇಸವಿಲ್ ಕೊಡಗು ಬೆಲ್ಲಾಡಳಿತ ಸನ್ಮಾನ ಮಾಡ್‌ಚಿ. ಇದಲ್ಲತೆ ಸುಮಾರ್ 35 ಬೋರೆ ಬೋರೆ ಸಂಘ ಸಂಸ್ಥೆ ಕಾರ ಇಯಂಗಲ ಸನ್ಮಾನ ಮಾಡಿತ್.

ಇಯಂಗಡ ವಿಳಾಸ :

ಚಿಕ್ಕೇರ ಎ. ತ್ಯಾಗರಾಜ್

ಕೋಣಗೇರಿ ಗ್ರಾಮ, ಹುದಿಕೇರಿ ಅಂಚೆ

ಮೊ. : 948813914